

**Lologena Wo Kiena Ne  
Yesu Kristo Naña  
LUK  
Siriyuia  
Visayuena Na Tusi Nene**

*Kompasinen suniena plas na tusi nini*

Tusi nini, “*Lologena Wo Kiena Ne Yesu Kristo Naña Luk Naga Siriyuia*”, naga pisayu Yesu sape naga yaru naña Ntewa pisayu pa lus nae Israel lala nanua rui, sape yoko naga imin tamalia la, a vena tamaliena yeririna makega na yomarava. Luk sirilua pa e kiena tusi nini, sape Yesu nene, Ninuna Ntewa namava ke narui pio naga vena “visawal kiena lologena wo va la naña limala korena ga.” Ana komin sur ne nanene, lologena wo naña Luk siriyuia, pulen suniena la naña kilologia sape Ntewa sinena miyee yaru la naña asike e nalogeviowaena.

Suri taña la moki naña toñal e tusi nini, nane suniena kiena yaru la naña amloge po pona akekara. Suniena la moki na sanene sike e marana na keviu taaga [1] naña pisawal sape yoko Yesu imi, a e marana na keviu lua [2] naña pisawal sanape naña Yesu paeme.

A e mña e marana na maro, yaru la akekara pañisi kome naña Yesu mal sina, a pñasuñe si pa mae peni.

Yaru naña siri tusi nini naga siri si tusi taña tai naña kiena kia “*Yumñaena Kiena Li Nalologena*”

*Lala*". E tusi na lua nene, naga pisawal suniena lala naña moluwe marea e pogos naña Yesu pa mae peni. Suniena la nene pisa lologia sape yaru la naña amlelaga e Yesu Kristo apimi moki liluwe, ana asuñña apa apisawal kiela lelagaena nene e yo tañena lala.

Tusi nini "*Lologena Wo Kiena Ne Yesu Kristo Naña Luk Siriyuia*", komsus orelu sike ea. E kompasnena na lua, amio na orai nena, pisawal suniena lañas la naña sike e ga e tusi nini, ana pe su re e tusi tañena lala naña Matiu, Mak a Yoane la telu asiriyuia.

Naga suniena la naña pisayu navisi lala naña amiyau, a suniena naña pisayu yaru na visuaren sipsip lala naña apimin apisu Yesu e pogos naña naga paeme, amio mēna suniena naña pisayu pogos naña Yesu pa e yuñña mēna Ntewa pogos naña naga pe yaru viu ke ga wa, ñakaiwa na yaru wo nae Samaria, a ñakaiwa na ninis naña kovio.

Pupia suri mēna lañasia naña Luk pisayu kañarania e tusi nini, naga sanini. Naga pisayu lotena, a Ninuna Wa, a yo kiena sira lala loyuñña e yuññaena kiena Yesu, a pisayu naña Ntewa kilia viyewo ita, kilia warplan kieta milamulena viowa lala.

*Kompasnen tusi la nini*

Visena na sumo 1:1—4

Yoane Nakeena amio Yesu lalua apaeme, a lalua akapuru 1:5—2:52

Yumuññaena kiena Yoane Nakeena 3:1-20

Yoane kee Yesu, a Yermare tañalia 3:21—4:13

Yesu kila kiena yuũaena e lepas nae Kalele  
4:14—9:50

Yesu moluwe Kalele pa ma Yerusalem 9:51—  
9:27

Legiena maro naũa Yesu kila kiena yuũaena  
garu Yerusalem a e yo la naũa lavisin  
Yerusalem 19:28—23:56

Yesu mali sina a kiena nalogena la apisu naga  
24:1-53

### *Visen ẽesia*

<sup>1</sup> Inu Luk nesiriyu suniena nini pan ko, Yerkawa Tiopilas. Sa naũa ko okilia ẽisi rui, yaru la moki liu naũa asiri suniena na suri la nene komẽas rui naũa aũaalũaalivin ita e kas laũa ẽaro rui.

<sup>2</sup> Suri la nene, ita pe tepisu mesmesun re e kilamarata poli, ana la naũa apisuia, siar e purẽesa, a la na sa naũa la ape li Nalologena Wo ẽesia, la ke narui la apisawal ruru lelein pimi pan ita.

<sup>3</sup> Ana siar nakonua rui, nesuũa nepisusu ruru ke mũaki taũaena la naũa la asiria, a nesuũa nemla ke visena na suri la nene, ana nepisu sane popon visae nekilali nela sunien taũaena la nene komẽasa, nesirikolia vena aim sane tus wo tai naũa taveve ruru narin mrapa lala na suniena nene.

<sup>4</sup> A nane nesiri sike na rui, a nekekarana naũa neligan imi ve kioũa, vena ouloyuia, okilia ovisu kilalea sane suri la naũa osuũa omloge ke rui, la amesmes ga a ape lelaga, la sa naũa kiau tus nini pisawalia.

*Navisi pimi pisawal pa Sakaraea pisape yoko naga war Yoane Nakeena*

<sup>5</sup> Suniena nena naga siar sanini, sape: E pogos naña Parin Suñe Erot naga pe suñen ke lepas nae Yutea, yaru wa tai, naga pe namratava kiena ne Apisa, a naga ñere sira tai naña naga mña molue kome lus kiena ne yaru wa lala, nane e namratava kiena yermarua Eron, wenla Mosis nanua sumo ne. Yaru nene kiena kia Sakaraea, a wona kiena kia Lesipet.

<sup>6</sup> Ana lalua nene kiela malena mesmesu po pañisi e navisuen a kiena ne Ntewa, naña la asuña amlogear kiena navisaluaena lala, a asuña akila ke ñelaga la naña mesmes silaga, pe akilalu re tai poli.

<sup>7</sup> Ana suri ga tai, lalua pe narila re tai poli, komin sira naña Lesipet naga pe luñalumña ga, a nanagane lalua apimi ape yermarua laa rui.

<sup>8</sup> Ana e pogos tai, pe pog na ñegas kiena ne Sakaraea naña monar ava akila kuñañaena e Yumña Wa mña ne Ntewa, sa naña ñegas tai kila e wik tai, ñegas tai kila e wik tai.

<sup>9</sup> A silaga, pogos naña akila sanene, la monar akila sa naña amlil mñapila, vena alual yaru ai naña yoko naga kila pupia yumñaena navaen loyumña e Yo Wa na Yumña Wa nene, vena sikapen ponotaninu na wonta naña sike ne. Ana e poglis nene akila sanene, a kia kiena ne Sakaraea naga pa metava, asape naga narui naña va kila yumñaena nene.

<sup>10</sup> Ana e nena e pogos na sikapen ponotaninu nene, naga pa loyumña vena va kila, a pupia ñina

na yeririna lala asike vanua, asuũa amlen mũaga.

<sup>11</sup> Ana pog naũa Sakaraea pa loyuũa, ana milan kare navisi tai kiena ne Ntewa naũa mĩalivinia, suũaal ga sike e lepas nen wonta naũani lepas na pũamarua.

<sup>12</sup> Ana pogos naũa Sakaraea pisu navisi naũani, naga mninue kare narui sape aũa kila ve sanape na wa, naga marau paũaisi.

<sup>13</sup> Ana navisi nene pisa pania, pisape “Sakaraea, ve omarau manene re. In na nepimin ga nesape nevisawal van ko, Ntewa mloge kiamiu leniena amlua rui, a yoko woũa Lesipet, pũisi na war naruũa na moũa tai, a pogos naũa vaeme, yoko oligan kiena kia Yoane.

<sup>14</sup> “Pogos naũa vaeme, yoko akekara vaũaisi, aloge wo, ana ve amiu re ga, ana yaru taũana mũana lala akekara vaũaisi.

<sup>15</sup> “Sisi nene, yoko imi ve yerkawa tai kiena ne Ntewa, a naga sane ve yaru wa tai, pũisi na naga valia kuruta a wii mũarera mũana lala. Siar e pog naũa naga teke e lomũaũana anena wa, ana yoko Ninuna Wa ulen naga vaũaisi.

<sup>16</sup> Yoko naga ve yaru tai naũa pũisi na vilon le Israel la ve moki awasuũa la si puna Ntewa na Mava, kiela Suũa.

<sup>17</sup> Yoko avisu naũa ninuna a namũareraena naũa se e Navisawalena Elaisa sumo sike sina ga e naga maran ve taaga, komin naũa naga imi sumo, vena visawal visave ve ve piavi re Navisaarena naga imi raunia. Yoko naga vilon sinen ata lala vena asitomyu ruru sina ga narila lala, a yoko vilon sitomena kiena ne li nakilaroen

navisaluaena lala vena ataveve si ðelaga naða pe manmarua a mesmes ruruia. E mrapa ne la nanene narui, ðisi na naga kila ruru ðegas nen yeririna la tai va Ntewa, vena asuñate naga imi ñalivin la.”

<sup>18</sup> Ana Sakaraea mloge visena la nene, ana pisa pa navisi nene, pisape “Ei, ve ovisa re sanene. Taðatete ve sanene, komin imimi lua na mrae pito tano rui.”

<sup>19</sup> Ana navisi naðani pisa ke sina pania, pisape “Peraga, yoko ve sa ga nene. In na Navisi Kaðriel nini, naða silaga nesuñal luen ga nesike e marana Ntewa vena nowar kiena visena, ana naga mligan inu nepim puña vena nevisawal lologena wo nini van ko.

<sup>20</sup> Ana pogos naða nepisawal pan ko, ko na pe omlelaga re e poli, ana nevisa van ko sanini, yoko ove puru, ana ðisi na osuña ga sanene imi tol pogos naða ovisu suri la nene imi ñalivin ko nena ga e kana pogosia.”

<sup>21</sup> Ana pogos naða navisi pis ke sanene pa Sakaraea, yeririna la asuñal asike vanua na wa, asuñate ña pano-o, ana kiela sitomena lua narui, asape “Vanon ya ne naga pa loyuña, kila malion manene suri sanene.”

<sup>22</sup> Ana siraunia na, molue sina, ana la apisu naða naga pe pis re si pan la poli, ana la apisu kilale asape naga sike loyuña, naga pisu suri tai, nane kila naga sanene. Ana naga pis ga e limana pan la, naga pe puru ga moña ga.

<sup>23</sup> Ana suña kila kiena yuñaena e Yuña Wa ñana ne Ntewa, pano-o kilamake kiena pogosia, ana ðasuðe si pa ñana.

24 Ana asuñña sanene pano-o, pe piavi re poli, wona sena, ana pogos naña naga mloge sane mēñena sanene, naga pa moña ga mñala uña sanene pano-o tol kupario lima.

25 A e pogos nene, naga suña pisa sanini, pisape “!Ntewa kila po pan inu pañisi nene wa! Sumonia, yaru la asuña apisu memawan inu komin naña pe noñar re sisi poli, ana nanagane Ntewa pisuveve inu, sinena miye inu, ana mlalua memawaena na kiau lumalumñaena nene rui.”

*Navisi pimi pisawal pa Maria pisape yoko naga war Yesu*

26-27 Ana Lesipet sena tol kupario orai rui, ana Ntewa pitetalia kiena navisi nañani, Kañriel, vena vito visawal kiena visena tai va sira mēe tai, kiena kia Maria, naña naga sira mēe tai na pulkumali nae Nasaret e lepas naña Kalele. E pogos nene, la apisaar Maria rui vena va talopa amio yaru tai, kiena kia Yosop, naña naga molue kome lus kiena ne Parin Suñe Tepet nanua sumo, ana Maria pe pa su re amio naga poli wa.

28 Ana navisi naña Kañriel pimi mñalivin Maria, pisape “O, Maria, Ntewa sitom ruru ko nena pañisi, naga suña pisa ruru ko, sike kemua amio ko lelaga.”

29 Pogos naña Maria mloge visena nene, naga sitom pañisi, sape visuvevelia, pisape navisi nene pisa po pañisi, ana kana kinas sanape.

30 Ana navisi pis sina pania, pisape “Maria, ve omarau re. Ntewa kekaran ko ga, ana yoko kila pupia navisa ruruena tai imi e kioña malena.

<sup>31</sup> Nanagane, yoko osena, vano-o owarwal narumã na yermene tai, a visae naga vaeme pae, monar osikia kiena kia Yesu.

<sup>32</sup> Visena Wa nanua sumo naga pisayu pa narumã nene rui, naã pisape  
'Naga yoko ve yerkaawa, a kiena kia,  
"Narina ne Ntewa na mava,"  
a Suãe Ntewa yoko kila naga imi ve ãarin suãe  
tai naã kus lelen repina marua nene  
Parin Suãe Tepet nanua,

<sup>33</sup> ana ãisi na naga ve suãen la naã amolue e  
mratava mãana yermarua Sekop, nane le  
Yu ne la ne asike nanagane, a la naã yoko  
aim sirau,  
a kiena nasuãenena nene yoko taãatete ãisi  
pogos tai.' "

<sup>34</sup> Ana Maria milan visena nene paãisi naã  
sape yoko naga war sisi, ana naga piun tan navisi  
nene, pisape "¿Ana suri nene yoko mãalivi ve  
sanape ne, komin naã in na pe nesu re nemio  
wou nene poli wa?"

<sup>35</sup> Ana navisi pisatamea, pisape "Ninuna Wa  
yoko naga vitom e ko, a namãreraena kiena ne  
Ntewa na mava ãisi na kalo ko, ana yoko osena.  
A komin naã yoko ove sanene, ãisi na avisave  
sisi wa nene naã yoko owaria, naga ve narina  
ne Ntewa.

<sup>36</sup> "E kionã navisuena, opisu suri nene sane  
mãrera paãisi naã yoko ve sanene, ana popon  
ositomli anomã sira marua Lesipet nene. Asumã  
apisu ke naga asape naga taãatete nena ga war



sisi narui, ana nevisa van ko, naga pe sira marua rui, ana nanagane, kiena kupario orai narui.

<sup>37</sup> Ositomlia, sa naña Ntewa pisa pa sira marua Sera nanua sumo laa rui, e lepas na puna, pe suri re nena tai naña naga kila p̄ele poli.”

<sup>38</sup> Ana Maria pisatan̄nea, pisape “Lelaga kemua naña. In na nepe sira m̄ee na yuñena kiena ne Ntewa ga, ana netañan inu ga vena naga kila suri la nene imi ve lelaga e inu ve sa ga naña naga sinenania, sa naña opisawal pan inu.” Ana navisi nene purmatania.

### *Maria pa m̄alivin Lesipet*

<sup>39</sup> Ana Maria sum̄a sitoñal ke visena lala kiena ne navisi nene, ana sinenan manene pañisi sape va visu anena nene, naña Lesipet, ana pe piavi re poli na, mligan kiena yo, mial kawa pa e pulkumali naña Lesipet amio wona Sakaraea lalua asike ea, nane e lepas na kunus lala nae Yutea.

<sup>40</sup> Ana Maria pa tol m̄ala yuñia, pa pio Lesipet.

<sup>41</sup> A poglis naña Lesipet mloge kilale pulgo Maria naña pis pania, mloge narina naña teke e naga kulul keviu. Ana Ninuna Wa pitomi e Lesipet, pitomi pule ea,

<sup>42</sup> ana Lesipet pio manenea, pisape “!O, Maria, Ntewa pisa ruru ko keviu pañisi, taulu make sira la punu ga, a yoko pupia kiena navisa ruruena sike m̄ena e mrasnoña naña yoko owaria.

<sup>43</sup> In na pe nepe sira wo re nena tai poli vena anenane kiau Supe imi yal li inu sanene, ana nepisu sane po pan inu pañisi.

44 A kiau sisi tomtom pisu kilale ko, kekara pařisi, komin pogos nena nařa memloge řesan pulgořa, naga kulul pařisi e lomęęeu.

45 Ita lua tekekara na tekekara, komin tem-lelaga e visena kiena ne Ntewa, a yoko imi ve lelaga van ita ve sa nena nařa naga pisaar pan ita.”

*Maria mieluar Ntewa e yauena tai*

46 Ana e poglis nene, yauena kiena Maria tai sanini, sape

“Sineu mieluar Ntewa keviu,

47 ninuu kekara pařisi

pa kiau Suře Natamaliaena,

48-49 naga pisu inu nesike tano

nepe sira na kiena yuřaena tai,

naga pe Ntewa nařareraena,

naga sitomřal inu, kila po pan inu.

Teras lelei la nařa aim sirau avisayu inu, asape

‘Sira nene, Ntewa pisa ruru naga keviu,’

nepisirlua kiena kia wa.

50 Sinena miye la nařa apatanonia,

teras na sumo, na sirau.

51 Nařareraena na limana kila suri moki, naga

młipureure la nařa ape řarnřarera, kila la

apa tetai.

52 Kila plan řarin suře e lelela la, pisirilua la

nařa sitomena su ga tano.

53 La nařa viso kar la, pagan ruru la,

li na suri moki, řene plan la, limala korena ga.

54-55 Kila sa nařa pisaar pa repita lala,

pimi miila ita kiena le Israel lala.

Pe sinen ĩesan re Epraam poli, sinen ye luen ga kiena piaparavi, vano-o ve uro re.”

<sup>56</sup> Yauena kiena ne Maria nane ĩisi e nene, a naga sike amio Lesipet pano-o tol kupario telu, siraunia ĩasuĩe si pa mĩana umĩa.

### *Yoane Nakeena paeme*

<sup>57</sup> Ana pimi tol ruru pogos na narina ne Lesipet vaeme, ana paeme pe momĩe.

<sup>58</sup> Ana pogos naĩa namratava puna ne Lesipet amio la naĩa asike lavisinia amloge suri nene, akekara paĩisi amio naga e pupia sinewo kiena ne Ntewa naĩa pimi pania, naĩa nanua sumo naga pe lumĩalumĩa ga, ana nanagane narina nasumo nane paeme ne.

<sup>59</sup> Ana pogos naĩa sisi nene kiena legiena olua, apimin akila naga pe ĩaviu. E pogos nene, la sinelan asape asikia mĩena kien kia, Sakaraea, sane kia kiena ne arimana,

<sup>60</sup> ana anena pisa luĩaria, pisape “Peraga, kiena kia, Yoane.”

<sup>61</sup> Ana la apis pania, apisape “Ya ne sanene? Namratava pumĩa na pe amligan re kia tai sanene e poli!”

<sup>62</sup> Ana apisi ga e limala pa ariman sisi naĩani, vena aviun tania avisave naga sinenan sape aligan kia nape e narina nene.

<sup>63</sup> Ana Sakaraea pis ga e limana pan la, pisape ala mĩaki tai vania, ana siri ea, pisape “Kiena kia, Yoane.”

Suri nene kila la nae yo nene amilan paĩisi,

<sup>64</sup> a e m̃ena e pogos nene, purmenena ne Sakaraea kulul sina, kilia pis narui, ana mieluar Ntewa.

<sup>65</sup> Ana yaru punu lala na lepas nene amloge suri nene, amilan kare pañisi, a suniena nene pa laa narui tol pulkumali tañena lala na lepas na kunus lala ñae Yutea.

<sup>66</sup> A la naña amloge, asitom pañisi, komin naña la apisu kilale asape limana ne Ntewa sike amio naga, ana la asumã apiuviun pan la asape “?Nin sisi wa nene yoko naga ve sanape ne?”

*Sakaraea pisawal visena naña Ntewa pisa pania*

<sup>67</sup> Ana Ninuna Wa pitomi pule e Sakaraea arimanane sisi nene, ana naga pisawal sanini, pisape

<sup>68</sup> “Teieluar kia kiena ne kieta Ntewa,  
Suñe nae Israel,  
pitomi pun ita, pul plan ita,

<sup>69</sup> maplarar kana keyowo,  
molue e piaparavi na kiena yaru na yuñæna  
Tepet,  
naña yoko tamalia ita.

<sup>70</sup> Nanene kiena navisaarena nanua, navi-  
sawalena apisawalia, asape

<sup>71</sup> Naga urelua ita vetan limana ne nasinekar  
lala,

<sup>72</sup> Tañatete m̃ena sinen ãesan naviranarena amio  
repita lala,  
sinena mie la ke na wa,

<sup>73</sup> nane navisaarena m̃arera amio repita Epraam,

<sup>74-75</sup> Ntewa pisaar pisape tamalia ita vetan li-  
mana ne kieta nasinekar lala,

vena ve temarau re sina,  
 teve yaru wa,  
 temesmesu e marana,  
 teyũae vania e legiena punu ga e kieta malena.

<sup>76</sup> Nin naruu, avio kon Navisawalena kiena ne  
 Ntewa na meta manenea, osumon Suře  
 okila ruru kiena mrapa.

<sup>77-78</sup> Yoko ovisawal sane Ntewa sinena ye kiena  
 yeririna lala,

ve sinewo van la,  
 viewo kiela mlamulena viowa lala, tamalia la.  
 Yoko Ntewa kila kiena narin yomerarava ƣesa na  
 kolulagi va metava van ita,

<sup>79</sup> vitom tegoli ita naƣa tesike e yemalolo,  
 naƣa ninuna na marena kalo ita rui,  
 a vitom vivagali mrapa na suũare vena teyaloro  
 ea.”

### *Yoane Nakeena kapur pa metava*

<sup>80</sup> Ana pogos naƣa kas la pimi ƣaro pano, Yoane  
 nene kapuru pimi keviu, a kiena sitomena marua  
 ruru po, a suũalu m̄arera suwa wa se yũaena  
 kiena ne Ntewa. A naga pa sike e yokorena, vena  
 va tol pogos naƣa naga monar vaeme e marana  
 ne le Israel lala.

## 2

### *Yesu paeme*

#### *Matiu 1:18-25*

<sup>1</sup> Ana e pogos nene, ƣarin suře kiena ne le  
 Rom lala, naga kiena kia Sisa Okastas. Ana naga  
 pisawal pisape monar aulo yeririna punu ga e  
 purvanua make ga naƣa asike vatanon kiena  
 navisuarena.

<sup>2</sup> Yumñaena nawuloen yaru la nene, la akila p̄esania, a e pogos naña la akila, yeririna kiena ne Sisa tai naga pisuar ke pupia lepas nene Seria, a kia kiena ne yerkawa nena, naga Kuarinias.

<sup>3</sup> Ana nakilaen yumñaena nene, apisape yeririna punu ga monar ava si e kiela yo lala, vena akilia asiri ruru kiela kia, a aulo ruru la.

<sup>4</sup> Suri ne nanene kila Yosop molue e pulkumali nene Nasaret, naña naga sike ea, naga nene e lepas nae Kalele, ana naga pa ma metava e pulkumali nene Petleem, naña yermarua Parin Supe Tepet naga paeme e nanua sumo, naga nene e lepas naña Yutea, komin naña Yosop naga molue e lus kiena ne yermarua Tepet nene.

<sup>5</sup> A Yosop p̄ere wona naña Maria lalua apano, naña e pogos nene, naga lavisin ke naña kana sisi vaeme narui.

<sup>6</sup> Ana lalua apano, a pogos naña asike Petleem wa, Maria mninu sane kiena pogos na waren sisi pimi narui.

<sup>7</sup> Ana Maria p̄arlua p̄esan kiena mom̄e nene, a naga mliluwo ruru e kinakinas nen kulmrae lala, ana pe m̄ana yo namonena po re poli, komin lalua akilali asape ava e yumña m̄ana wolawa lala, ana pule rui, ana Maria mligan ga sisi tomtom nene m̄ene lelen navaganen surmali lala.

*Navisi lala aṃalivin yaru navisuaren sipsip lala*

<sup>8</sup> Ana lemalo nene, yaru navisuaren sipsip laṃas asike amio kiela surmali lala, e yo na vilum̄ini vanuan ga Petleem nene.

<sup>9</sup> Ana navisi tai kiena ne Ntewa pitomi tano pula, a naurarena kiena ne Ntewa tegoli make yo nene sane pupia kapi tai, kila yaru la nene amilan pañisi.

<sup>10</sup> Ana navisi nañani pis pan la, pisapenua “Ve amarau re. In na noñar ke visena tanea tai ne navisaen van amiu, naña kilia kila yeririna make ga aloge won vañisi.

<sup>11</sup> Yemalo ga nini, e pulkumali kiena ne Parin Suñe Tepet nanua, nane Petleem, nin sisi tai paememare ga na wa, naña yoko naga ve kiamiu Natamaliaena. Naga ke narui pe kiamiu Suñe, naga pe Navisaarena naña Ntewa pisaaria nanua rui pisape yoko ligan imi.

<sup>12</sup> “A nanene narui nane kile na sur ne tai nini. Yoko alual nin sisi tomtom nene, naña la akila ve tañena vania. Yoko avisu naña aliluwo ga e kinakinas nen kulmrae lala, a amligan ñeke e lelen kinanen kan surmali lala.”

<sup>13</sup> Ana veraga ga amilan ga pupia ñegas nen navisi tai nae ma e peni apitom asikol navisi nañani. Ana navisi la nene amieluar Ntewa, amiyau apisape

<sup>14</sup> “Ma metava ma e peni, asike amieluar ke Ntewa keviu pañisi, a e yomarava nini, suñare sike e yeririna la naña Ntewa naga kekaran la.”

*Yaru navisuaren sipsip la apa garu Petleem*

<sup>15</sup> Navisi lala apisawal visena nene ñisi, apur matan si yaru navisuaren sipsip la nañani, añasuñe la si apa ma e peni. Ana yaru la nene asuña apisasayu ke sina suri la nene pan la,

apisapenua “Suwala, ita, tevano. Popon teva garu Petleem vena tevisuli suri naña m̃alivi ga na wa, naña Ntewa pisawal pan ita.”

<sup>16</sup> Ana amiyal kawa apano, apa añaal Maria amio Yosop, apa akaten sisi tomtom nañani, m̃eke ga m̃ana yo e lele navaganen suri mali lala.

<sup>17</sup> Ana pogos naña apisu suri la nene ana apisawal visena make ga naña navisi pisa pan la e lepas na sisi tomtom nene.

<sup>18</sup> Ana pogos naña yaru tañena la amloge suniena nene, apule mamaga e pupia nailanena tai.

<sup>19</sup> A Maria, naga mligan ruru suri la nene e losinena, pe sinen ñesan re poli, sisitoñal luen ga silaga.

<sup>20</sup> Ana yaru la nene añasuñela si apa pun kiela sipsip lala, asumña apisirlua ke kia kiena ne Ntewa, a asumña amieluar naga pañisi vanon suri wo la naña amloge a naña apisuia, naña atorokin nena ga visena kiena ne navisi naña pisawal pan la.

### *Asikia Yesu*

<sup>21</sup> Ana pogos naña moñe nene kiena legiena olua, ana kana pogos na kilaen ñaviu ea. Akila sanene ñisi, asikia asape Yesu, kia nena naña navisi pisawal ñesania, sumon naña Maria m̃eñenania.

### *Akus toroun Yesu pa e Yum̃a Wa m̃ana ne Ntewa*

<sup>22-24</sup> A pogos naña Yesu paeme wik orai ñaro pae pano, pogos nakilaen kuñañaena naikikena



e Yumã Wa m̃ana ne Ntewa narui, naga nene komin kuruta kana sira naþa þar sisi. Ana akila kuþaþaena nene, taveve Navisaluaena kiena ne Mosis naþa pisape “La naþa limala korena ga, akilia awe ga lom̃e ve lua, pona narin kupa ve lua.”

Ana e ke e pogos nene, la akus toroun Yesu pa e Yumã Wa m̃ana Ntewa, amiyawawo pania. Suri nene taveve m̃ena Navisaluaena kiena ne Mosis, naþa pisape “Yerm̃ene punu ga la naþa apaeme þesia ape wa, la ape kiena ne Ntewa.”

*Yermarua Simion pisu Yesu e Yumã Wa m̃ana ne Ntewa*

<sup>25</sup> Ana yaru tai sike e Yumã Wa m̃ana ne Ntewa e pogos nene, kiena kia Simion. Naga pe yaru nae ga Yerusalem, pe yaru mesmesu tai, a pe yaru m̃arera tai e þelaga na leniena. Naga sumã sumãate ke sape sinenan visu Nasineyeena kiena ne Ntewa nene, nane Navisaarena, imi iila le Israel lala e pog m̃arera nene naþa asike ea.

Ana Simion nene naga yaru tai naþa Ninuna Wa sike e naga silaga,

<sup>26</sup> a Ninuna Wa pisawal pa naga rui naþa yoko naga taþatete kovio, vano vano-o kilamarana visu Navisaarena kiena ne Ntewa sumo wa.

<sup>27</sup> A Ninuna Wa þere pimi e Yumã Wa m̃ana ne Ntewa, e nena e pogos naþa akus sisi tomtom Yesu pimi, vena akila þelaga navisaluaena nene.

<sup>28</sup> Ana Simion miaþear sisi nene, mieluar Ntewa, pisa potena pania, pisape

<sup>29</sup> “Suþe Keviu o, nanagane nepisu suri naþa opisaar pan inu, pimi pe lelaga rui. Ana suri nene kila sumãare pimi e sineu, ana nanagane

okilia otamãan inu, yaru na kioũa yuũaena, nevetan yomarava nini neiũaasu.

<sup>30</sup> E ga e kilamarau, nepisu kioũa Natamali-aena,

<sup>31</sup> naũa omligan pimi e maran yolai lala na yomerava,

<sup>32</sup> sane kapi tai na kipian koena van yeririna taũaena lala, a yoko aieluar imimi kioũa le Yu lala, komin kiamimi naurarena nene Yesu.”

<sup>33</sup> Ana Yosop amio Maria lalua amilan visena kiena ne Simion nene paũaisi naũa pisayu Yesu,

<sup>34</sup> ana Simion pis ke sina ga, pisa ruru la, ana pisa pa anena Yesu, pisape “Ntewa mligan sisi nene pimi pan ita nae Israel vena kila ita ve moki teloru, a vena kila mũena ga ita ve moki tesuũalu sina. Ntewa mligan naga pimi sane kile tai, ana yokorena yaru ve moki naũa avisa kare ga naga.

<sup>35</sup> Ana ve sanene, yoko naga kila kiela nasito-mwanena la nene aũaalivi e yometava.

“Ana e lepas na puũa, ãisi na naloge viowaena yur losineũa sane playu na mara tai, yokorena sineũa worovia komin suri la naũa yoko imi mũalivin narũa nini.”

*Sira marua Ana pisu Yesu e Yuũa Wa mũana ne Ntewa*

<sup>36-37</sup> A sira marua tai naga mũena teke e poglis nene, kiena kia Ana, naũa naga pe navisawalena tai. Ana nene, arimana Panuel, naũa molue kome lus kiena ne Aisere nanua sumo. Naga talopa pogos naũa pe sira mũee ke ga wa, ana naga sike amio wona na yermũene tol kas olua ga, ana wona nene mare tania. Naga pe letano

ga sanene, pano-o tol kiena kas lualima orelu pa vari.

Naga pe sira tai naþa silaga sulueen ga e Yumã Wa mana ne Ntewa, naþa sumã pa ke e pogos na lotuena na kolulagi lala pa tol na yepekilavi, a silaga naga monsilu ga vena len.

<sup>38</sup> E poglis nene narui, pimi lavisin la, mlen, pisa potena keviu pa Ntewa vanon sisi nene, a siraunia, molue pano sumã pisayu Yesu pa yeririna la naþa asun akiravan m̃ate ke asape Ntewa imi tamalia Yerusalem, ana Ana pisawal ruru pan la, naþa kiela Navisaarena pimi rui.

### *Yosop la aþasuþela si apa Nasaret*

<sup>39</sup> Pogos naþa Yosop amio Maria akila suri la nene sa naþa Navisaluaena kiena ne Ntewa pisa þisi narui, ana aþar Yesu aþasuþela si apito garo kiela pulkumali nene Nasaret, lepas naþa Kalele.

<sup>40</sup> A nin sisi nene kapur pimi keviu, kiena sitomena pimi pe manmarua ruru po paþisi, a apisu naþa Ntewa miila naga vena naga kila sur punu ga wo e kiena malena.

### *Yesu pe yaru viu ga, pian yaru la e Yumã Wa*

<sup>41</sup> Ana e kas punu ga, le Yu la asumã akila ke kiela þaþagena tai, naþa Paþagena na Sitomãlen Natamaliaena. A silaga, la naþa asike e yo taþena lala, la sinelan manene paþisi vena ava ma Yerusalem akila þaþagena nene, a arimana Yesu amio anena, la m̃ena akila ke sanene.

<sup>42</sup> Ana e kas tai, pog naþa Yesu kiena kas tol lualima taaga pa lua [12] ke na wa, apa sina, ana aþure Yesu amio la.

<sup>43</sup> Ana la akila suri na ĉaĉagena la nene pano-o ĉisi, ana yeririna la aĉasuĉela si apa e kiela yo lala. Ana Yesu na pe pa re poli, naga suĉa ga Jerusalema, ana arimana amio anena pe akilia re poli.

<sup>44</sup> Lalia asitom ke asape pona naga sike amio la ĉasia veraga e pupia ĉegas na kiela namratava lala a kiela erau lala, ana amial ĉa pano-o tol legiena wetelu tai. Ana e yemalo nene akale Yesu pano-o,

<sup>45</sup> pe amial re naga sike amio la poli, ana apisu sane la monar atayu lala awasuĉe si ava garu Jerusalema vena alualia.

<sup>46</sup> La amial legiena wetelu taaga, apim atol si Jerusalema, akale pano-o, ana e legiena taĉena, naĉa kana legiena na telu na kiela yalena, amial ga na wa, apisu teke tano e Yunĉa Wa ĉana ne Ntewa. Naga totano teke amio navianena lala nae e yo nene, toĉa miyagokon ke kiela visena lala, a toĉa piuviun ke naviunena la tan la.

<sup>47</sup> A la naĉa asike lavisinia e pogos nene, la amilan manene pupia manmaruaena a nakiliaena kiena ne Yesu paĉisi, amio navisataĉeen la naĉa naga suĉa mla ke pan la naĉa apiun ke suri tania.

<sup>48</sup> Ana pogos naĉa arimana amio anena apisu naĉa naga kila ke sanene, amilan paĉisi, ana anena pis pania, pisape "Ei, naruu! Komin ya ne sinoĉan osape okila kare manene imimi sanene? Opisite ke ne, imimi lua makale ko pano-o, pe moĉal ko re nena ga, ana okila imimi memloge piowa paĉisi wa."

<sup>49</sup> Ana e pogos nene Yesu mla navisataĉeen

tai pan lalua, pisa sanini, pisape “?Komin ya ne amiũ lua apa akale inu e yo taŕena la ne sanene? Sanape, amlua pe asitoĩal re si sane in na monar nesuĩa nekila ga yuĩaena kiena ne kau Ata loyuĩa e mĩana yuĩa poli?”

<sup>50</sup> Ana navisataĩeena naŕa pisa pan la, amn-inue logekilaleen kana kinasia.

<sup>51</sup> Ana Yesu mligan yo nene, naga pito amio la, ana la aŕasuŕe si apito e kiela yo naŕa Nasaret.

A Yesu su pogaga amio la e yo nene, suĩa mlogear ruru la mĩa silaga. A anena naŕa Maria suĩa sitoĩal luen ga suri la nene loyuĩa e losinena silaga.

<sup>52</sup> Ana kas la pimi ŕaro pano, a Yesu kapur pimi keviu, a kiena manmaruaena amio kiena maruaena suĩa pimi keviu laa narui, a Ntewa suĩa pisa ruru naga keviu paŕisi, kila yaru la apisu naga po na po, akekaran manene naga paŕisi.

### 3

*Yoane Nakeena sike e yokorena, naga mlolon-  
gon ke navilopuena*

<sup>1-2</sup> Ana kas laŕas ŕaro pa rui, ana Yoane Nakeena, narina ne Sakaraea, naga pimi mĩaliv e yokorena. Naga nene e pogos naŕa pupia Ŕarin Suŕe Taepirias Sisa nae Rom naga pe suŕe keviu ke tol kana kas lualima taaga pa lima rui, a e poglis nene na mliganar kiena yerkawa laŕas rui, sane Ponses Paelat, naga pisuar Yutea, a Erot, naga pisuar Kalele, a wenla naŕa Pilip, naga pisuar lepas nae Ituraea amio Trakonatis,

a Lasanias, naga pisuar lepas nae Apilin. A e m̃ena ga e pogos nene, lalua naṗa ape ṗar na yaru wa lala asike garu Yerusalem, naga Anas amio Kaeṗas.

Ana Yoane sike garu yokorena, ana Ntewa mla visena la pania,

<sup>3</sup> ana naga pa make e lepas punu ga na wii nae Yortan, naga suṃa mlologon ke pisape yaru la punu ga monar avilopu la, a monar ava e nakeena, ana yoko Ntewa naga viewo kiela mlamulena viowa lala.

<sup>4</sup> Naga kila sa ga naṗa Navisawalena Aisea pisa nanua rui e kiena tusi, naṗa sape

*“Pulgo tai suṃa pio ke e yokorena, sape Akila ruru make mrapa kiena ne Ntewa, vena naga kilia imi m̃alivi e kiamiu malena lala.*

<sup>5</sup> *Yoko kam na monar asinwo make pulṗalu lala, a monar akilro kunus la su ga tano, a yo la naṗa kapinia la monar aim amesmesu ruruia*

*a yo la naṗa ṗilṗil la monar aim ameri ruruia;*

<sup>6</sup> *ana sanene, yoko yolai la punu ga avisu kiela Natamaliaena naṗa Ntewa ligania yalin la e mrapa nene imi m̃alivin la.” Ais 40:3-5*

### *Yaru la apim puna Yoane*

<sup>7</sup> Yum̃aena kiena ne Yoane, naga mlologon sanene narui, ana pogos naṗa ṗina la moki amolue apa e yokorena vena naga kee la, naga pis m̃arera pan la, pisa sanini, pisape “Kam na sa ga loṃara la naṗa amaraun kapi tai ana aṗure, ana kam na asitom asape akilia aurmatan pupia

anen kapi naña Ntewa yoko ligan imi? Peraga, komin pe apilopu amiu ruru re poli wa.

<sup>8</sup> Ana visae lelaga kemua naña amaraun nakoena nene, kiamiu malena lala monar war mras wo la naña torokin kiamiu navilopuena nene. Ana avisuaria, ve awarwar amiu re sina, sa naña akila ke rui, naña asumña apisa ke asape 'E, ita na tesumña poga ga rui, okilakan ita ke narui tepe lus kiena ne Epraam nena naña.' Ana nanene na pe sur re tai nene poli, komin naña visae Ntewa sinenania, naga kilia war kilavaru la nene, yumnaen lus kiena ne Epraam la ve moki ea, vena la akus lelemiu.

<sup>9</sup> In na nevisa van amiu, nevisave mēkiavi mon ruru mēke rui, vena te plan laki la naña pe añar re mras wo la poli, akoven la ava e kapi."

<sup>10</sup> Ana pogos naña p̃ina la amloge nene, amarau na amarau, ana apiunia, asape "Ana visae ve sa nene, yoko imimi mekila ve sanape narui?"

<sup>11</sup> Ana Yoane pisatamē la, pisape "Yar naña m̃ana kulsaket lua, yoko naga monar tam̃an tai va yar naña pe m̃ana re tai poli. Yaru naña kana kinañena keviu, yoko naga monar vion re kom̃as va yar naña pe kana re poli."

<sup>12</sup> A yar na takis la moki, naña ape li nakila keuiaen nena yar lala, apimin vena Yoane kila nakeena van la, ana la m̃ena ga apisu kilale kiela napiowaena lala, ana la apiun m̃ena ga asape "? Navianena, sanapen imimi, yoko imimi monar mekila ve sanape?"

<sup>13</sup> Ana naga pisa pan la, sape “Yoko awarpolo vetan yaru lala torokin ga ya naña la monar aulia, ana ve yuve re, sa naña akila ke p̄isi rui.”

<sup>14</sup> Ana yaru na mara m̄ena lañasia apiun sanini pa Yoane, asape “?A imimi, yoko mekila ya?”

Ana naga pis pan la, pisape “Amiu apuarar ke kiamiu suri na mara lala, ana yaru la asum̄a amaraun amiu pañisi, lala sane visae pog tai sinemiun kiela suri tai, amiu avisa ga ana monar atañania. Ana ðelaga nene, yoko monar ve akila re sina. A asum̄a sinemiun mimi lue silaga asape yerkaawa la nene apul amiu ve tokak ga, pona torok ga yo, ana monar akekarana ga narui.”

*Yoane sape yoko Navisaarena imi*

<sup>15</sup> E pogos nene, le Yu lala asum̄a asitom ke asape kiela Navisaarena lavisi m̄alivi, ana amloge visena wo la nene kiena ne Yoane, akekarania, ana naviunena sike e kiela sitomena lala, asum̄a apiuviun ke, asape “O, pona yaru ne nanene yo, naga pe kieta Navisaarena, pona peraga?”

<sup>16</sup> Ana Yoane sum̄a pisawal ruru merarava pan la, pisape “Peraga. In na nepitom sumo, vena nesum̄a nekee amiu ke ga e wii, ana yaru tañena tai vim siraun inu. Yaru nene, naga to laa metavan inu, a in na pe netorokin re naña neluñarlua kulus nen lana poli pona nekila kiena yum̄aena tañena. Ana naga ke narui, yoko kee amiu e Ninuna Wa, amio kana kapi nena, vena kekan plan kororaki lala vetan kiamiu malena.

<sup>17</sup> Naga sa naña naga tarar ke koruak nayuraren wit, vena silsilin plan kana kinas lala. Ve



sanene, yoko naga war ruru kinas nen wit la nene va umã, ana yoko naga koven vinus va e kapi tai naþa taþatete mare pogos tai.”

<sup>18</sup> Nanene narui, Yoane Nakeena mlologon Lologena Wo pa yeririna la sa ke nene narui, a naga sumã pisa ke mñena visena wo naiilaaren taþena la pan la, a visena nakila þegelaena.

<sup>19</sup> Ana yar tai pe kekearan re nena Yoane, nane Parin Suþe Erot, komin Yoane sumã pis ke pania vanon naþa naga þerelua sira nene Lerotias, naþa wona wenla, a pis pania vanon sur taþena mñena laþasia naþa naga kila.

<sup>20</sup> Ana metavan kiena napiowaena taþena lala, Erot sinen kar Yoane pano-o, sumãl narui koven pa e yuãa naloge viowaena.

*Yoane kee Yesu*

*Matiu 3:13-17; Mak 1:9-11*

<sup>21</sup> Ana pogos naþa Yoane pe pa re e yuãa naloge viowaena poli wa, naga kee mña yeririna la pano-o, ana pog tai Yesu mñena pimi e yo nene, ana Yoane kee mñena naga. Ana pogos naþa Yesu molue e wii, sumã mlen mñaga, ana veraga ga sinapane pike,

<sup>22</sup> a Ninuna ne Ntewa pimi pe tasa, momña pitomi tano sane loñe tai, pitomi pran ea. Ana Ntewa pis ma e peni pitomi pania, pisape “Ko Naruu nene, naþa nepinaia ko paþisi. Kiau sitomena sike ga e ko, nekekearan ko paþisi.”

*Repina ne Yesu lala*

*Matiu 1:1-17*

<sup>23</sup> Ana siraun naþa Yoane kee Yesu, ana naga siar kiena yumãena narui, a e poglis nene, naga kiena kas la tol lualima telu. A lus naþa Yesu molue komea, e lepas na yermene, siar e Yosop, naþa apisu sane arimanane Yesu, pa sanini:

Yosop, naga narina ne Eli;

<sup>24</sup> Eli, naga narina ne Matat;

Matat, naga narina ne Livae;

Livae, naga narina ne Melki;

Melki, naga narina ne Sanae;

Sanae, naga narina ne Yosop;

<sup>25</sup> Yosop, naga narina ne Matateas;

Matateas, naga narina ne Amos;

Amos, naga narina ne Neam;

Neam, naga narina ne Esli;

Esli, naga narina ne Nagae;

<sup>26</sup> Nagae, naga narina ne Mat;

Mat, naga narina ne Matateas;

Matateas, naga narina ne Semein;

Semein, naga narina ne Sosek;

Sosek naga narina ne Sot,;

<sup>27</sup> Sota, naga narina ne Soanan;

Soanan, naga narina ne Resa;

Resa, naga narina ne Seruþapel;

Seruþapel, naga narina ne Saltiel;

Saltiel, naga narina ne Neri;

<sup>28</sup> Neri, naga narina ne Melki;

Melki, naga narina ne Ati;

Ati, naga narina ne Kosam;

Kosam, naga narina ne Elmãtam;

Elmãtam, naga narina ne Ere;

<sup>29</sup> Ere, naga narina ne Yosua;

Yosua, naga narina ne Eliesa;  
Eliesa, naga narina ne Sorim;  
Sorim, naga narina ne Matat;  
Matat, naga narina ne Livae;  
<sup>30</sup> Livae, naga narina ne Simion;  
Simion, naga narina ne Suta;  
Suta, naga narina ne Yosop;  
Yosop, naga narina ne Sonam;  
Sonam, naga narina ne Eliakim;  
<sup>31</sup> Eliakim, naga narina ne Melea;  
Melea, naga narina ne Mena;  
Mena naga narina ne Matata;  
Matata, naga narina ne Natan;  
Natan, naga narina ne Tepet;  
<sup>32</sup> Tepet, naga narina ne Sese;  
Sese, naga narina ne Opet;  
Opet, naga narina ne Poas;  
Poas, naga narina ne Sala;  
Sala, naga narina ne Nason;  
<sup>33</sup> Nason, naga narina ne Aminatap;  
Aminatap, naga narina ne Atmin;  
Atmin, naga narina ne Ani;  
Ani, naga narina ne Esron;  
Esron, naga narina ne Peres;  
Peres, naga narina ne Suta;  
<sup>34</sup> Suta, naga narina ne Sekop;  
Sekop, naga narina ne Aisak;  
Aisak, naga narina ne Epraam;  
Epraam, naga narina ne Tera;  
Tera, naga narina ne Nao;  
<sup>35</sup> Nao, naga narina ne Seruk;  
Seruk, naga narina ne Reu;  
Reu, naga narina ne Pelek;

Pelek, naga narina ne Eþa;  
 Eþa, naga narina ne Sela;  
<sup>36</sup> Sela, naga narina ne Kaenan;  
 Kaenan, naga narina ne Aþaksati;  
 Aþaksati, naga narina ne Sem;  
 Sem, naga narina ne Noa;  
 Noa, naga narina ne Lamek;  
<sup>37</sup> Lamek, naga narina ne  
 Metusela;  
 Metusela, naga narina ne Inok;  
 Inok, naga narina ne Saret;  
 Saret, naga narina ne Malalil;  
 Malalil, naga narina ne Kaenan;  
<sup>38</sup> Kaenan, naga narina ne Enos;  
 Enos, naga narina ne Set;  
 Set, naga narina ne Atam; ana  
 Atam, naga narina ne Ntewa.

## 4

*Parin suþe kiena ne yermare la naþa Yermare  
 Lego, kilali Yesu*

*Matiu 4:1-11; Mak 1:12-13*

<sup>1</sup> Ana pogos naþa Yesu pimi si e lepas na wii nae Yortan naþa Yoane kee naga ea, naga pulen Ninuna Wa paþisi. Ana Ninuna þere Yesu pa ke sina ga e yokorena,

<sup>2</sup> a naga sike e yo nene pa tol legiena lualima yam vari, naþa þarin suþe kiena ne yermare lala sumña kilali naga. Ana e legiena la nene, pe kinan re poli, sumña pano pano-o tol naþa visokar na visokaria.

<sup>3</sup> Ana Yermare Lego nene pimi pisa pania, pisape “Visae ko ope Narina ne Ntewa kemua lelaga, ovisali va kilavaru nene imi ve kilaparavi, vena okania.”

<sup>4</sup> Ana Yesu pisatañea, pisape “Peraga, komin Visena Wa pisape ‘Pe yar malin re ga kinanen poli.’ ”

<sup>5</sup> Ana Yermare Lego sinenan sape kilali sina Yesu, ana ñere kiena sitomena pa metava e pupia kunus tai. Kipian naga e purvanua make ga na yomarava nini,

<sup>6</sup> ana pisa pania, pisape “Navisuaren yo la nene, amio kala naurarena make ga, asike pa e lumãu rui. Inu noñar kian la, ana nekilia netañan va yar ai naña in na sineun nesape netañan vania.

<sup>7</sup> Pogaga, visae ovatanon inu, olotun inu, vera na neligan make sur la nene se lumoña.”

<sup>8</sup> Ana Yesu pisatañea, pisape “Visena Wa pisape

‘Olotun ga Ntewa okila ga kiena yumãena naga taaga, komin naga ga pe kioña Suñe.’ ”

<sup>9</sup> Ana Yermare Lego sinenan sape kilali sina Yesu, ñere kiena sitomena pito garo Yerusalem, mligan naga e yo tai naña pa manene metava, e wos nen yumã ñana Ntewa, ana pisa pania, pisape “Visae ko ope Narina ne Ntewa, oula oto tano. Okilia okila woga ga ne,

<sup>10</sup> komin naña Visena Wa pisayu Ntewa, pisape ‘Naga yoko ligan kiena navisi lala, vena aim asuña amio ko, avisuar ko ñaga.

<sup>11</sup> *Yoko ayukop yaun ko ga vena ve otan re laña e kilavaru.’ ”* *Yauena 91:11,12*

12 Ana Yesu pisatañe ke sina ga, pisape “Peraga rui, komin Visena Wa pisa ñena ga pisape ‘Ve om̃areran re okilali kioñã Supe Ntewa vena kila kioñã sur tai.’ ”

13 Ana pogos naña Yermare Lego kilali kiena natañaliena la nene pa Yesu ñisi, ana purmatania pano, naga pa sumate ke vena lual pogos tañena naña sitom ke sape kilia taulu Yesu ea.

*Yesu siar kiena yuñena gar Kalele  
Matu 4:1-11; Mak 1:12-13*

14 Ana siraunia, Yesu mialoro e nam̃areraena kiena Ninuna Wa, pimi tol yo Kalele, ana yar la apisayu naga pano-o kalo make yo lepas nene.

15 Ana naga sumã pa ke e kiela yuñã na leniena lala, sumã pian la, ana asumã akekaran naga pañisi, asumã apisirlua ke kiena kia.

*Le Nasaret la am̃enelua Yesu*

16-17 Ana Yesu pimi tol kiena yo naña Nasaret, naña kapuru pimi keviu ea, ana e Legiena Wa, sa naña kila ñã silaga, naga pa amio la e kiela yuñã nalenena. Ana asape naga ulolua Visena Wa Kiena ne Ntewa van la, ana akian tus naña Aisea siriya pania. Ana naga sumãlu na pikeña tus nañani, ñal e naña sinenan sape ulolua van la, ana puloia, naña pisa sanini, pisape

18 “Ninuna ne Ntewa sike e in rui, komin naña Ntewa mligan inu vena in ke narui naña nelologon Nalologena Wo va la naña limala korena ga.

*Naga mligan inu nepimin vena nevisawal va la naña asike e yuñã naloge viowaena,*

*nevisave nanagane, akilia amolue ga sa ga ne,  
 a vena nevisawal va kilamara ðala lala, nevisave nanagane, kilamarala la kilia imi wo sina.  
 A naga mligan inun sape yeririna la naða asike tano, naða yar taþena la asuña akila kare la ke silaga, yoko in na neure plan la, aim asu si e yo wo tai.*

**19** *Ana sanene, in na nekilia nekila merarava nevisave nanagane, Ntewa kila kiena pog viu nowo tai pimi ñalivin yar la nene rui.”  
 Ais 61:1,2*

**20** *Ana pogos naða Yesu pulo nawuloena nene þisi, naga pulonar si tus, kian si pa yaru na visuaren yuñaena, ana pa to meta e lelen nalologena, vena vis va yar lala. Ana la make ga naða asike loyuña asuña atamaria Yesu asape aña yoko aloge ya ne visa van la ne wa.*

**21** *Ana pogos naða naga siar kiena visena, ana pisa sanini, sape “Nevisa van amiu, nevisave Visena Wa kiena ne Ntewa naða amloge ga na wa, kana visena la nene pimi pe lelaga nagane ga na wa, e maramiu.”*

**22** *Ana pogos naða yar la amloge visena la naða kiena ne Yesu, amloge sane naga pis ruru po na po, pis malumu ga a pis tanea þisa, ana la amilan paþisi, asuña apisavisa pan la sanini, asape “! Ana yar nene, naga narina ne Yosop ga nene! ? Naga þar visena tanea la ne sanene pe ne?”*

**23** *Ana Yesu pisatame la, pisape “Pona sine-miun asape avisa kieta visena marua nene van inu yo, naða pisape ‘Tokta, okila ruru ko sumo wa, ana siraunia okilia oiila yar taþena.’ Nanene*

komin naña amloge ñisi rui naña nesike gar Kapeneam, nekila ruru ke namaiena la moki, ana asitom asape komin ya ne pe nepim nekila re mña sanene pan amiu e kieta yo nini poli.

<sup>24</sup> Ana lelaga nevisa van amiu, sane visae navisawalena tai, ana kiena yeririna lala nae kemua kiena yo naña, la tañatete akekarania, tañatete alogearia.

<sup>25-26</sup> Nanene na lelaga. Sineun nesape asitomyuli pogos kiena ne yermarua Elaisa nanua sumo. E pogos nene, yua pe powo re poli pa tol kas telu komsusa, a pupia viso tai kalo make yo Israel. ?Ana Ntewa mligan Elaisa pa miila ane e poglis nene? Apisu ke ne, pe mligan re naga panon iila letano nae Israel lala tai naña amloge ke piowa poli, ana mligan naga pa miila letano nae pulkumali keviu nene Sarepat, nane lepas tañena naña Saeton.

<sup>27</sup> Ana asitomyuli mña ga pogos kiena ne yermarua Elisa. ?E pogos nene, yar la moki naña añar leperosi, ana Ntewa kila ruru ai? Naga pe kila ruru re le Israel lala tai naña añar maiena nene poli, ana kila ruru ga yere Seria nene naña Neman. Lelaga-o, ita yeririna la naña tepisa ke tesape ita nena naña tepe yeririna lala kiena ne Ntewa, ana yar la naña Ntewa mligan la apimin asape akila kieta yumaena, ana yepeta mavin la ke sina ga.”

<sup>28</sup> Ana pogos naña la nene asike loyuma nale-nena amloge visena nene, kiela sitomena la pilon pa pe tañena narui, nagane la sinela kar Yesu



narui.

<sup>29</sup> Ana la aplamoluen Yesu, aþurelua naga petan kiela pulkumali pa vanua, aþure pa e pupia yeparpas tai naþa kiela pulkumali mēke ea, la sinelan asape akuan Yesu vito tano e yo ne nanene narui.

<sup>30</sup> Ana Yesu kila naþa la taþatete si auarar naga, ana mial ga pa þaro likan la sanene pano, mligan la asike na.

*Yesu pa garu Kapeneam, pilelua yermare tai  
Mak 1:21-28*

<sup>31</sup> Ana Yesu mial pito tol pulkumali taþena nae Kalele, nane Kapeneam, ana e Legiena Wa naga pian la e kiela loyumuā na leniena.

<sup>32</sup> Ana la naþa amiyagogonia amilan paþisi, komin amloge kiena visena urmi paþisi, a namāraeraena kiena ne Ntewa sike ea.

<sup>33</sup> Ana pogos nene yar tai sike loyumuā amio la, naþa ninuna ne yermare viowa tai sumā kila kare naga, ana yar naþani pio manene kare Yesu paþisi, pisa pania, pisape

<sup>34</sup> “?Ei, Yesu nae Nasaret, kioṃā ya na teke e imimi? !Pona ko opimin osape okila kare imimi yo, a! Komin naþa in na nekilia ko rui, sane ko ope Yar Wa nena napo tai kiena ne Ntewa.”

<sup>35</sup> Ana Yesu pis māraera pa yermare viowa naþani, pialuþaria, pisape “!Ei, ve ovis re sina! Omolue ke vetan yar nene nagane.” Ana ninuna viowa naþani koven yar nene mloru pito tano likan la, ana molue petania pure pano, ana yar ne po sina ga sike na.

<sup>36</sup> Ana yar na yo la nene amilan pañisi, ana apisasayu Yesu, asape “?Ei, visen ya na sanene? Nanene yar m̄arera tai nene yo, kiena nam̄areraena keviu pañisi wa. Naga pis ga pa ninuna viowa lala, ana apureure ga sa nene.”

<sup>37</sup> Ana komin sur ne la nanene narui la akekara, a asum̄a apisa ruru kia kiena ne Yesu mlewo pa e yo punu ga e lepas nene.

*Yesu kila ruru auia simem kana Saemon Pita, amio m̄ena yar tañena la moki*

*Matiu 8:14-17; Mak 1:29-34*

<sup>38</sup> Ana Yesu sum̄alu pa vanua e yuñā nalenena nene, ana pa uñā m̄ana Saemon, nanene gar ke Kapeneam na wa. Ana e uñā nene auia simem kana Saemon mloru m̄eke e togin namaiena, yepena pisusun, ana apisawal pa Yesu, apiun pania asape sanape e sira marua nene.

<sup>39</sup> Ana Yesu pimi sum̄alu se yepas nen sira nañani, ana pisaluñar maiena nena, ana yepen pimi manin sina, mloge nena po, ana sum̄alu pa miyuñāen kala kinanena.

<sup>40</sup> Ana pogos naña mrae pito tano, sane Legiena Wa nene ñisi narui, la naña kiela namaiena la asikena, aņerela apim puna Yesu, ana Yesu pñarar la, kila ruru la.

<sup>41</sup> A la moki naña, yermare la amolue petan la, naña asum̄a akiikii, asape “!Ei, ko kemua naña ope Narina ne Ntewa narui!” Ana Yesu pisaluñar yermare la nañani, pisape ve avisa re si suri tai, komin naña akilia rui asape naga Navisaarena kemua lelaga.

*Yesu mlologo make ga e lepas lala nae Yutea  
Mak 1:35-39*

<sup>42</sup> Ana kolulag kona, Yesu suñalu naga taaga molue pa vanua, pa e yo mñano tai naña pa ruru po na po pañisi. Ana siraunia, yar la apiminia, akale mña pano-o añal e yo ne nanene, a la sinelan asape naga suña amio la, akilali asape avisaluñaria vena ve ligan la re,

<sup>43</sup> ana pisa pan la, pisape “Toko, in na monar neva nelologon Nalologena Wo na suñenena kiena ne Ntewa va e pulkumali tañena la naña asike ga wa, komin naga mligan inu nepimin suri ne nanene.”

<sup>44</sup> Ana naga petan la, pano mlologo teliv make e yumña nalenena lala e pulkumali punu ga nae lepas naña Yutea.

## 5

*La naña Yesu pio la ñesania, apa ataveve naga  
Matiu 4:18-22; Mak 1:16-20*

<sup>1</sup> Pogos tai, Yesu sike e yepas nen pupia lapa naña lañas asape Lapa nae Kenasaret, a lañas asape Lapa nae Kalele. A e pogos nene, yaru la naña asuñalu amiyervivi Yesu la moki pañisi, sane yepa ve tokaki ga, komin naña sinelan asape aloge naga lologon visena kiena ne Ntewa van la.

<sup>2</sup> Ana Yesu pisu waa lua naña sike ga lavisinia, naña añpure pimi sike ga e kukunone, a pisu kana yar ne la asuñalu asike e sive, asuña akevan ke kiela lilivi lala.

<sup>3</sup> Ana Yesu mial pano pa miai e waa tai nene, naña kiena ne Saemon, ana pisa pania pisape suponlua va li laa sane. Ana Yesu teke e waa nañani, tomña pian ke la naña asike ura.

<sup>4</sup> Ana pogos naña naga pis pan la pñisi, naga pisa pa Saemon, pisape “Ita, in na sineun nesape teva re laa e lowe memaena, vena toure re lilivi wa.”

<sup>5</sup> Ana Saemon pisatamña, pisape “E yerkawa, imimi mekila sur nene rui pano-o yemlagi, ana pe metol re nena ika tai poli. Ana komin naña opisa sanene pan inu, poga, nekekaran naña tevali ga.”

<sup>6</sup> Ana la apa akila sa naña Yesu pisa, ana la amilan pupia pegas nen ika tai pulen ga kiela lilivi nañani, kila kiela lilivi nene siar pororovia,

<sup>7</sup> ana la apio lañas naña asike e waa tañena, la akuñin limalan la vena aim aiila la. Ana la naña apim, ana asumña añere lilivi nañani amio kana ika ne lala apa metava e waa luwoka nene, pano-o waa luwoka ga nañani pulemamaga ruru nena ga, lavis luoka ga talilu.

<sup>8</sup> Ana Saemon pisu sur la nene, pisu kilale sane Yesu ga miyumñaen e kiena pupia namñareraena wa, ana kinai tano e mialana ne Yesu, pisape “Suñe, in na nepe yar viowa ga tai. Popon oure matan inu, ve osu re si lavisin inu.”

<sup>9</sup> A pe naga re ga taaga po, ana la mña naña asike amio e pogos nene, la punu ga amilan pñan wa e pupia pegas nen ika naña la añar ne,

<sup>10</sup> amio narina ne Sepeti lua nene, Semes lalua Yoane, naña asikol la amio Saemon amiyumñae lele taaga, la mñena luoka amilan pañisi.

Ana Yesu pis pa Saemon, pisape “Ei, ve oma-raun re si sur nene. Siar nagane, yoko ve oure re si ika, ana yoko osuñña oure yar la aimi ataveve inu.”

<sup>11</sup> Ana añasuñe la, añere si kiela waa la nañani apa ura, ana pe akila re si sur tañena poli, amligan kiela sur punu ga suñña sanene, ana ataveve Yesu apavini.

*Yesu kila ruru yaru tai naña ñar leperosi  
Matiu 8:1-4; Mak 1:44-45*

<sup>12</sup> Ana siraunia, e pogos tai, Yesu sike pulku-mali tai e yo nene, ana yar tai mñalia pimi puna, naña yaru nena, maiena naña leperosi kilapel naga kila kare nena tasnena. Ana yaru nañani pimi mloru e lana ne Yesu, tag pania, piun tania, pisape “Suñe! In na nemlelaga nesape ko okilia okila ruru in si wo ga, ana visae okekarania, in na sineun nesape neviun tan ko vena okila inu neikiki sina ga.”

<sup>13</sup> Ana Yesu pe maraun re tolen maiena kiena ne yar nene poli, ana puararia, pisa pania pisape “Ee, in na sineun nesape yepenña yania.” Ana veraga ga yepena miania, leperosi nañani ñisi e naga.

<sup>14</sup> Ana Yesu pisa pania, pisape “Omloge ke ne, ovano ve ovisayu re sur nene va yar lala wa, ana nanagane ova nena okom puna ne yar wa vena naga visu ko lia, a kilia visawal visave tasneña mian rui. Siraunia, ana monar ova okila lotena

va Ntewa a okila kuṗaṗaena na kiomña yepe ikikena nene, sa naṗa Mosis pisape monar akila.”

<sup>15</sup> Yesu pisape yar nene vano ve visayu re sur nene, ana peraga, pe piavi re poli asuña apisayu ña Yesu pano-o pa tol yo punu ga, kila sane pupia ṗina la apimin asape aloge kiena visena, ana la sinelan asape naga kila ruru kiela namaiena lala.

<sup>16</sup> Ana e pogos la punu nene Yesu suña petan ñena yeririna lala, pa ke e yokorena, mlen ke pa Ntewa.

*Yesu kilia viewo mlamulena viowa  
Matiu 9:1-8; Mak 2:1-12*

<sup>17</sup> Ana pogos sina tai, Yesu pian la ñaga, a Varasi laṗasa amio navianena navisaluaena lala atomaga tano e nene, naṗa la na pulkumali taṗena lala e lepas lala nae Kalele amio Yutea, a laṗasia amolue Yerusalem apimi. Ana e pogos nene, namareraena kiena ne Ntewa pimi keviu manene laa e Yesu narui, kila naga kila ruru namaiena lala.

<sup>18</sup> Ana yar laṗasia akus namaiena tai pimi, naṗa yepena la punu ga marmare, naṗa akus pimi ana mlor ga ñeke e ñana tog. La sinelan asape akus imi loyuña aligan mon lavisin Yesu,

<sup>19</sup> ana apisu sane pupia ṗina ñeke pa loyuña rui, ana yo ve tokak paṗisi, taṗatete akus kiela erau nene vano. Ana akus pa metava e wos nen yuña narui, akawepo lologia Yesu, ana amligan malumun yaru naṗa amio ñana tog pito tano e pulus naṗani, pito ñeke likan yeririna lala, ñeke nena ga vamon Yesu.

20 A pogos naþa Yesu pisu suri nene, naga kilia naþa la amlelaga m̃arera e naga paþisi, asape yoko naga iila namaiena nene, ana naga pisa pania, pisape “Mara, in na nepiewo kioma mlamulena viowa rui.”

21 Ana pogos naþa Varasi amio navianen navisaluaena lala amloge visena nene, asitom piowa e naga paþisi, ana asuþa apiuviunia, asape “?Ane þarnena kare ke kia wa kiena ne Ntewa sanene? Ntewa naga taaga kilia viewo mlamulena viowa, pe yar taþena re si poli, ana yaru nene pis ke sa naþa naga sitom ke sape naga Ntewa nene narui.”

22 Ana Yesu mninu kilale rui sape asitom ke piowa sanene e naga, ana pisa pan la, pisape “?Komin ya ne sinemi la pulen ke sitomena viowa la sanene?”

23 Visae nevisa ve sanini va namaiena nene, nevisave ‘In na nepiewo kioma mlamulena piowa,’ pona nevisa vania nevisave ‘Osuþalu, oyali,’ ana visena lua nene, tai m̃areran navisaena, a tai meme ga. Na naþa sape ‘Osuþalu, oyali,’ naga m̃arera laa sane, komin naþa yoko okilia ovisu kilale sane kiau visena pe lelaga pona peraga, naþa yar nene suþalu pona taþatete suþalu.

24 Ana nanagane þisi na nekila suri tai naþa asitom asape Ntewa ga naga taaga kilia kila, ana avisu kilale sane in na Narina ne Yeririna, nam̃areraena sike e inu. A nevisa van ami, nesape nam̃areraena nene torokin nekilia nevewo m̃ena mlamulena viowa e yomarava nini. Ayagogo ruruia.”

Ana Yesu pis pa namaiena naĵani, pisape “Nevisa van ko, nesape osuĵalu, ovilonar moĵa tog, oyali ova uĵa.”

<sup>25</sup> Ana sa nena nene, e marana ne la naĵa apisu ke ne, yar nene suĵalu, ĵar ĵana tog, mial pa vanua, naga pa uĵa naĵa suĵa miyeluarliluen Ntewa sanene pano.

<sup>26</sup> A pogos na la naĵani apisu suri nene, amilan kare nena lelaga, yepela ĵil paĵisi, asuĵa amiyeluar Ntewa, asape “E suwala, lelaga kemua-o, ĵane na ita tepisu sur tai naĵa pe taĵena paĵisi!”

*Yesu pio Matiu, naĵa apio ĵena Livae, pimi tavevea*

*Matiu 9:9-13; Mak 2:13-17*

<sup>27</sup> Ana siraunia, Yesu mialili ga pa laa sane, ana ĵal yar tai totano teke e kiena yuĵaena e yuĵa na warpoloen takis. Yaru nena, kiena kia Livae. Ana Yesu pio, sape “Oim otaveve inu.”

<sup>28</sup> Ana Livae suĵalu nena ga, mligan kiena yuĵaena, mligan kiena suri punu ga sike na, ana taveve Yesu.

<sup>29</sup> Siraunia, Livae nena kila pupia kinanena tai kana ne Yesu e ĵana uĵa, a e pogos nene, yar na takis taĵena la moki, amio ĵena yar taĵena la moki na sanene, la ĵena apim ato lele taaga amio Yesu amio kiena nalogena lala e kinanena naĵani.

<sup>30</sup> Ana Varasi laĵasia, amio kiela navianen navisaluaena laĵasia, apragogo pa nalogena lala,



asape “?Komin ya ne akinan ke lele taaga sanene amio yaru viowa lala a ãarmãrera la nene?”

<sup>31</sup> Ana Yesu ke pisatañe la narui, pisape “La naña tasnela ñarera ruru poga ga, la pe asitom re asape ava akom pun yar na kilaruruen maiena poli, ana la ga naña añar maiena, la sinelan pañisi.

<sup>32</sup> In na pe nepimin re nevio yar la naña apisa ke asape la apo rui e marana ne Ntewa vena ataveve inu, ana in na nepimin ke yeririna viowa la ne sanene narui, vena avilopu la vetan kiela mlamulena viowa lala.”

*Naviunena tai e lepas na monsilena*

*Matiu 9:14-17; Mak 2:18-22*

<sup>33</sup> Ana la apiun naviunena tai pa Yesu, asape “Nalogena kiena ne Yoane Nakeena la asumã apuarar ruru ke ãelaga nene naña yam mokliu, asumã amonsilu ga vena alen va Ntewa, a Varasi ñena la akila sa ke ga. ?Ana komin ya ne kioña nalogena la pe akila re poli, ana la asumã akinana a asumã amun ga sanene?”

<sup>34</sup> Ana Yesu pisatañe la, pisayu naga amio kiena nalogena lala, sane la akekara pañisi pogos naña naga sike amio la, ana yoko sinela viowa sirau e pogos naña naga ure matan la. Ana pisape “?Pogos naña yar natalopaena sike amio kiena erau lala wa, asitom asape yoko akilia aligan kinanena na ãaãagena nene sike na, ve akan re? Peraga.

<sup>35</sup> Ana yoko pogos tai imi, naña yoko aurelua yar natalopaena nene vetan kiena erau lala, a e

pogos nene narui akilia amonsilu, komin naña sinela miye naga pañisi.”

*Sur marua amio sur vii*

<sup>36</sup> Pelaga na monsilena nene, naga ðelaga marua tai nalotena kiena ne le Yu lala, ana Yesu sinenan sape kila meraravan sane ðelaga marua na sanene, tañatete asikol amio suri vii la naña naga pian la ke ea, ana pisa ðakaiwa tai e lepas nene pan la. Pisape “Tañatete ola kinakinas nen kulmrae vii tai, naña ovitolpa kinakinas tai, ana osuluar e kulmrae marua vena kilawo pulus naña teke ea. Visae sanene, yoko opitol pa kare kulmrae vii nene narui, ana kana kinakinas, yoko tañatete nena marana ve sa ke kulmrae marua nene, ana apisu piowa ga.

<sup>37</sup> A tañatete okokonia kuruta vii naña ñe ke peñela ke ga wa va e kulus nen nane tai naña pe urmarua, naña akon kuruta pa e yam moki li rui. Visae okila sanene, yoko kuruta vii nene lapa, kila kulus nen nane nañani ñapo, ana kuruta nene lau kare ga ne, ana kana pias ñena imi viowa nena ga.

<sup>38</sup> Ana kuruta vii, monar okokonia va e kulus nen nane naña naga ñena pe urvii, naga ñarera ruru po, a okilia oligan ruru moma kuruta mona ea.

<sup>39</sup> A pogos ñena naña yar la amun kuruta naña amiyuñen towe laa nanua rui, yoko ve sinelan re si munen kuruta vii, naña amiyuñen mare ga na wa, ana yoko monar avisave kuruta marua naga kiki laa sane.”

## 6

### *Yesu pe suḡen Legiena Wa Matiu 12:1-8; Mak 2:23-28*

<sup>1</sup> Ana e sina ga e legiena tai, naḡa pe Legiena Wa, Yesu amio kiena nalogena lala amiyaloro apano, a kiela mrapa pa ḡaro e lokove na kona lala. La amiyal m̃a sanene, ana nalogena lala viso kar la ana akawe plan kona laḡas naḡani, apae vania, akania.

<sup>2</sup> La akila ke sanene, ana Varasi laḡas asum̃a e naḡani, apisu ke Yesu lala, ana apisa pania, apisape “Ei, komin ya ne asum̃a akila ke yuḡaena nene e Legiena Wa sanene? Visae sanene, asum̃a akilaro ke kieta navisaluaena ne.”

<sup>3</sup> Ana Yesu pisataḡe la, pisape “?Pona pe apuloli re Visena Wa pog tai poli yo wa, e sur la naḡa Ḣarin Suḡe Tepet nanua naga kila? !Kam na akilia pa rui! Naga amio kiena yeririna lala la viso kar la manenea,

<sup>4</sup> ana naga pa loyuḡa e yuḡa wa m̃ana Ntewa, a naga mla kilaparavi wa naḡa Navisaluaena sape yar wa ga la akilia akania, ana Tepet amio kiena yeririna la akania.”

<sup>5</sup> Ana Yesu pisa pan la, pisape “Inu Narina ne Yeririna, inu ke narui nepe suḡen Legiena Wa, ana inu ga nekilia nevisa ya naḡa popon akila e Legiena Wa, pona ya naḡa pe pon re akila poli.”

### *Yesu kila ruru limaulu tai e Legiena Wa Matiu 12:9-14; Mak 3:1-6*

<sup>6</sup> A e si e Legiena Wa tai, Yesu pa si loyuḡa e yuḡa na leniena, pian la. Ana poglis nene

yar m̃ena tai sike loyũña nañani, limana marua pulu.

<sup>7</sup> Ana navianen navisaluaena lala, amio Varasi lala, naña la sinela kar Yesu rui, asike ga lavisinia e poglis nene, asumã apisuar ruruia p̃isa, vena asape alual li p̃elaga viowa lañasa e naga, ana la sinelan asape avisu sane yoko Yesu kila ruru limaulu nañani e kiela Legiena Wa nene pona yoko ve kila re.

<sup>8</sup> Ana Yesu kilia ruru make ya naña sike e kiela sitomena, ana pis pa yar nañani, sape “Osumãlu, ovam osu metava e nini sumo wa,” ana naga sumãlu pavini.

<sup>9</sup> Ana Yesu piun tan la naña asike e ne, pisape “?Kieta Navisaluaena sape tekilia tekila ya ne e Legiena Wa? ?Pisape popon tekila sur wo pona popon tekila sur viowa? ?Pona pisape popon tetamalia yaru, pona popon towem̃ar yaru?”

<sup>10</sup> Ana Yesu pisuveve la make ga, ana pis sina pa yaru nañani, pisape “Lumom̃a visilia!” A e ga e pogos naña yar nene kila sanene, limana nañani pimi po nenaga.

<sup>11</sup> Ana le Varasi lala sinela mimi, naña sane amloge mlae pañisi, ana apa vanua apisayu weleli sane yoko akila ve sanape na va Yesu.

*Yesu mliganar kiena nalogena la lualima taaga pa lua*

*Matiu 10:1-4; Mak 3:13-19*

<sup>12</sup> Ana siraunia, e sina e pogos tai, Yesu pa metava e pupia tavie tai vena naga se ea, len va Ntewa, ana sumã kila ke sanene e yo nañani pa tol yemlagi.

<sup>13</sup> Ana kolulag na pitomi pio kiena nalogena lala apimi lele taaga puna, ana e la nene, naga pisawal la lualima taaga pa lua naña naga mliganar la pisape la narui, la ape nalologena.

<sup>14</sup> Ana kia kiena ne la lualima taaga pa lua nanini:

Saemon, naña Yesu mligan kiena kia tañena,  
sape Pita,

a wenla naña Antru,

a Semes, a wenla naña Yoane,

a Pilip,

a Patalomiu,

<sup>15</sup> a Matiu,

a Tomñas,

a Semes, naña narina ne Alpeas,

a Saemon, naña sape mñene plan le Rom lala,

a Sutas, naña narina ne Semes,

<sup>16</sup> a Sutas nae Kariot, naña siraunia naga kom varaun Yesu.

*Yesu suña mlologo a kila ruru namaiena lala  
Matiu 5:1-12*

<sup>17</sup> Ana Yesu ñere nalologena la nene apitom si tano, ana añal yotop tai, apa asike ea. A poglis nene, nalogena kiena ne Yesu tañena lala apule ga asike ea, amio mña pupia ñina lala na pulkumali tañena lala nae Yutea, a le Yerusalem mña lala, amio le Taea a le Saeton lala, naña amolue e kiela yo lala garo losi lavisin sive apami.

<sup>18</sup> La nene apamin asape aloge visena lala kiena ne Yesu, a la sinelan asape kila ruru kiela maiena lala. Ana Yesu kila mña sanene pan la

pano-o, naga kila ruru m̃ena la naña yermare lala asum̃a akila kare la ke silaga.

19 Yaru la moki manene paṽisi, ana la punu ga sinelan asape atol ga Yesu, vena la aninuli ga pupia nam̃areraena naña apisu sane sum̃a m̃alivi ke ea, naña sum̃a kila ruru ke yar la moki rui.

*Navianena lala kiena ne Yesu*

20 Ana Yesu kira pisu kiena na-logena la nene, ana pian la, pisape:

“Kam naña apisu kilale sane limamiu koren ga, navisa ruruena sike e amiu, komin amiu ke narui naña Ntewa naga pe ṽarin suṽen amiu, ana visuar amiu.

21 Kam naña viso kar amiu ke nagane, navisa ruruena sike e amiu, yoko aloge sane aim aulemaamaga nena ga e suri wo ne lala.

Kam naña atagi ke nagane, navisa ruruena sike e amiu, yoko akilia akekara.

22 Kam naña yar la pe akekaran amiu re poli, a naña asum̃a yepel mavin amiu, a naña asum̃a apisa kare amiu, a asum̃a akoven plan ke kiamiu kia lala sane kam na ape yar viowa ga lala, nanene komin naña kam na ape yar kiena ne inu Narina ne Yeririna, navisa ruruena sike e amiu.

23 E pogos la ne sanene, ve asitom manene re, aulaula ga warar pupia kekarena, komin naña asum̃a akila kare amiu ke ga e ṽelaga m̃a nena naña repila lala akila pa navisawalena la nanua sumo. Ana pogaga,

yoko awar kiamiu pupia nalaena ma e peni.

24 Ana kam la naþa ape nasur moki manenea, yoko viowa manene laa van amiu, komin naþa aþar kiamiu nalogewoena a kiamiu nakekarena lala e kiamiu malena wo la na yomarava nini rui.

25 A kam la naþa mēþemiu pulemamaga ruru pa sike rui, yoko viowa van amiu vaþisi, komin naþa yoko viso kar amiu manene va laa sane.

A kam naþa apitale ke nanagane rui, yoko viowa van amiu vaþisi, komin þisi na aloge viowa, atagi.

26 “A monar avisuar ruru amiu pogos naþa yar la asumã amieluar ke kiamiu kia. Visae ve sanene, pe pon re amiu mēna asitom ke asape amiu na apo, komin naþa navisawalena navisokanena la nanua sumo, kieta yermarua la amiyeluar kiela kia la sanene, ana Ntewa pisu la sane la apiowa ga ana mla nakoena pan la.”

*Yesu pisayu sinesien manene nasinekar lala  
Matiu 5:38-48, 7:1-5*

27 Ana Yesu pisape “Kam la naþa amloge kilale ke kiau visena nene, in na nevisa van amiu, nevisave: Monar sineta si kieta nasinekar lala, a monar tekila wo van la naþa pe asitom ita re poli,

28 a monar tevisa ruru la naþa apiuelin ita, a monar telenwo la naþa akila kare ita.

29 Visae yar tai lipa pipimã lepas tai, ko monar ovilopu mēna pipimã lepas þasia vania vena lipa,

a visae yar tai m̃areran van ko vena war mom̃a kulsaket, yoko monar okekaran ga war m̃ena mom̃a kulsota.

<sup>30</sup> Visae yar tai viun kioṃa sur tai, monar ola vania, a visae yar tai lalua kioṃa suri tai, yoko ve ova oviun re si tania vena lamaran si van ko.

<sup>31</sup> Pelaga ya naṓa sinoṃan vena yar la akila van ko, ṓelaga ne nanene yoko monar okila van la.

<sup>32</sup> “Visae tesuṃa sineta si ga yaru la naṓa asitom ita, nanene na pe sur re tai nene po laa wa, komin yar nakilaen mlamulena viowa lala asitom ke la naṓa asitom la rui.

<sup>33</sup> Pona visae tekila ga wo van la naṓa akila ke po pan ita rui, naga m̃ena pe sur re tai nene poli, komin yar nakilaen mlamulena lala, la m̃ena akila ke sanene rui.

<sup>34</sup> Pona visae tetam̃an ga kilavaru va la naṓa akilia alamaran sina, naga m̃ena ga pe pe sur re tai nene po laa wa, komin yar nakilaen mlamulena la akila ke yuṃaena nene silaga.

<sup>35</sup> “Ana in na nevisa van amiu, nevisave: Sineṃa si kioṃa nasinekar, a okila wo vania, a otam̃an ga kioṃa kilavaru sa ga ne, naṓa ve ositom manene re van naṓa omla pania, ovisave pona kilia lamaran si pogos tai, pona taṓatete si lamarana. Visae osuṃa okila ke sanene, osuṃa okus ke ṓelaga kiena ne Arimata Yaru na Meta ne, a naga yoko la nalaena tai van ko ve keviu laa sane, komin naṓa naga yar sur naṓa sinen po pan la naṓa pe apisa re potena pan poli, pona la naṓa asitom la ke sina.



<sup>36</sup> Sanene, ko na monar sinemña ye yar lala sa naña Arimata naga sinena miye la.”

*Yesu pisayu naliņereen yar taņena*

*Matiu 7:1-5*

<sup>37</sup> Ana Yesu pis ke pan la na wa, pisape “Yoko ve aliņere manene re yar taņena pona ala nakoarena vania. Visae sanene, yoko Ntewa taņatete liņere manene amiu, taņatete la nakoarena van amiu. Visae aviewo yar taņena, yoko Ntewa viewo amiu,

<sup>38</sup> a visae ala sur va yaru taņena, yoko Ntewa la sur imi van amiu. A yoko Ntewa laa van amiu ve keviu la sane taulu naña amlavia, yoko naga war ve moki vaņisi, sa naña akokonia karo, atanaria, yoko amiyalar mēna ga, pano-o pulemamaga ruru nenaga, suri laņas kekapil pito ke tano. Lelaga paņisi, yokorena awar imi pun amiu maran ve taaga sa ke ga naña aņarwar ke pan yar taņena.”

*Monar avisuar ruru kiamiu malena*

<sup>39</sup> Ana Yesu pis ke pan la na wa, pisa ļakaiwa tai pan la, pisape “?Sanape, visae kilamara ļala tai sumña ga, ana naga kilia sumon kilamara ļala taņena tai lalua ayalļel woga ga? !Peraga, yoko la ga luwoka aloru ato e ļiliļili tai ne!

<sup>40</sup> Nalogenena naga pe pa manene re metavan yar naña pian ke naga poli, ana visae naga kilia ruru make sur la naña navianena piania, yoko naga imi maran ve taaga sa ke ga kiena navianena.

<sup>41</sup> Pe pon re osuũa ovisavisa ke narin kororaki tai naũa teke e kilamarana ne womla poli, ana pe opisu kilale re osape pupia purpes nen laki tai mẽke e kilamaraũa poli.

<sup>42</sup> “?Sanape na osape ovisa va womla nene, ovisave ‘Wolai, yoko nowarlua kone kororaki na kilamaraũa wa’? Sanene ko na pe opisu kilale re kioũa mlamulena viowa poli, a osuũa omliũpere ke ga mlamulena viowa kien yar taũaena lala. Okiliaũa naũa ko opiowa ga, ana osape okila sane yar la asape ko opo rui. Okus lua pupia miasin laki na mẽke e kilamaraũa sumo wa, pũsi na okilia ovisuveve narin kinakinas nen kororaki naũa teke e kilamaran yar taũaena nene.”

*Purlaki amio mrasa*

*Matiu 7:16-20, 12:33-35*

<sup>43</sup> Ana Yesu pisa mẽena ga, pisape “Purlaki naũa po taũatete war mras naũa piowa, a purlaki naũa piowa taũatete war mras naũa po.

<sup>44</sup> Ee, sanene narui, naũa tevisu kilale purlaki, tesape sanape e ga e mrasnela. Mralaki la naũa mam ruru po, pe toũaar re e vilumũini la naũa pe nenos poli, peraga.

<sup>45</sup> Yaru naũa po naga miyuwon ruru suri wo la sike e losinena, ana silaga kiena sitomena wo suũa ga naũa kilia visaplania, ana yaru viowa naga suũa pũarpolo ke suri viowa e losinena, ana naga visa plan ga sitomena viowa lala. Suri ya naũa pule sike e los nen yaru pona e kiena sitomena, sur ne na nene narui yoko suũa molmolue luen ga e gona.”

*Yumã lua  
Matiu 7:24-27*

<sup>46</sup> Ana Yesu pisape “?Komin ya ne apio in ke asape ‘Suþe o, Suþe o,’ ana siraunia pe asumã amlogear re ya naþa nepisa pan amiu nesape akila poli?

<sup>47</sup> Yar naþa pimi pun inu, mloge kiau visena, naga monar logearia a monar kila. Yar naþa kila sanene naga sa naþa suniena tai pisayuia, naþa pisa sanini:

<sup>48</sup> Yar tai sumã kila ke mãana yumã, a yaru nene pe manmarua ruru po, kil þiliþili la pito manene tano vena tol yo m̃arera tano, ana maplar kemraþe lala e pulus la naþani. Ana pogos na pog m̃arera, pupia womie lau, ana taþatete nena kila yumã nene kulul, komin naþa yar na kila, kila ruru m̃arera po.

<sup>49</sup> Ana yar naþa mloge kiau visen lala, ana pe mlogear re poli, naga sane yar taþena tai. Yar nena, naga m̃ena miyumãen m̃ana yumã tai, ana naga pe wowe ga, miyumãen m̃ana yumã sumãl yau ga e porotano, kana kemraþe ne la pe pito manene re nena tano poli. Ana pogos naþa pog m̃arera, pupia womie mlau pitomi, kil lua yumã naþa, kilalua mloru, ana yumã naþa pororovia, piowa make nenaga.”

## 7

*Yer kawa na mara nae Rom tai mlelaga m̃arera  
e Yesu  
Matiu 8:5-13*

<sup>1</sup> Ana pogos naña Yesu pisa plan kiena navianena la nañani pñisi, naga pa loyumña e pulkumali nae Kapeneam.

<sup>2</sup> Ana e yo nene, nasumonen li na mara nae Rom tai sike ea, ana naga kiena yar wo na yumñaena tai naga mai pañisi, lavis ga kovio.

<sup>3</sup> Ana pogos naña mloge yar la apisayu ke Yesu, asape pimi ke lavisin kiela yo rui, ana pio nasumonena kiena ne le Yu lala, pitetalia la apanon Yesu, vena aviun tania imi kila ruru namaiena nene.

<sup>4</sup> Ana la nañani apim puna Yesu, apisayu namaiena naña pania, ana apiun manene tan sanini, asape “Nasumonen li na mara la nene, popon sa oimi oiila naga.

<sup>5</sup> Lelaga naña sane naga pe ita re tai nene poli, naga pe yere Rom ga, ana naga pe yar tai naña sitom manene kieta pegas nen yeririna la pañisi, ana naga mña miila imimi e yo nini keviu pañisi rui, naña miyumñaen kiamimi yumña na leniena. Ana visae ko okekarania, oim ovisu kiena yaru nene naña mai pañisi.”

<sup>6</sup> Ana Yesu tañania, ana pa amio la. La amial apano, ana pogos naña asike towe laa perinan yumña mña nasumonen li na mara nena wa, apisu yaru lañasa amiyal ke apimi. La nene, erau kiena ne nasumonena si lañasa, naña naga pitetalia la si apim puna Yesu, vena avisa kiena visena tai vania. Ana la apim apisawal pa Yesu, apisape “Yere Rom nañani mligan imimi mepim si pumña, pisa sanini, pisape naga sumña kila kare ko pañisi. Naga pisape naga pisu sa naña naga

pe yaru tai naña pe torokin re oim mña loyuma poli.

<sup>7</sup> A sitomena nene kila naga pisa sane pe pon re mña naga imi kate puma poli, komin naga pe pe yere Yu re sane ko poli, ana naga pisa ga pisape, visae ovisa ga visena tai, yoko kiena yaru nene loge wo woga ne.

<sup>8</sup> Naga kilia sape monar ve sanene komin naga kilia sape kioña visena naga namareraena sike ea. Naga sape suri nene naga sane li na mara la naña asike vatanonia, naña la monar alogear kiena visena. Visae visa van tai, visave 'Ovano,' naga monar vano, pona visae visave 'Oimi,' naga monar imi, pona visae visave 'Okila sanene,' yoko naga monar kila. A naga mña sape monar kila ya naña pupia yerka wa nasumonen li na mara la pisa pania. Naga sape naga sitom sanene narui, visae ovisa ga sur tai, ana monar ve sanene."

<sup>9</sup> Pogos naña Yesu mloge visena nene, naga milan sitomen kiena ne nasumonen li na mara la nene pañisi, a kekaran pañisi, ana pis pa pina la naña asike amio e poglis nene, sape "Nevisa van amiu, nevisave pe nomal re nena yere Yu tai naña sumal marera se e in sane yar nene poli."

<sup>10</sup> Ana siraunia, la nene añasuñela si apa mña nasumonen li na mara la nañani, ana la amilan naña apisu namaiena nene pimi po si rui.

*Yesu kila si mñee kiena letano tai mal si petan marena*

<sup>11</sup> Ana siraunia, pe yam piavi re poli, Yesu mial pa tol pulkumali tañena tai, kiena kia Naeni, a

sa naña silaga, kiena nalogena lala amio yaru taņena la moki asumņa ataveve ke naga.

<sup>12</sup> Ana pogos naña Yesu lala apim ke lavisin pupia mralaea na pulkumali nene, apisu sane yar la amiyalvai apim, asumņa akus ke yar mare tai pano vena ava asinia. Naga naña mare ne, naga mņee tai naña anena pe letano. Letano nene, naga pe p̄ar re si narina tai poli, naga p̄ar nena taaga ne nane mare narui.

<sup>13</sup> Ana Yesu la asumņa apisu ke la naña amial apim, ana pogos naña kieta Suņe pisu letano nene, naga sinen mie pano-o p̄isa. Ana pa lavisinia, pisa pania, sape “E, tagen toko.”

<sup>14</sup> Ana Yesu pimi lavisin marena nene, mligan limana tea, a la naña akus pa ke ne asumņalar la asu, pe amiyal re si poli. Ana naga pis pa yar mare naņani, pisape “E, nevisa van ko, osuņalu si na wa.”

<sup>15</sup> Ana mņee nene suņalu, suņa pivis pan la, apikevike van sina, ana Yesu sumon naga pano, mligan si pa anena.

<sup>16</sup> Ana pogos naña yar la apisu sur nene, sinela kurkur paņisi, a asumņa amieluar Ntewa, asape “!Ake, suwala! Pupia navisawalena kiena ne Ntewa suņalu nena sike likan ita rui.” A laņas apisa mņena, asape “!Lelaga p̄a! Ntewa pimi katen kiena yeririna la rui.”

<sup>17</sup> A suniena na suri nene, asumņa apisalelein pano, pano-o tol lepas naña Yutea, amio yo taņena la naña asike lavisinia.

*Yoane Nakeena pitetalia kiena nalogena lala*

*apim pu Yesu**Matiu 11:2-19*

<sup>18</sup> Ana e pogos nene, Yoane Nakeena sike e yumã nakoena rui, ana kiena nalogena la apim apisayu pania e sur la punu ga naña Yesu sumã kila.

<sup>19</sup> Ana Yoane pis ga pan lala lua, pitetalia la apa puna kieta Suþe, vena ava aviun ruru tania, avisave naga Navisaarena naña asuñate ke ne, pona pe naga re poli.

<sup>20</sup> Ana la amial apim apisu Yesu, apiun sanini pania, asape “?Kiamimi yerkaawa naña Yoane sinenan sape kilia sanape? ?Ko na yar sur naña apisa nanua sumo asape yoko yerkaawa tai imi ve kieta nasumon itaena, pona pe ko re na nene poli wa, a monar mesuñate ke yar nene yoko imi na wa?”

<sup>21</sup> Ana e nena e pogos naña apim apiun naviunena nene, Yesu sumã kila ruru ke maiena lala a sumã pile plan ke yermare petan yeririna lala, a sumã kila ke kilamara ðala lala, kilamarala la pimi po sina, ana nalogena kiena ne Yoane la apisu sur la nene.

<sup>22</sup> Ana Yesu pisatañe la, pisape “Awasuþe amiu si ava puna Yoane, ana avisawal sur ya naña apisuia pona amloge e nini. Suri la nene asa ga naña navisawalena Aisea pisa pan amiu rui, naña sape:

‘Kilamaraðala lala, nanagane apisu si suri rui,  
a laulu lala nanagane amial ruru si rui,  
a yaru la naña aþar leperosi, nanagane tasnela  
la mekik ruru si rui,  
a kiligapoþe lala, nanagane amloge si suri narui,

a yar mare lala, nanagane amal si rui,  
a la naña limala korena, nepisawal Lologena Wo  
pan la rui.'

<sup>23</sup> Ana ava avisawal m̃ena va Yoane, avisave  
'Yaru naña pe sinen peve lua re e inu pog tai  
poli, navisa ruruena sike e naga.' "

### *Yesu pisayu Yoane Nakeena*

<sup>24</sup> Ana pogos naña nalogena kiena Yoane la  
amolue sina vena awasuñe avano, Yesu pisayu  
Yoane nene pa yeririna la naña asike ne, sape " ?  
Pogos naña apa ñesan e yokorena nene, apanon  
asape avisu ya ne? !In na pe nesitom re nesape  
apanon ga avisu kana kiai ne la poli, naña sisilin  
kare ke ga sanene.

<sup>25</sup> A in na pe nesitom re m̃ena nesape apa apisu  
yerkawa tai naña miyen m̃ana kulsota nowo la  
poli, po sike e malena naapo, komin yaru sur la  
ne sanene, la pe asusu re e yo viowa la ne sane  
yomema nene poli, ana la asike ga e yuñã naapo  
m̃ana ñarin suñe keviu lala.

<sup>26</sup> Peraga, ana in na nesitom nesape apanon  
apisu navisawalena tai, ne? Nanene naapo  
ne, ana nevisa van amiu, Yoane naña apanon  
apisuia, naga pa laa sane, naga taulu navi-  
sawalena nasumo lala,

<sup>27</sup> komin naña Ntewa pisayu naga e kiena  
visena wa rui, sape

*'In na nemligan ñesan kiau yaru na waren visena  
nene pitomi pun ko, vena kila ruru kioñã  
mrapa.'*

*Mal 3:1*

<sup>28</sup> "Lelaga nevisa van amiu, sane e yomarava  
nini Yoane Nakeena nene naga mon metavan



make yar la punu ga. Ana la punu naña yoko aim e nasuņenena kiena ne Ntewa, vito tol kiela yar maro naña sike laa tano, la punu nene la asike metavan Yoane, naña yoko la awar navisa ruruena kiena ne Ntewa va laa sane taulu naga.”

<sup>29</sup> Ana pogos naña apa amiyagogon Yoane Nakeena mlologo, naga pisawal mrapa kiena ne Ntewa vena la akilia avilopu la. Ana yar viowa la moki, pa tol mña yaru na takis lala, apisu sane mrapa nene pe lelaga, ana apilon la, ana Yoane kee la e wii.

<sup>30</sup> Ana yar taņena lala, sa naña Varasi lala amio navianen navisaluaena lala, la apilopu mñasila e mrapa naña Ntewa kila vena akilia avilon la ea, ana Yoane pe kee la re poli.

*Yesu pis mñarera pa yeririna la e kiena pogosia*

<sup>31</sup> Ana Yesu pis mñarera pa yar na vilaveena lala e poglis nene, pisape “?Yoko nevisa visena ya naña kilia tol ųelaga ken la na nagane, sane la ape yar ya?

<sup>32-34</sup> E lepas punu ga naña Ntewa kila vena kilali wo van amiu, ana yepemiu mavin ga, apisa kare ga naga vanonia. Komin poglis naña Yoane pimi, naga suña monsilun kinanena vena len, a naga mlon kuruta namunena, ana yaru la apisu sanene, asuña apisayuia, asape ‘Yaru nene, yermare sike e naga.’

“Ana pogos naña inu Narina ne Yeririna nepim nesike na, nekinan ruru ga a nomun ruru ga, ana apisayu si inu ųisa, apisape ‘Apisu ke ne, yaru nene naga kinan merorol paņisi wa, naga pe yar

na mun maneneen m̃ena kuruta, a naga kiena erau lala, yar na warpoloen ga takis, a yar viowa ga lala.'

"Komin sur ne nanene nepisu yeririna na nagane lala asa ga ninis la naṣa visae asum̃a akila kokan ke e yepesinas na kumali, yoko la aviovio kiela narin erau lala, avisave '!Ei, kam na apilon manene visena na! Visae mowe ke plaṣe, ana pe sinemiun re wolen amio imimi poli, pona visae meyaun ke yauena na marena, ana pe sinemiun re atagipae amio imimi poli.'

<sup>35</sup> "Sur ne na nene, yeririna la yepela mavin mrapa lala kiena ne Ntewa, ana mras wo naṣa molue e malena kiena yaru naṣa taveve ke mrapa kiena ne Ntewa, kilologia sane mrapa ne nanene narui, naga pe mrapa na manmaruaena naṣa lelaga."

*Sira tai mloge kemua piowa lelaga e kiena mlamulena viowa lala*

<sup>36</sup> Ana Varasi tai, kiena kia Saemon, naga sape sinenan kila kinanena tai ve kana Yesu, ana Yesu pa m̃ana, pa totano vena akinana.

<sup>37</sup> Ana e pulkumali nena, sira tai sike ea, naṣa naga kila ṣelaga viowa la moki paṣisi, ana naga mloge naṣa Yesu pa kinan ke m̃ana Varasi naṣa Saemon ne. Ana sira naṣa pisu kiena mlamulena viowa, mloge piowa manene laa, ana mloge sane monar imi visu Yesu, ana kus kiena piawi tanea tai na ponotaninu, kus pimi e yum̃a naṣani.

38 Ana Yesu pelein ke sape kinana, ana sira nene pimi suñal su varaun lana, naña wamarana mlau, kekapil pito ke e lana ne Yesu. Wamarana kee ke lana sanene, ana tar viluna la naña piayavi ne, suña miyumuvan ke lana Yesu, a naga pelan pipina kompaña te lana ne Yesu, a yokorena taron ponotaninu nañani ea.

39 Ana Varasi naña ñere Yesu pimi ñana, naga pisu ke sur nene, ana sitom piowa towe ga ea. Naga sitom ke sanini, sape “Visae Yesu nene naga pe navisawalena tai naña lelaga, pona vera na kilia ruru yo rui sane sira nene naga pe sira na mlamulena viowa na sanene, ana yoko ve tañan re tol lana wa nene. Ana naga tañan kila sanene, in na nemninue kare narui.”

40 Ana Yesu na kilia ña kiena sitomena nene, ana pisatañea, sape “Saemon, in na nesape nevisa visena tai van ko sumo wa.”

Ana tañania sape “Pogaga, Navianena. Okilia ovisa.”

41 Ana Yesu pisatañe sanini pania, sape “Yerkawa tai, ana yar lua akila lapui pania. Llua nene, tai na kiena lapui keviu, kompaña naga kiena lapui keviu manene laa pañisi.

42 Ana pogos na ulmaranen lapui la nene, la ga luwoka apulmaran ñele ga, ana yerkawa nañani sinen mie la, ana piowo make kiela lapui la nene pan la. ?Ana komin sur ne nanene, llua nene ane sitom manene yerkawa nene?”

43 Ana Saemon pisatañe Yesu, pisape “Nemninue ga, pona naña kiena lapui keviu manenea naga monar sitom va laa sane yo.”

44 Ana Yesu pisape “Ee, sa ke nene narui.” Ana Yesu þarpuia kilologia sira naþani pa Saemon, sape “Saemon, pogos naþa nepim moþa, pe noþal re yar tai þar wii pimi pan inu poli vena nekevan kororak na mraplepa e lau, sane e kieta þelaga na, monar okila. Ana opisu ke sira nini, naga ke naþa kevan lau e wamarana narui, a miyumuvan si mema e viluna.

45 In na nepim moþa loyuma, ko na pe otalopan ruru in re poli, sane nepe kioþa erau wo tai, ana siar e pogos naþa nepim loyuma, naga mligan pipina lepas þasia te lau silaga.

46 Ko na pe oþar re ponotaninu pimi otaron pito e þaruu po, ana naga kila e lau rui.

47 Ana nevisa ruru van ko, nevisave sira nene, kiena mlamulena viowa moki paþisi, ana nepiewo make ga rui, kila narui naga sinena sii inu keviu paþisi. Ana nepisu yaru naþa kiena mlamulena viowa pe keviu re poli, nepiewoia, ana naga pe sinen sii manene inu re poli.”

48 Ana Yesu pisa ruru mþena pa sira naþani, pisa pania, sape “Kioþa mlamulena viowa la naþa ositom þele ke ne, nepiewo make rui.”

49 Ana pogos naþa Yesu suma pisa ke visena nene, yaru taþena la naþa akinan ke amio la e pogos nene pe akekara re nena poli, asuma apragogo pan la, apisa ke asape “?Ana yaru nene sinenan sape naga ve ai, naþa naga pisa ke sape naga þar plan ke mlamulena viowa kien yar la sanene?”

50 Ana Yesu pisa si pa sira nene yam tai, pisape “Kioþa naviawaena kila otol natamaliaena rui.

Ve ologe re si viowa, okilia ova narui, a suñare kiena ne Ntewa sike amio ko.”

## 8

### *Sira la moki naña ataveve Yesu*

<sup>1</sup> Ana pe yam piavi re poli, Yesu mial sina pano, pa kome pulkumali lala, la naña ve torokak amio la naña kerkeviu, a e yo punu ga naga suña mlologo, a suña mla lologena wo nasuñenena kiena ne Ntewa pimi pa yeririna lala. Ana sane silaga, kiena nalualima taaga pa lua la mña asike amio e pogos nene,

<sup>2</sup> a sira la moki li mña naña la asuña atavevela. E sira la nene, lañasia naña Yesu taña ruru la petan ninuna viowa lala a e inanena viowa la naña se e la, sa naña Maria nae Maktala, naña sumo yermare la olua ase e naga,

<sup>3</sup> amio Soana, naña naga wona ne yar naña Kusa, naña naga pe yerkawa na kilaen yuñaena kiena ne Parin Suñe Erot, a amio mña Susana nene. A la moki manene ke sina ga, naña la asuña amiila Yesu lala keviu pañisi, a la asuña apisuar la e nalaena la naña asuña añar ke pan la.

*Pakaiwa na kurus nen vilumini naña kekapil e porotano na pe tañena vari*

*Matu 13:1-9; Mak 4:1-9*

<sup>4</sup> Ana e pogos tai, pupia ñina na yeririna lala la moki amolue e kiela pulkumali la peve taaga, ana la apimi amiervivi Yesu piora, ana naga pis pan la, kuan ñakaiwa tai pan la.

<sup>5</sup> Naga pisa sanini, sape “Yar tai sape va veven kurusia e kana lokove. Pogos naña peven kurusia, suña sisilinia, ana kurus lañasia amloloru e mraplepa, a siraunia, yar la apim amiyaloro ea, apie kare ga, a manu mēna lala apimi ate plan make ga.

<sup>6</sup> A kurus lañasia amloloru e yo naña kilavaru sike ea, pitotovi pavini, ana yoko miaiai ga, komin naña pe wii re e yo nene poli.

<sup>7</sup> A kurus lañasia mloloru e yo naña sumo na pe ate plan ruru re kilika viowa e poli, ana yoko siraunia kilika viowa nene kapur ke sina ga pimi keviu, kewo make kurus la naña pitotovi ne-e amarmare.

<sup>8</sup> A kurus tañena ne lañasia amloloru e porotano naapo tai, ana la apitotovi akapur mā pano-o, la añar mrasnela la moki, tol ponotia taaga.”

Ana pogos naña Yesu pisa visena la nene ñisi, naga pion manene pan la, sape “Yar naña kiligana teke ea, monar yaggon ruru visena nene.”

*?Komin ya ne Yesu pis e ñakaiwa lala?*

*Matu 13:10-23; Mak 4:10-20*

<sup>9</sup> Ana siraunia, nalogena lala apim puna Yesu apiun kinas nen ñakaiwa nene tania.

<sup>10</sup> Ana naga pisatamē la, pisape “Ntewa kila sanene sape vena akilia alual nakilia wanena na kiena nasuñenena.

*‘Ana e yar tañena lala, nakilia wanena la nene la atapolou asike e ñakaiwa na wa, ana la asuña apisu pano-o, pe apisu kilale re poli,*

*a la asuṃa amiyagogo pano-o, pe amloge kilale re nena poli.’ ”*  
*Ais 6:9*

*Yesu pisavan kinas nen ṣakaiwa na kurus nen vilumṃini*

<sup>11</sup> Ana Yesu pisavan ruru ga ṣakaiwa nene pan la na wa. Naga pisapenua “Pogaga, kinas nen ṣakaiwa nene naga sanini. Sur nasumo, naga kurusa, a naga na sane visena kiena ne Ntewa.

<sup>12</sup> A kurus la naṣa akekapil mrapplepa, naga na sa naṣa yar la ne amloge visena nene, ana kurus nowo lala mloloru pitomi e kiela sitomena lala. Ana Parin Yermare nene pimi ṣar plan ke sina ga visena la nene petan sinela lala, vena kila sane ve alelaga re sina, ve atol re si natamaliaena.

<sup>13</sup> “Taṣena, naga kurus la naṣa asike e yo naṣa pe kilavaru, a na nene sane yar la naṣa amloge lologena wo nene, amlavia, akekarania, ana sa naṣa ṣeligas nela pe po re poli. La asuṃa amlelaga yam plas ga, a visae atol pog ṃarera, pona nakilaliena imi, yokorena la aloloru ke sina ga.

<sup>14</sup> “Taṣena ṃena ga, naga na kurus la naṣa asike e lelen kilika viowa lala, a na nene sa naṣa yar la amloge, ana pogos naṣa la amial ke apa sane, ana asitom manene laa kiela malena lala, a sinelan manene ṃena kilavaru, a akekaran manene ṃena kekarena na yomarava la nini paṣisi. Pelaga la nene apimi sane kilika viowa tai naṣa piwo la, ana taṣatete nena kiela malena war mras naṣa marua ruruia.

<sup>15</sup> “Ana na maro, naga kurus la naṣa sike e porotano naapo, nanene naga sa naṣa yar

la amiyagogo ruru e Lologena Wo nene, ana amligan ruru sike e losinela lala, atarar ruru m̄arera, naña ape lelaga kemua. Yeririna wo la ne sanene, la akila kiela sitomena la viayavi, ayum̄ae ruru m̄a vano-o awar mras nen Lologena Wo nene e kiela malena lala.”

*Pakaiwa na kapi vivaga*

*Mak 4:21-25*

<sup>16</sup> A Yesu pisa m̄ena ga, pisapenua “Ita yeririna lala, visae towar kap vivaga imi, yokorena ve yar tai warwan re m̄eke vatanon karo tai pona sur tai sanene. Peraga, tetelan ga m̄eke metava vena kila yar la naña aim loyum̄a la avisu naña yo merarava ruru nena ga.

<sup>17</sup> Pogaga, ana nasuñenena kiena ne Ntewa naga sane kap vivaga nene, naña nanagane sum̄a m̄alm̄alivin ita vena tegoli make suri punu ga. Suri punu ga naña tapolou sike ga wa, a nakilia wanena punu ga, yokorena la monar amolue e yepesinasa vena yar la akilia avisu kilalea.

<sup>18</sup> Kam na monar ayagogon ruru kiau visena lala, a akilali naña asitom ruru la. Yar naña kiena suri moki rui, yokorena naga war va ve mok manene vañisi. Ana yar naña limana plasan suri lala, yokorena naga kilalu kiena narin sur nene naña naga sitom ke sape pe kiena pa rui.”

*Anenane Yesu amio wenla lala, apim asape aurelua naga*

*Matiu 12:46-50; Mak 3:31-35*



19 Ana anenane Yesu amio wenla lala apim aporun naga e pogos nene, ana la akila ñele yon naña ava atol naga loyuma, komin naña ñina la moki, kila yo ve tokak ga.

20 Ana yar la amla lelein ga visena pimi tol Yesu, asape “!Ei, anoma amio womla lala asuma lu asike vanua, sinelan asape avisu ko sumo wa!”

21 Ana Yesu pisatamea, sape “Naga naña pe aneu, pona pe wolai, nanene na la ga naña amloge visena wa kiena ne Ntewa, a la asuma akila ke sa naña visena nene pisa.”

*Pupia lagi naña Yesu pisaluñaria*

*Matiu 8:23-27; Mak 4:35-41*

22 Ana e legiena tai, Yesu ñere nalogena lala, la apa amiyai e waa tai, ana Yesu pisa pan la, sape “Ita, yoko teva e lepas nen lapa nene lepas ñasia.” Ana la amligan yo, asuma apano,

23 ana pogos naña waa kiriri ke pa narui, Yesu maran kawa pano-o momalio. Ana siraunia, pupia lagi tai miyui, miyu lapa nañani, ana pupia sive lala akilapela pano-o sive pule e pulu waa, apisu sane piowa ga narui.

24 Ana apito apioñege Yesu, apisa pania, asape “!Suñe, Suñe, lavis ke tetalilu narui!”

Ana Yesu suma lu, pisaluñar lagi amio sive ñarera la nene, ana sur la nene apito tano, yo ñano ruru nenaga.

25 Ana Yesu pisa pan la, sape “?Awa kiamiu naviawaena?”

Ana amarau pano-o, amilan manene pañisi, ana asuma apiuviun ke sina tan la, asape “?Aulai,

yaru ya nene? Naga pis ga sanene ana lagi amio sive, lalua amlogearia. !Suwala!”

*Yesu pile plan yermare moki petan yere Karasa tai*

*Matiu 8:28-34; Mak 5:1-20*

<sup>26</sup> Ana Yesu la apa atol lepas ñasa, e naña Kalele kira ke pa ea, nanene mesmesun e yo naña Karasa.

<sup>27</sup> Ana pogos naña Yesu pa ura e yo nene, yar nae e yo nene tai pitomi pitawea, naña yar nene yermare la asike ea. Nakonua rui, yar nene pesinas ga, pe miyen re sur tai poli, a naga pe mon re e yuña poli, naga kekaran ga naña monmon ga e lotap lala, e puluve la naña amligan ke kiela tas nen yar mare la añenñeke ea.

<sup>28-29</sup> Ana yermare la nene akila kare yar nene yam moki rui, kila sane yar la akirakiravanli naga silaga, a apiar e kilipan, a apiar lana amio limana e kilika panon laki, ana naga sumña kilaroro ga, a yermare la nene añenelua naga pa ñeke e yokorena nene.

Ana Yesu pisuia, pis pa ninuna viowa, pilelua sape ligan yaru nene. Ana yar nene pisu Yesu, pio naga, a mloru e lana, ana ninuna naña sike ea pis ñarera, sape “?Ana Yesu, ko narina ne Ntewa na Mava, kioña ya na teke e inu? !Nepiun ñareran pan ko, nesape ve ola re nakoena van inu!”

<sup>30</sup> Ana Yesu piun tania, sape “?Ana kioña kia ai?”

Ana ninuna viowa nene pisatañea, sape “Kiau kia ‘Yermare lala na kilaen mara.’ ” Naga pisa

sanene komin naña yermare la naña apa e losinena la mok liu.

<sup>31</sup> A ninuna viowa la nene asumña apiuviun m̃areran ke sina ga pa Yesu vena naga ve vile plan la re, naga ve kila la re ava aloru ato tano e pupia pulukapi.

<sup>32</sup> Ana yepas nen kunus na yo nene, pupia p̃egas nen nompui lala asumña akolkol ke porotano, ana yermare la nene atagi pa Yesu, apiun m̃areran tania asape naga ligana la ga ava e nompui la nene. Ana Yesu tam̃an pan la,

<sup>33</sup> ana la amolue petan yar nene, apa e los nen nompui lala. Ana nompui la nene aplamolue yam veraga akiriri apito e yeparpas tai, ana apiovion la apito e pupia lapa nene, atalil make e sive.

<sup>34</sup> Ana yar na visuaren nompui lala apisu sur nene, la ãpure apa um̃a, apisawal sur nene, ana apisa make m̃ena ga e yo la punu ga,

<sup>35</sup> kila sane yar la moki sinelan asape aimi avisuia. A pogos naña la apimi, apisu Yesu sum̃a ga, a yar naña ninuna viowa la ãpure petan rui naga totano teke e lana ne Yesu. Nanagane, naga miyen ruru m̃ana kulmrae wo la rui, a pimi mom̃au ruru nenaga, pe sirag re si poli. Pogos naña la apisu yaru nene pimi po si sanene narui, ana amarau.

<sup>36</sup> A la naña asũpesania apisu suri punu ga, asunyu pa la naña apim mare ga na wa, apisa meraravan pan la sanape naña yaru nene naña yermare la asũpesan ea, ana Yesu kila naga pimi po si rui.

<sup>37</sup> Ana yeririna lala na lepas nae Karasa, la apisu sane piowa ga, ana la asumã amãreran pa Yesu asape la sinelan naga molue si vetan la, komin naña sur nene kila amarau pañisi. Ana Yesu la apitovin si vena aiai e kiela waa, vena awasuñela sina.

<sup>38</sup> Ana pogos naña la asumã apito ke narui, yar nañani pitomi piun mãreran tan Yesu sape naga sinenan sape va su lue amio naga, ana Yesu pialuñaria, pisa pania, sape

<sup>39</sup> “Peraga, komin naña popon manene ko owasuñe ko ga ova si uña, a ova osunyu van yar lala, ovisa van la sanape naña Ntewa kila po naña po manene pan ko sanene.”

Ana yar nene ãasuñe sina, a naga suña pa miyervivi yo punu ga nae lepas na kiena pupia pulkumali, a pisawal yumãena wo naña Yesu kila pania.

*Nin sira kiena Saeras, amio sira naña tol kulsota mña Yesu*

*Matiu 9:18-26; Mak 5:21-43*

<sup>40</sup> Ana Yesu lala akusro lapa nene apa ke sina lepas ãasia, a pupia ãina na yeririna lala asumãate ke naga, ana la akekaran naña apisu pa mñalivin la sina.

<sup>41</sup> Ana yerkawa na kiela yuña na lotena nae e yo nene, kiena kia Saeras, naga pimi lavisin Yesu. Ana kinai tanonia, tag pania, piun tania sape imi mña,

<sup>42</sup> vena visu nin narina naña sira, naga minana pañisi. Nin sira nene, naña yerkawa nene naga narina taaga nena nene, a kiena kas pe sur sane

lualima taaga pa lua ga [12], ana kiena inanena pimi keviu manene laa narui, kila narui apisu sane lavis ke mare ne. Ana Yesu suñalu, amio yar nene apano.

Ana pogos naña naga pa ke sanene narui, pulen yeririna na pupia ñina la nene asuña atavevea, asuña amiigin la piora e Yesu.

<sup>43</sup> Ana lala tai, naga sira tai, naña maiena kien sira lala teke e naga e legiena punu ga, tol kas lualima taaga pa lua [12] rui, ana pe yar re nena tai naña kilia kila ruru kiena maiena nene poli.

<sup>44</sup> Ana sira nene, naga mialvan ga yaru la lika, pimi pimi lavisin ñasina ne Yesu, kian limana sane, tol ga ñana isinen kulkota. Tol ga kulkota ñana Yesu sane, ana e ke e pogos ga nene, kiena maiena nañani ñisi nena ga.

<sup>45</sup> Ana Yesu piun ke ga, pisape “?Ane tolmare in ga na wa?”

Ana la apisapenua “Pe yar tai tol ko re poli,” ana Pita ñena ga pisa pania, sape “?Ana Suñe, sanape? Yaru la apule manene laa asuña amiigin la kar ga miyervivi ko pivi, asuña apavan e ko.”

<sup>46</sup> Ana Yesu pisa pania, sape “Peraga, yaru tai tol inu nena naña, komin naña in na nemninuk-ilale sane kiau nañareraena kompas pa vanua e inu pa e yaru nene ñisi rui.”

<sup>47</sup> Ana sira nene pisu sane naga tañatete si tapolou narui, ana pimi puna ne Yesu, marau pañisi, sinen kurkur ñena ga. Naga pimi mloru e lana Yesu, ana e marana ne yeririna la naña asike ne, naga pisawal make sur la e naga pania,

sa naŕa komin ya ne naga pimi tolia, a sanape naŕa pimi po si rui e pogos nene.

<sup>48</sup> Ana Yesu pisa pania, sape “Auya, kionŕa naviawaena e inu kila ko opo si rui. Sumŕare kiena ne Ntewa sike amio ko, owasuŕe ko sina ova unŕa.”

<sup>49</sup> Ana pogos naŕa Yesu sumŕa pivis ke amio sira nene wa, visena pimi pa yerkawa nene, sape “Nin narumŕa nene kovio rui. Popon ve oure re si pupia navianena nene imi, vena ve okila kare korenan re naga.”

<sup>50</sup> Ana Yesu mŕena mloge mŕa visena nene, ana pisa pa Saeras, pisape “Ve ositom re suria, owasine ga Ntewa mŕarera, a yokorena nin narumŕa sira nene imi wo si ne.”

<sup>51</sup> Ana Yesu pa amio yar nene apa mŕana, a pogos naŕa apim atol yo nene, naga pisaluŕar laŕasa sape yoko ve ava re loyumuŕa amio naga, ana naga ŕere ga Pita, amio Yoane, a Semes, a arimanane nin sira nene amio anena, ana apa loyumuŕa.

<sup>52</sup> Pogos naŕa apa loyumuŕa apisu naŕa yar la asumuŕa sinela miye ke nin sira naŕa rui, asumuŕa ataginia, ana Yesu pisa pan la, sape “Ve atagin re nin sira nene sanene. Naga pe mare re nene poli, naga momalio ke ga ne.”

<sup>53</sup> Ana la apitalia kare ga naga, komin naŕa la akilia asape nin sira nene marŕantop nena rui.

<sup>54</sup> Ana Yesu pa tarar limana ne nin sira naŕani, pisa pania, sape “Nin naruu, osumuŕal li sumo wa.”

<sup>55</sup> Ana e ke ga e pogos nene, apisu naŕa nin sira nene, kiena malena ŕasuŕe sina pimi e naga, ana

suñalu, suña miyaloro, ana Yesu pisape popon ala narin kinanen tai vania.

<sup>56</sup> Ana arimana amio anena, amilan pañisi naña kiela sitomena la kovio nena ga, ana Yesu pisa pan la sape yoko ve avisawal re sur nene va yar tañena lala.

## 9

*Yesu pitetalia kiena nalogena la peve lua*

*Matiu 10:5-15; Mak 6:7-13*

<sup>1</sup> Ana Yesu pio viraviran kiena lualima taaga pa lua [12], ana pis ruru pan la, naga mla m̃areraena pan la, tañan la vena akilia ataulu yermare lala, a vena akilia akila ruru maiena lala.

<sup>2</sup> Naga kila sanene vena vitetalia la avanon alogon navesuñenena kiena ne Ntewa, a vena akila ruru namaiena lala.

<sup>3</sup> A visen wo lañas naña pisa pan la sumon naña apano, sanini, naña sape “E lepas na kiamiu mrapa, yokorena ve awarar re sur tai. Ve awar re kiamiu plasgai, pona kiamiu karo, pona kinanena, pona kilavaru, a ve awar re m̃amiu kulsota ve lua, yokorena ayen ga m̃amiu kulsota ve taaga ga naña amiyenar ke ne.

<sup>4</sup> “A uña ya naña visae aure amiu ava ase ea, ñisi na monar akekaran naña asu amio mratava na uña nene, yokorena aligan ga uña nene pogos naña amolue si vetan pulkumali nene.

<sup>5</sup> A e pulkumali ya naña visae la yepel mavin were amiuena ava e m̃ala yum̃a lala, ñisi na

aligan ga kiela yo nene, a pogos naña amolue vetania, monar atan plan puluyavi na mrapa na yo nene vetan lamiu, sane kile tai pona kiamiu visena m̄arera tai van la, sape yoko awar nakoena tai naña torokin ga kiela p̄elaga viowa nene.”

<sup>6</sup> Ana nalogena lala amolue apa narui, a asuñã aṗaro ke e pulkumali lala, asuñã amlologon ke lologena wo, a asuñã akila ruru ke maiena lala.

*Parin Suṗe Erot Antipas pisayu Yesu*

*Matiu 14:1-2; Mak 6:14-16*

<sup>7</sup> Ana e pogos nene, Parin Suṗe Erot m̄ena ga mloge towe m̄a ya naña Yesu la asuñã akila ke ne, ana naga sitom manene paṗisi, komin naña yar laṗas asuñã apisayu Yesu, asape naga Yoane Nakeena, naga mali si petan marena,

<sup>8</sup> ana taṗena laṗas asape naga yermarua Elaisa nanua, nane m̄alivi si ne, a taṗena laṗas asape naga pe navisawalena la tai nanua sumo sumo manene laa, naña suñalu si petan marena.

<sup>9</sup> Ana Parin Suṗe Erot pisape “Pe Yoane Nakeena re nene p̄oli, komin nesilua p̄arina rui, ana yar na apisayu ke ne, naga a si nene?” Ana sitomena nene kila naga sinenan visuen Yesu paṗisi.

*Nalologena la apa amlologo, ana aṗasuṗe la sina*

*Matiu 14:13-21; Mak 6:30-44; Yoane 6:1-15*

<sup>10</sup> Ana nalologena la naña Yesu pitetalia la sape ava alologo, aṗasuṗe sina, ana apisawal sur punu ga naña amiyum̄aenia pa Yesu. Ana Yesu



ẽpere la amolue petan yar lala, amiyepe la ve tokak ga apa e pulkumali tai, kiena kia Petsaeta.

<sup>11</sup> Ana siraunia, yar la amloge asape apa ke e yo nene, ana la m̃ena ga asirau apano, apa m̃ena e yo nene. Ana Yesu kekara ga, naga sun towe amio la, a siraunia pian la e lepas navesuẽnenena kiena ne Ntewa, a kila ruru yar la naẽa sinelan ke asape popon yar tai iila la.

*Yesu pagan yeririna la manu lima [5000]*

<sup>12</sup> Ana Yesu sum̃a amio la pano pano-o, apisu naẽa mrae pito ke tano narui, ana kiena lualima taaga pa lua nene apim puna, apisape “Ei, Suẽe, popon oligan ẽina la nene awasuẽpela ava m̃ala um̃a lala pona avakar ga e pulkumali la ne sike ne, vena akilia aul kala kinanena laẽasia, a vena akilia alual m̃ala lele na monoena, komin e yo na tesike e ne pe pon re yemalo wo ita e poli.”

<sup>13</sup> Ana Yesu pisa pan la, pisape “E, peraga. Popon kam ga awar kinanen laẽas van la.”

Ana la apisatam̃ea, apisape “!Kei! Imimi memla ke ga narin kilaparavi lima, amio narin ika lua. ?Ana visae peraga, pona ko sinom̃an ke osape yoko imimi ke narui meva moul kinanena torokin pupia ẽina la nene?”

<sup>14</sup> La apisa sanene komin yeririna la naẽa asike ne la moki manene laa, ana yerm̃ene ga lala pa tol sur sane manu lima [5000].

Ana Yesu pisa pan la, sape “Ava avisa va yeririna lala avisave atotano ke ne wa, atotano e ẽegas lala, naẽa yar la lualima ve lima [50] e ẽegas tai.”

<sup>15</sup> Ana apa akila sa naña naga pisa, a yeririna lala atotano e ñegas lala.

<sup>16</sup> Ana Yesu mla kilaparavi lima nene amio narin ika lua nañani, kirava pa ma e peni, pisa potenania ana kawewowa, kian pa nalologena lala vena alalein akian va ñegas la nene.

<sup>17</sup> Ana akan panpano-o mēpela kawa ruru nena ga, a kororos nen kinanena naña akanligania, akon pa e karo popos lala tol lualima taaga pa lua [12].

*Pita pisawal pisape Yesu naga Navisaarena kemua lelaga*

*Matiu 16:13-28; Mak 8:27-31*

<sup>18</sup> Ana pogos tai, Yesu sumña mlen ke naga taaga, a kiena nalogena lala asumña ga lavisinia, ana naga piun tan la, sape “?Asumña amloge yar la apisavisa inu asape in na ai?”

<sup>19</sup> Ana apisa pania, asape “Lañas asape ko Yoane Nakeena, a lañas asape ko Navisawalena Elaisa, a lañas asape ko navisawalena tañena lala tai nanua sumo sumo nane naga mali si petan marena ne.”

<sup>20</sup> Ana naga piun tan la, pisape “?A sanapen amiu, kam asape in na ai?”

Ana Pita pisatamea, pisape “Ko Navisaarena kiena ne Ntewa nene.”

*Yesu pisawal kiena marena*

<sup>21</sup> Ana Yesu pis mārera, pisaar nena pan la, pisape yokorena ve avisawal re sur nene va yar lala,

<sup>22</sup> ana pisa ruru pan la pisape yoko ve sanapen naga. Naga pisape “Inu na nepe Narina ne Yeririna, a yoko nasumonena kiena ne le Israel lala, amio yerkawa kiena ne yar wa lala, amio navianen navisaluaen lala, yoko akoven lua inu, p̄isi na monar akila sur ve moki na kila kare inuena. Yoko monar aweñar inu nemare, ana e kana legiena na telu, yoko Ntewa visirlua inu nemal sina.”

*Nalogenena kiena Yesu naga monar sitom korenan ga kiena nasinenanena lala*

<sup>23</sup> Ana e pogos nene, Yesu pis pan la, pisape “Yar naña sinenan sape taveve inu, naga monar sitom korenan ga kiena nasinenanena lala, naga monar kus kiena laki torovia e legien punu ga, sa naña yoko inu nekus kiau, ana taveve inu luen ga.

<sup>24</sup> Nepisa sanene komin yar naña sinenan sape ve puluvisin kiena malena, yoko kilalu kiena malena. Ana yar naña tañan kiena malena vanon inu, yoko naga taulu si kiena malena.

<sup>25</sup> Visae yar tai tol make sur wo na yomarava nini lala, ana kila pal mrapa a kilalu kiena malena, naga pe taulu re nena sur wo tai poli.

<sup>26</sup> Yar naña mawa e marana yar taña lala vanon inu pona vanon kiau visena, yoko inu Narin Yeririna m̄ena nemawan yar nene e marana Ntewa e pogos naña nowasupe sina, naña yoko nevitom nemio pupia naurarena naña pe kiau, a pe kiena ne Ata, a naña pe kiena ne m̄ena navisi wa lala.

---

**9:23** Mat 10:38; Luk 14:27

**9:24** Mat 10:39; Luk 17:33; Yoan

12:25

27 Lelaga nevisa van amiu, yar lañas asuñal asike e nini, naña tařatete amare na wa, vano-o tol pogos naña avisu Navesuřenena kiena ne Ntewa imi mñalivi.”

*Tasnena ne Yesu pimi pe tařena*

*Matiu 17:1-8; Mak 9:2-8*

28 Siraun pogos naña Yesu pisa visena la nene, pe sur sane legiena olua řaro ga na wa, ana naga řere Pita, amio Yoane, a Semes, la vari apa metava e ravie tai, komin sape len.

29 Ana apam atol yo nene, a pogos naña suña mlen, nalogena la telu nene apisu naña marana pimi pe tařena, a apisu naña mña kulsota pilavila pařisi, a miyuwowo naña miyuwowo manene laa.

30-31 Ana siraunia, yermarua lalua nene Elaisa amio Mosis, lalua amñalivi amio pupia naurarena nae ma e peni, ana lalua asun ke amio naga, naña asuña apisayu ke sanape naña yoko naga monar va garu Yerusalem, a monar mare vetan yomarava nini, sa naña Ntewa pisaaria řa rui.

32 Ana sumo, la telu Pita, Yoane a Semes nene asuña amloge marala kawa pařisi pano-o amomalio, ana pogos naña atavilo sina, la amilan sur la nařani, naña apisu pupia naurarena kiena ne Yesu, a apisu lalua naña asuñal asike amio naga.

33 Ana apisu naña lalua nene asape aligan si yo vena awasuřela, ana Pita sinenan sape visi, ana naga mninue mña visa ya ne, ana naga pisalawe ga visen kar tai pa Yesu, pisape “Suře, popon naña ita tesuña e nini. Popon teyuñaen

silparpara ve telu e yo nini, moña tai, mña Mosis tai, a mña Elaisa tai.”

<sup>34</sup> Ana pogos naña naga sumña pisa ke visena nene, lul tai pitomi kalo la, ana pogos naña la apisu sane apa ke loyumña e lul nene narui, amarau pañisi.

<sup>35</sup> Ana amloge visena tai molue e lul nañani, pisape “Nanene na naruu ne, naña nepisirlua naga rui. Naga ke narui monar alogear ruru naga.”

<sup>36</sup> Ana pogos naña visena nene ñisi, lul nene kovio sina, apisu naña Yesu naga taaga sike si amio la. Ana siraun nene, nalogena la nene apa ruru la, asumña ga sa ga ne, pe apa apisayu re sur nene pa yar tañena la poli.

*Yesu pilelua yermare petan mñee tai*

*Matiu 17:14-21; Mak 9:14-29*

<sup>37</sup> Ana e kana legiena na siraunia, Yesu amio la telu nañani añasuñela si apitom tano, ana pupia ñina na yeririna la asumñate ke naga, sinelan asape avisuia.

<sup>38</sup> Ana pogos naña apim amñalivin la, lala yaru tai pion manene pa Yesu, pisape “Navianena, nepisa awis pan ko, ovisuli naruu na yermene nini, komin naña naruu wawa taaga nena nini.

<sup>39</sup> Ninuna viowa tai ne sumña pimi ke e naga sanene, kila naga mlokai manene pañisi, ana miokamarmare tasnena mñarera pano-o wasirina la mlalau. Sur nene sumña kila ke naga pa piowa

laa, kila kare naga pañisi, a sumña kila luen ga, pe mliganli re naga pa ruru pogos tai poli.

<sup>40</sup> In na nopure naga pa puna ne kioña nalogenala, nepisa awis pan la vena añenelua ninuna viowa nene, ana la akilalia, amiyumñaen pano-o, akila ñele yonia.”

<sup>41</sup> Ana Yesu pisatañea, pisa pan la, pisape “? Kam la nene, sanape na sanene? Pe asumñal re nena ase Ntewa poli. ?Monar nesumña nemio kam wowe lala tol pogwai? In na sineu maren amiu rui. Ko, pogaga, oure narumña nene imi.”

<sup>42</sup> Ana apa añure pimi, a pogos naña apim ga sane, ninuna viowa nañani kilapel ke sina ninis nañani, kila tasnena miyuyuwawa a mñarera. Ana Yesu pis kapuru pisaluñar ninuna viowa nañani, a kila ruru mñee nene, ana mligan si pa arimana.

<sup>43</sup> A la naña apisu sur nene, amilan manene namñareraena nowo kiena ne Ntewa nene pañisi, naña kila po sanene pañisi pan mñee nañani.

### *Yesu pisawal sina ga kiena marena*

Ana siar e pogos naña yar tañena la asumña apisasayu ke sur wo naña Yesu kila, ana Yesu pisa kiena visena tai pa kiena nalogenala.

<sup>44</sup> Naga pisa pan la, pisape “Ayagogon ruru kiau visena nini, aligan ruru te kiamiu sitomena lala, vena ve sinemiu ñesan re sina. Ee, nepisa ruru van amiu, nesape Ntewa mligan inu sane Narin Yeririna, ana lavis ke naña aligan inu neva e limana ne yaru la naña yoko awemñar inu nemare narui.”

<sup>45</sup> Ana nalogena lala pe amloge kilale re ya naþa Yesu suũa pisayu ke pan la poli wa, sa naþa kana kinas tapolou ke ga wa, kila pe apisu kilale re poli, a amaraun mēna naþa aviun ruru va Yesu e lepas na visena nene.

*“?Ane to laa metavan yaru taþena lala?”*

*Matiu 18:1-5; Mak 9:33-40*

<sup>46</sup> Ana siraunia, veveyuena tai mālivi likan nalogena lala, naþa apisape ane to laa metavan lala taþena laþasa.

<sup>47</sup> Ana Yesu kilia m̃a kiela sitomena la nene, ana pio ninis tai naþa pimi ke puna, ana mligan ninis naþani suũalu se yepasa,

<sup>48</sup> ana pisa pan la, sape “Yar naþa kiena sitomena patanon inu, ana naga kekaran wereruruen ninis nini, nanene sa ga naþa kekaran were ruru inuen ga narui. A yar naþa kekaran inu, naga sane kekaran ke ga naga naþa mligan inu nepim. Nanene komin naþa amiu ai naþa kiena sitomena su tano vaþisi, naga ke narui naþa naga to metavan amiu make ga.”

*“Yaru naþa pe pisalupar ita re poli, naga suũa miila ita ke ne”*

<sup>49</sup> Ana Yoane pisa pa Yesu, sape “Suþe, mepisu yar tai, naþa suũa pile plan ke yermare lala, naga mēne plan la e kioũa kia. Ana yaru nene, memninue ga, naga pe ita re tai poli, ana mepisaluparia.”

50 Ana Yesu pisa pania, pisape “Toko, visaluþaren toko, komin yar naþa pe pisaluþar ita re poli, naga miila ita ke ne.”

*Yesu sitomal sape lavis ke monar va ma meta Yerusalem narui*

51 Ana Yesu pisu kilale sape nanagane, lavis ke Ntewa were si naga va meta ma e peni narui, ana kila ruru kiena sitomena, sape kiena mrapa monar va ma meta Yerusalem narui.

52 Ana la amial apano, ana Yesu mligan kiena yar na waren visena lala la asumo apa e pulkumali tai kiena ne le Samaria lala, vena akila ruru make suria, naga sirau imi.

53 Ana la ne e yo nene, la pe sinelan re Yesu la aim e kiela yo poli, komin la pe sinelan re iilaen le Yu la naþa akom ke kiela yo poli vena ava meta Yerusalem.

54 Ana pogos naþa nalogena lalua nene Semes lalua Yoane apisu naþa apisalulþar la sa nene, lalua apiun tan Yesu, asape “Suþe, ko sinoan osape melen mevio kapi tai ligan ma e peni vitom tano kekan la nenaga?”

55 Ana Yesu þarpuia pis marera pan lalua, pisaluþar la.

56 Ana pe apa re si e nene poli, la apa e pulkumali taþena.

*Yaru naþa taveve Yesu ve kiraþatau re sina Matiu 8:19-22*

57 Ana pogos naþa amial ke e mrapa narui, yaru tai pimi pu Yesu, pisaar pania, pisape “Yoko netaveve ko e nape naþa visae ova ea.”



58 Ana Yesu pisatañea, pisape “Lokul tetan lala la ñala pulus la suña ga, a manu lala ñala ponovi la suña ga. Ana inu Narina ne Yeririna, naña nokom ma e peni nepitom, in na pe ñau yo re poli, naña neva nomonea. Visae ko okekaran ñena malena na sanene, ko okilia oimi.”

59 E ke e pogos nene, yaru tañena tai, Yesu pisa ñena pania pisape imi tavevea, ana naga pisatañea, pisape “Suñe, otañan neva nevisuar ke ne kiau yermarua sumo wa, a visae marpan pae, ana yoko neim netaveve ko ga na wa.”

60 Ana Yesu pisa pania, pisape “Oligan yaru la naña pe atol re malena poli wa ava asin kiela yar mare lala. Ana ko, oim ga teva telologon navesuñenena kiena ne Ntewa.”

61 A yar tañena si tai kila sa ke ga, kila sa naña pisasa ga, pisa pa Yesu, sape “Suñe, yoko in na netaveve ko lue narui, ana sur taaga ga, nesape otañan neva nevisa ke ne pokolemalo va la ne uña ñau wa.”

62 Ana Yesu pisa visen tai sanini pania, pisape “Yar naña suña sitom manene la ñana uña parar kiena suri make ga, naga sane yaru naña tarar ke pñeligas nen waa, a silaga, suña kira pñatau lue ga. Yar na sanene pe torokin re imi ve yar na navesuñenena kiena ne Ntewa poli.”

## 10

*Yesu pitetalia yar la moki naña la peve lua ava alologo*

*Matiu 9:37-38, 10:7-16, 11:20-24*

<sup>1</sup> Ana e pogos nene, kieta Suḻe pisir plan si kiena nalologena laḻasa. La punu ga tol lualima yam olua pa lua [72], a naga sitom ke sape ligan la nene ava sumo, la veve lua ava e pulkumali lala a e yo la naḻa yoko naga sirau va m̃alivi ea.

<sup>2</sup> Ana naga pian la sanini, pisape “Lelaga, kinanena moki liu naḻa marua sike lokove, ana yar la lua la ga naḻa asum̃a aḻar ke pitomi um̃a. Monar aviun manene tan yerkawa na lokove nene, vena naga ligan plan re si yar laḻasia la avanon awar kana kinanena la nene imi.

<sup>3</sup> Sanene, monar ala kiamiu mrapa avano. Ana popon avisu kilale sane in na nemligan plan amiu apano, sa ga naḻa narin sipsip, naḻa apanon ke vena avitawe pupia lokul tetan lala.

<sup>4</sup> A pogos naḻa avano, ana ve awar re kiamiu taga na varu, a ve awar re kiamiu karo, a ve awar re si kiamiu kulus nen lamiu taḻena. Ava ga sa ga ne, ve asunlilue re mrapplepa va yar lala.

<sup>5</sup> A pogos naḻa ava am̃aliv e yum̃a ya, sur naḻa yoko avisa ḻesania, yoko avisa sanini, avisave ‘Sum̃are sike e um̃a nini.’

<sup>6</sup> Ana visae yaru naḻa sike e um̃a nene naga sinenan sum̃are, yoko sum̃are naḻa avisa kilia sike amio naga, ana visae pe yar re tai ne sanene poli, yokorena sum̃are wasuḻe si imi van amiu.

<sup>7</sup> A ve ava aulaula kare e yum̃a taḻena lala, ana asum̃a ga e yum̃a nene, a akekaran ala kinanena ya pona namunena ya naḻa ala imi van amiu. Ve amawan re ala sur wo ya naḻa akila van amiu, komin naḻa yar na yum̃aena naga mesmesun la

kiena narin nalaena tai.

<sup>8</sup> “Sanene na, visae kumali ya naþa ava aworu ea, visae akekaran naþa avisuar amiu, yoko monar akekaran ga kinanena ya naþa sinelan asape ala van amiu,

<sup>9</sup> a monar akila ruru namaiena la e yo nene, a monar avisa van la, avisave ‘Nanagane, nasuþenena kiena ne Ntewa pimi ke lavisin amiu, nanagane Ntewa pimi pe kiamiu Suþe narui.’

<sup>10</sup> “A pogos laþasia, yoko aworworu e pulkumali tai, ana yoko ve akekaran re naþa aure amiu ava asike amio la. Visae sanene, amiu ataveve pupia mrapa nene ava e yepesinas na pulkumali nena, a avisawal va kana yar lala, avisave

<sup>11</sup> ‘Puluyavi na mrapplepa na kiamiu yo nini, imimi metan plan petan lamimi lala, sane kiamiu kile nasitomañalen tai. Monar ve sinemiu þesan re, sane lavis ga navesuþenena kiena ne Ntewa imi pun amiu narui, ana pe sinemiun re poli, ana akilalu narui.’

<sup>12</sup> “Nevisa lelaga van amiu, e legiena na liþereena, yokorena la ne sanene la ava e nakoena tai naþa m̃arera manene laa taulu nena naþa la nae pulkumali naþa Sotom nanua yoko awaria.”

*Yesu pisayu la naþa pe amlelaga re e naga poli  
Matiu 11:20-24*

<sup>13</sup> Ana Yesu pis m̃arera pa yeririna na kumali taþena laþasa, pisape “!Le Korasin, amio le Petsaeta, akila kare manene amiu paþisi wa!

Visae le Taea amio le Saeton lala avisuli ga kile la naña kam na apisu ñisi rui, vera na avilopu la nanua rui. La pe ape le Yu re poli, ana vera na la ayen ñilili karo a akuan yavi e ñarila rui, pona atotano mña sanene ana yaru la avisu sane sinela piowagan kemua kiela mlamulena viowa la lelaga.

<sup>14</sup> Nevisa van amiu, e pogos naliñereena, yokorena kiamiu nakoena naga taulu nena naña kiena ne la nene.

<sup>15</sup> “!A amiu le Kapeneam la naña añarwar amiu pañisi, naña sinemiun asape avisir plan amiu asu manene metava, avisuar amiu! Yoko Ntewa koven amiu ato laa tano rui e pulus nen kapi.”

<sup>16</sup> A Yesu pisa mña pan la, pisape “Yar naña visae yoko logear amiu, naga sumña mlogear in ke ne, a visae yar naña yepen mavin amiu, naga sumña yepen mavin in ke ne, a yaru naña visae yepen mavin in ke sanene, naga sumña yepen mavin ke yerkaawa naña naga mligan inu nepim.”

Ana e visena la nene, Yesu mligan yar nalologena lala apanon akila yuñena.

### *Yar nalologena la añasuñe la si narui*

<sup>17</sup> Ana yar nalologena la nene apa akila yuñena wo la moki, ana siraunia añasuñe la si apim puna Yesu, naña apulen manene kekarena e sur punu ga naña akila rui. Añasuñe la, apisa pa Yesu, asape “!Suñe, memiyuñen sur la e kioña kia pa tol naña yermare mña la asu vatanon imimi!”

18 Ana Yesu pisatañe la, pisape “Ee, kieta yumãena sanene narui. A in mña ga, noñal Yermare molue ma e peni, akoven lua naga pitomi tano sane yekarpla tai.

19 Nanagane, in na netañan pan amiu rui, nesape akilia avieyar loñara amio logovi, a mñareraena kiena ne kieta nasinekar sike mña vatanon lamiu, ana tañatete sur tai kila kare amiu.

20 Ana ve awarwar amiun re ya naña in na netañan pan amiu, naña ninuna viowa la asike vatanon amiu, ana sur taaga ga naña akilia aulen manene kekarena vanonia, na naña kiamiu kia lala asiri plan sike loyuma e tus namalena rui.”

*Yesu pisa potena pa Arimana*

*Matiu 11:25-27, 13:16-17*

21 Ana e pogos nene Ninuna Wa kila sinena ne Yesu kekara pañisi, ana Yesu mlen, pisape “!Ata o, ko ope Suñe nae ma e peni a Suñe nae yomarava nini! Nevisa potena van ko, Ata, vanon sur la naña e lepas na pun inu, okila meraravan pan la naña kiela sitomena sa ga nin sisi lala, ana yaru la naña asitom asape ape manmarua a la naña asape akilia ruru suria, ko okilawan sur la nene van la. Lelaga ãa Ata, nanene na sa ga naña ko sinoñania.”

22 A Yesu pisa mña pan la, pisape “Ata mligan suri punu sike e lumãau rui. A Ata naga taaga naña kilia inu sape in na ai, a inu naña nepe narina, in ga taaga naña nekilia ruru naga, nesape naga ai. Inu nemio la naña ne nemliganar la

vena nekipian la e Ata vena awasine naga, imimi la nene narui naña mekilia ruru naga naña pe Arimamimi.”

<sup>23</sup> Ana Yesu pilon pa puna ne kiena nalogena lala, pragogo ga pan la, la ga amloge, pisape “Ntewa kila po pan amiu pañisi, naña akilia avisu suri la nene.

<sup>24</sup> Navisawalena la mok liu amio ãarin suñe la mok liu nanua sumo naña la sinelan manene pañisi asape avisu sur la nene, ana pe apisuli re pogos tai poli, a apanyon asape aloge mēna sur la nene, ana la pe amloge re nena poli.”

*Pakaiwa naña yere Samaria sinen miye yere Yu tai*

*Matiu 22:34-40; Mak 12:28-31*

<sup>25</sup> Ana pogos tañena si tai, yar tai naga pe manmarua ruru e navisaluaena, naga pisape kilali Yesu e naviunen mārera tai ana naga sunālu, piun tan Yesu, pisape “?Navianena, visae sineun nesape nekilali netol malena naña pe luas re poli, yoko monar nekila ve sanape?”

<sup>26</sup> Ana Yesu pisatamēa, pisape “Ana kieta Tus Wa pisa ya ne e lepas nene? ?Ko opuloia opisu pisa sanape?”

<sup>27</sup> Ana yar nañani pisatamēa, pisape “Tus Wa pisa sanini, pisape: Ntewa na mava naña naga pe kioṃa Ntewa, ko monar sinemā si naga, oligan naga to sumo e losinemā wetelu, a e kioṃa malena wetelu, a e kioṃa māreraena wetelu, a e kioṃa sitomena wetelu, a ko na monar ositom

nalavis puña lala, okila wo van la, sa naña ko ositom ko ke ga.”

<sup>28</sup> Ana Yesu pisa pania, pisape “Ee, opisa mesmesun nena narui. A visae okila ve sa nene, yoko otol malena nane opiun ke ne.”

<sup>29</sup> Ana yar nene kilia sape naga pe kila re mesmes sanene poli, ana naga kilali naña kila pisape mninue ga, piun tan Yesu, pisape “?Ana a la ne asike lavis pun inu naña monar nekila wo van la?”

<sup>30</sup> Ana Yesu pisatamē kiena naviunena nene e ãakaiwa tai, naña pisape “E legiena tai, yar tai molue ma Yerusalem, sumña mialoro pito garo Seriko. Ana naga mialoro ña sanene pano tol yom̃arera tai, ana milan ãegas nen yar na vin-auen tai, naña apulania, amē kare naga pañisi, añar plan make kiena suria añure, amligan naga marluia mēke kiena mrapa komsusa.

<sup>31</sup> Ana kieta yar wa tai, naga mēna mialoro e mrapa nene naga siraun pimi, ana pogos naña pimi lavisin yar nene, naga miyepe ga pa e isinen mrapplepa, mial ãaro pano.

<sup>32</sup> Ana siraunia, yar tañena mial pimi. Naga pe Livae la tai, naña asumña akila ke yuñena make ga e Yuña Wa m̃ana ne Ntewa, ana pogos naña pimi tol yar nañani, naga mēna ga yepen mavin iilaena, miyepe ga pa e isinen mrapplepa mial ga ãaro pano.

<sup>33</sup> Ana siraun sina, yar tañena, naña naga sumña mlilu kiena mrapa viavi tai pimi. Naga pe yere Samaria tai, ana sa naña tekilia, yar la nene pe ape erau wo re amio ita le Yu la poli. Ana pogos

naña pimi tol e yo nañani, pisu yar nene marlu ñeke e yo naña aña ea, ana sinen miye pañisi.

<sup>34</sup> Ana naga pimi lavisinia, kevan lele la naña la nene aña, plan sirveve e magka la nañani, piar ruruia. Ana tarlua yar nena, mligan mon meta e kiena togki, ana mial ña amio pano-o tol yo tai naña yuña na varuruen tai ñeke ea. Ana ñere naga pa loyuña ea, miila naga po pañisi.

<sup>35</sup> Ana kolulagi, ñar kiena varu tai, kian pa ñar na yuña na varuruena nañani, pisape 'In na monar neva si e kiau mrapa narui, ana yar nene yoko sike e lumoña sumo wa. Ovisuar ruruia e sur punu ga, a visae varu nene ve torok re, yoko in na nevisuveve si e pogos naña nowasuñe si e kiau yalena nini.' "

<sup>36</sup> Ana Yesu piun tan yar naña piun navi-unena nene pania, pisape "'Opisu suniena nene sanape? ?E yar la telu naña amiyal e mrapa naña yar nene ñeke ea, yar ai naña kila pania sa ga yar tai naña ñeke ga lavisinia?'"

<sup>37</sup> Ana yar naña pisape "Nesitom nesape yar naña sinen miyea, a miila."

A Yesu pisa si pania, pisape "Ore, naga ke narui, a ko ñena ga, ova otaveve kiena ñelaga wo nene."

### *Mareta amio Maria*

<sup>38</sup> Ana e pogos nañani, Yesu amio kiena nalo-gena lala amiyaloro ke apa ma Yerusalem, ana apa añañaliv e narin pulkumali naña Petani, ana sira naña Mareta ñere Yesu pa ñala uña.



<sup>39</sup> Ana pogos naña Yesu pa sike amio la nene, luenā ne Mareta nene tai, kiena kia Maria, naga totano ga teke lavisin lana ne Yesu, toña miyagogon ruru ke kiena navianena lala.

<sup>40</sup> Ana e pogos nene, Mareta naga pe toña miyagogo re poli, ana naga sumā mñareran ke sape kila ruru make sur punu ga sumate Yesu, a naga sitom manene laa e yumaena la nene. A siraunia, pimi pisu Maria to ga tano toña ga, miyagogon mā Yesu, ana pisa pa Yesu, pisape “Suḡe, luou namā to koren ga toña sanene, ana in ga taaga nekila make suria. Pona ko opisū kilale re poli yo, ana popon ovisa vana vena imi iila inu.”

<sup>41</sup> Ana kieta Suḡe pisatarnea, pisape “Mareta, ko sireyar tai naña ositom manene sur paḡisi, a omloge piowagan manene sur moki laa na sanene wa.

<sup>42</sup> Ana sur taaga ga toña ga naña yoko ko ositom manene urmi ea, nane suri ne nane Maria māal rui e kiena malena, ana yoko in na taḡatete si nelalua vetania.”

## 11

### *Leniena naña Suḡe pian ita ea*

#### *Matu 6:9-13*

<sup>1</sup> Pogos tai, Yesu pa mlen e yo tai, ḡisi ḡasuḡe pitomi, ana kiena nalogena tai piun tania, pisape “Suḡe, visae okilia ovian imimi lia vena imimi mēna mekilia melen, sa ga naña sumo na Yoane pian kiena nalogena lala vena alen, vera na wo vaḡisi.”

<sup>2</sup> Ana Yesu tañan, pisape “Pogaga, visae sine-miun leniena, akilia avisa sanini, avisave:

‘Arimamimi, torokin kemua naña imimi mevatanon kioña kia wa.

Memlen mesape kioña navesuþenena imi.

<sup>3</sup> Mepiun tan ko, mesape ola kinanena van imimi þane a e legiena punu ga.

<sup>4</sup> A oviewo kiamimi mlamulena viowa lala, komin imimi mepiewo ke la naña akila ke piowa pan imimi.

A ve oligan re suri la imi akilali manene imimi.’ ”

### *Pakaiwa na viunen suria*

<sup>5-6</sup> Ana Yesu pisape monar ve amaraun re viunen sur tan Ntewa, ana pisa þakaiwa tai pan la, pisape “Visae kolemallo koe yepe lilika tai, oilan ga kioña erau tai yal imi tol yo punña. Ana pe koña kinanen re si poli, ana monar okirir ova pun yuña tai naña ñeke lavisin ko, monar oviun manene tania, ovisave ‘Wolai, kiau erau tai pimi porun in ga nagane na wa, ana in na luñau plas nena ga. In na pe kau kinanena re si naña nekilia nela van kan poli. ?Ko na koña kinanen tai toña ga okilia otamñan van inu sumo wa?’ ”

<sup>7</sup> “Ana sanape, tesitom tesape yoko yaru nene kilia visatarñe visave ‘Aa, ve okila re yuñaena ñarera sanene van inu. Opisu ke ne, mokotava rui, ana memio nin sisi la, moñeke e ñamimi tog rui, ana taþatete si nesuñal narui.’ Ana peraga, yaru nene taþatete visa sanene.”

<sup>8</sup> Ana Yesu yakol si visena van la, sape “Pona pogos tai yaru tai kilia sitom korenan ko, yepen mavin iila koena vanon ga ko na osike lavisinia.

Ana visae ve omawan re naþa oviun kaþaran m̃a sanene vano vano-o, yoko yar nene monar la ya naþa opiun ke ne van ko.”

*Yesu pisayu naviunen suri tan Ntewa*

*Matiu 7:7-11*

<sup>9-10</sup> Ana maran taaga e þakaiwa kiena ne Yesu nene, naga pisa ke sina pan la, pisape “Yaru naþa piun ke suria, naga tol silaga, a yaru naþa kale ke suria, naga m̃alia, a yaru naþa sigariga ke mratava, pulutava pietava pan silaga. Visae sanene, yoko akilia awar ya naþa apiun tan Ntewa, a alual ya naþa akale ke puna, a mratava naþa asum̃a asigariga ke ne, vietava van amiu.

<sup>11</sup> Visae narum̃a tai viso karia, viun narin ika naþa teke ne, taþatete ola lom̃ara vania,

<sup>12</sup> pona visae naga viun kopululus nen laka-poro naþa teke ne, taþatete ola logovi tai van kania.

<sup>13</sup> Lelaga naþa kam na ape yar viowa ga lala, ana amiu yar tai taþatete kila sanene, asuñã akekaran ga naþa ala suri wo la va narimiu la silaga. Sanene, pogos naþa aviun tan Arimamiu nae ma e peni, naga kekara manene la a naþa la Ninuna Wa van amiu naþa ape narina lala.”

*Apisape Yesu miyuñãe ke ga e nañareraena kiena ne Yermare*

*Matiu 12:22-30; Mak 3:20-27*

<sup>14</sup> Ana siraunia, aþure yaru tai naþa yermare pa e naga pimi puna Yesu. Yermare nene kila yar nena pe pis re poli, ana Yesu pilelua yermare naþani petania, ana naga pis ruru sina, kila yar la naþa apisu sur nene amilan paþisi.

<sup>15</sup> Ana la ãas apielue, ana apisalele kare Yesu ãisa, apisape “Yar nene pile plan ke yermare lala e ga e naãareraena naãa suãe kiena ne yermare lala, naãa kiena kia Pielsipel, taãan pania.”

<sup>16</sup> Ana la si ãasa, la mãna asitom piowa e Yesu, ana asuãa akilalia, sinelan asape aãarerania vena kila kile tai nae ma e peni avisuia.

<sup>17</sup> Ana Yesu mloge kilale kiela sitomena lala, ana pisape “Visae suãe tai, kiena yeririna la aliãere la, naãa laãasia akawe laãasia, yoko yuãaena kiena ne suãe naãani monar loru. A visae uãa tai, asuãa aliãere la, naãa laãasa asape aãene plan laãasa, yoko la nene taãatete asu ruru pog tai.

<sup>18</sup> ?Sa mãna nini, visae yermare kiena ne Yermare Lego la asuãa amlãere la ke rui, ana yoko nasuãenena kiena ne Yermare Lego suãalu ve sanape ne? !Kam na apisa ke sur pa sanene narui, asape in na nesuãa nomãene plan ke yermare lala e naãareraena kiena ne pupia yermare naãa Pielsipel, ana taãatete nena ve sa nene ãisa!

<sup>19</sup> ?A visae ve sa kemua naãa apisa, ana komin ya naãa kam la ãasa asuãa aãene plan ke yermare? ?Ane taãan mãreraena nene pan la, pona yermare mã nene yo? Popon sa kiamiu nalogena la naãa aãene plan ke yermare lala aloge kiamiu visena la nene.

<sup>20</sup> Ana peraga, apis pe po re nene poli. In na nesuãa nepile plan ke yermare lala e ga e naãareraena na limana Ntewa, a sur nene na

kana kinasa sane navesuṑnenena kiena ne Ntewa sike likan amiu rui.

<sup>21</sup> “!Aṑisu ke ne! Sa naṑa visae pupia yar ṑarera tai, naga war kiena pupia suri na mara lala, naga suṑa kirawo ruru ke ṑana yuṑa. Ana sur kiena ne yar nene su ruru ga suṑa e kiena kove.

<sup>22</sup> Ana Yermare Lego kiena yuṑaena naga sa ga nene. Visae yar ṑarera taṑena imi naṑa ṑarera laa taulu naga sane, yoko lalua akila ṑa mara vano naga taulu Yermare Lego, ana yoko kilia war plan kiena sur na mara lala, naṑa naga ṑasine ṑesania, a yoko naga kilia war make sur la naṑa sike loyuṑa e kove nene ve kiena, ana liṑere va kiena yeririna lala.

<sup>23</sup> “Yaru naṑa pe taveve in re poli, naga sane suwo in ke ne, a yar naṑa pe miyuṑae re amio in poli, vena moure kiau yeririna la aim lele taaga, naga suṑa ṑene tetain la ke ne.”

*Ninuna viowa kilia wasuṑe sina imi*

*Matiu 12:43-45*

<sup>24</sup> Ana Yesu pisa ṑena ga, pisapenua “Pogos tai, pog naṑa aṑenelua yermare e yar tai, yermare nena kilia va yonṑarua vena kaleli yo tai naṑa va se ea ve ṑana uṑa. Ana visae ve lual re, yoko naga visavenua ‘Aa, yoko neto li si e ṑau uṑa maruṑa na sumo.’

<sup>25</sup> Ana pogos naṑa pitomi, yoko naga lual sane akilavan ruru ga ṑeke na, akila ruru make sur la e yuṑa naṑa ṑisi rui.

<sup>26</sup> Ana yoko naga va were si yermare taṑena la ve olua naṑa apiowa manene laa taulu naga

sane atom amio, ana yoko ava si asike los nen yar nene. Ana yar nene nanua sumo kiena malena piowa, ana siraunia kiena malena piowa manene laa sane.”

*Mrapa na tolen kekarena naña lelaga*

<sup>27</sup> Ana e pogos nene, sira tai sike amio la naña apisu ke sur la nene, a naña amloge ke visena kiena ne Yesu lala, ana sira nañani kekaran pañisi. Ana pion manenea, pisape “!A kee, anomã naña ãar ko, a mla yu pan ko, navisa ruruena kiena ne Ntewa keviu pañisi pania, naña naga ãar sisi tai sane ko.”

<sup>28</sup> Ana Yesu pisatamãea, pisape “Ee, nanene na lelaga, ana nevisa van ko, nesape navisa ruruena kiena ne Ntewa va ve keviu manene laa sanene sike e yar ai naña logear visena lala kiena ne Ntewa, a naña kila ya naña naga sinenania.”

*Yar la naña sinelan visuen kile*

*Matiu 12:38-42; Mak 8:11-12*

<sup>29</sup> Ana e pogos nene, ãina la naña amiagogon ke Yesu asumã apim la mok manene laa narui, ana Yesu kilia mã naña sane la moki naña apimin ga avisu kiena kile lala, ana pis pan la, pisape “In na nepisu sane lus na yeririna nanagane lala la apiowa laa. La sinelan asape avisu ga kile lala, ana peraga, Ntewa taãatete nena la kile tai van la vena avisuia. Ana kile kiena ne navisawalena Sona nanua sumo, naga ga nene akilia avisuia.

<sup>30</sup> Ntewa mligan Sona, naga sane kile tai kiena ne la nae Ninive nanua sumo, ana naga mligan

m̃ena inu Narina ne Yeririna nepimi sane kiamiu kile na nagane tai.

<sup>31-32</sup> “Ana le Ninive la nanua sumo amloge visena kiena ne Sona, la apilopu la e pogos nene, a yoko la nene asum̃alu ase e legiena na liṽereena, la avisa lologia kiamiu naviowaena, komin yar tai naṽa naga to laa metavan Sona naga sike amio amiu, ana pe apilopu amiu re nena ga.

“A nanua m̃ena sumo naṽa sira kawa tai pe ṽarin suṽe tai naṽa molue e kiena purvanua naṽa sike koperin paṽisi, pitomi tano vena loge visena na manmaruaena lala kiena ne yermarua ṽarin Suṽe Solomon. Ana sira kawa m̃ena naṽani yoko naga sum̃alu se e legiena na liṽereena nene ana visawal ruru nena kiamiu naviowaena lala, komin naṽa yar tai naga to laa metavan Solomon naga sike amio amiu, ana pe sinemiun re nena naga poli.”

*Pakaiwa lua e lepas na kapi vivaga*

*Matiu 5:15, 6:22-23; Mak 4:21; Luk 8:16*

<sup>33</sup> Ana Yesu pisa m̃ena, pisape “Pogos naṽa tesilan kapi vivaga, ve tesilan re ga ṽisi na teva towarwan m̃eke e ṽiliṽili tai e porotano, pona takalo si e piaki tai, ana tesilania vena tetelan to metava, vena visae yar imi loyuṽa ana lual naṽa kapi vivaga nene tegoli make nena yo.”

<sup>34</sup> Ana Yesu pisa m̃ena, pisape “Kilamaran yar naga sane yo taaga ga naṽa yomerava pimi ke loyuṽa e tasnena. Sanene, visae kilamaram̃a merarava ruru wo, visu ruru nena sur lala,

yoko ve sa naña tasneña pulemamaga nena e yomerarava. Ana visae kilamaramña viowa, pinaia sur la punu ga naña sumña pisuia, yoko ve sa naña losineña pulen nena yemalolo.

<sup>35</sup> Visae sanene monar avisuar ruru amiu, vena kapi vivaga naña teke e losinemiu ve imi re si ve sa yemalolo.

<sup>36</sup> A visae losinemiu la ulen ruru luen ga kapi vivaga silaga, naña ve narin malo re nena tai teke ea, yoko kiamiu malena tego ruru nenaga, tegoli make yo punu ga.”

*Yesu pis m̃arera pa li nasumonen nalotena lala  
Matu 23:1-36; Mak 12:38-40; Luk 20:45-47*

<sup>37</sup> Yesu pis m̃a pa p̃ina la pa sanene, ana Varasi tai naña tonña miyagogonia pisa pania pisape yoko were va m̃ana, kila kinanen tai vania. Ana amio Yesu apano, ana pog naña kinanena su ruru pa sike na, ana Yesu pa totano e lelen kinanena.

<sup>38</sup> Ana e pogos nene, Varasi lala la sane monar atarar m̃arera navisaluaena tai naña sane yar monar taveve mrapa laṗasa nakevanen limana, p̃isi na kilia kinana. A Varasi naṗani sitom pisape Yesu naga pe yaru wa tai, naga monar kila ve sa naña kiela p̃elaga m̃arera nene pisa, ana pogos naña pisu sane Yesu pe sitom manene re kilaen poli, naga milan manene paṗisi.

<sup>39</sup> Ana Suṗe pis pa yar naṗani, pisape “In na nekilia make kiamiu p̃elaga le Varasi la rui. Amiu na sinemiun manene asape akevan ruru m̃amiu piala amio kami pialora la silaga, ana apilaven paṗisi, asitom ke asape kam na amekik paṗisi ne, a ape yar wa. Ana pupia kororaki sike e amiu



na wa, komin losinemiu lala pulen kilakotaliaen yaru, a nakila kareen yaru, a ðelaga viowa la ne sanene.

<sup>40</sup> !E, ve ave wowe re sanene! ?Pe apisu kilale re naña asape Ntewa nene naña si make sur na vanua e sur punu ga, naga si mēna loyuma na sur make ga, ana po pañisi naña visae akila yepas nemiu la punu ga ikik ruru nena wo lelaga, vanua amio loyuma.

<sup>41</sup> Sur nowo la naña asuma akokonia manene ke e kamiu pialora amio mamiu piala lala, visae aliþere re ga laþas va yar la naña limala plasia, vera na wo na wo. Visae ve sanene, pona yoko avisu kiamiu sur la imi ikik ruru yo rui, ana ve amareran re si kilaen kiamiu ðelaga taþena laþasia.”

<sup>42</sup> Ana Yesu pisayu ðelaga navisokanena kiena ne li na sumonen na lotena lala pa laa sane, pisape “!Amiu le Varasi lala, o! Akila kare amiu pañisi wa, yoko viowa manene laa van amiu. In na nekilia ma naña apisuar ruru ke silaga, asape visae awar kamiu kinanena ve lualima, yoko monar tai va e yuma mana Ntewa, sa naña navisaluaena suma pisa, a asuma akila ke sanene e kamiu sur punu ga, pano-o tol mēna narin mas nen kapis lala a sur mēna la naña sane mrasil. Ana sur kerkeviu la naña navisaluaena pisa, kam na pe asitom re nena poli, sa naña pisape monar amesmes ruru wo, a monar sinemiu si Ntewa a yar taþena lala. Visae sinemiun uararen narin sur la nene marera, naga pogaga, ana pupia sur kerkeviu la nene popon visae asuma akila ga rui, ana pe akilali re nenaga.

43 “!Amiu le Varasi lala, o! Akila kare amiu pañisi wa, yoko viowa van amiu vañisi. Loyuñã e yuñã na leniena lala, sinemiun asape ato luen ga tano e lelen yerkawa lala, a visae ayaloro e marana yeririna lala, sinemiun asape monar avatanon amiu, avio ruru amiu, avisave ‘A ke, navianena wo, pokolulagi!’

44 Yoko viowa manene van amiu vañisi, komin naña kam na sane suri korena ga, kam na sane lotap marua la naña yaru la sinela ãesan rui, ana amialor ke ga meta ea, pe apisu kilia re asape suri kona tai menunú mñeke tano e poli.”

45 Ana e poglis nene, yar tai naña pe manmarua ruru e navisaluaena, naga mñena suña miyagogonia, ana mloge sane visena kiena ne Yesu tol ruru naga amio mñena la naña amiyuñae ke sane naga, ana pisape “!Navianena, nemloge sane sinoñan osape ovisa kare imimi towe mñena ga!”

46 Ana Yesu pisatañea, pisape “!Ee, yoko viowa mñena van amiu li navisaluaen lala! Asumña apisir plan ke sina narin navisaluaena lala e lepas nen nalotena silaga, sane sur urmi la naña asuñã akuanpolo sike e mñasin yar lala asape monar awaria, ana amiu, asuñã ga sanene, pe akululun re nena mrasilmamiu tai vena akilali naña aiila la.

47 Yoko viowa nena van amiu, komin naña kam na asuñã amiyowauia ruru ke tampona kiena navisawalena la kiena ne Ntewa, ana amiu na maran taaga ga sa ke repimiu marua la nanua sumo, naña la ke narui naña añe momñar navisawalena la nene.

48 Kam na amio la nene maran taaga, komin nanua sumo, yermarua la nene la aṁe moṁar navisawalena lala, ana nanagane kam na akekaran ke yuṁaena ken la nene, kam na asikol ke si ne naṁa asuṁa amioa ke kiela tampona lala.

49 “Kam na sane na visena na manmaruaena kiena ne Ntewa naṁa pisa nanua sumo, naṁa pisape ‘Yoko neligan kiau navisawalena lala a kiau li nalologena lala imi van la, ana yoko akila kare la, pona yoko awe moṁar la.’

50 Visena nini, kana kinasa sane yoko kam ke narui naṁa akus nakoena kiena ne naweṁaren navisawalen la punu ga naṁa repimiu na sumo lala aṁe moṁar la, siar e nasiaren purṁes nen yomarava nini.

51 Naga nene siar e Epela nene, pimi tol Sakaraea naṁa repimiu la nene aṁeṁaria likan wonta amio yo wa loyumuṁa e yuṁa wa ṁana ne Ntewa. Lelaga nane nevisa van amiu ne, sane nakoena na kuruta kana navisawalena lala kiena ne Ntewa sike e kam nanagane.

52 “Ee, piowa pan amiu yaru na kilia ruruen navisaluaena lala, komin kam ke naṁa amlawan ki na pulutava na kiliaena, ana kam na pe apa re si loyumuṁa e poli, a asuṁa asuwo ke mrapa pan yar taṁena la naṁa sinelan asape ava loyumuṁa.”

53 Ana Yesu pisa pa visena la nene, molue petan yuṁa nene pano, ana navianen navisaluaena lala amio Varasi lala sinela mlaeen naga paṁisi, naṁa sinela mimi kar paṁisi. Ana la apanon Yesu silaga, asuṁa akuan ke visen ṁarera a naviunen ṁarera la pania vena ayurli naga, ana akilali

m̃ena naṣa asape naga visa visena laṣasa naṣa ve mesmes re.

<sup>54</sup> La apanon Yesu sa naṣa naga pe sur tetan tai, komin naṣa sinelan asape alual kiena visena laṣas naṣa torokin aliṣere naga vanonia.

## 12

*Navisawanena lala naṣa tapolou yoko aim akate e yometava*

*Matiu 10:26-27*

<sup>1</sup> Ana ṣina la apim ke puna Yesu na wa, la ataulu manu mok liu, a poglis naṣa apim ke lele taaga sanene, yo ve tokaki ga, a asum̃a apieyepal kare ke ga lala lala. Ana pogos naṣa Yesu pe pis re pan la poli wa, pis ṣesan pa kiena nalogena lala, pisape “Kam na avisuar ruru amiu e ṣelaga viowa kiena ne Varasi lala, komin naṣa la asum̃a apivis ke ga e gola, la asum̃a apis vilave ke sanene, ana apisokan ga ne. Pelaga viowa kien la nene kilia va tolkare yar taṣena lala, sa naṣa is na kilaparavi naga ve tokak ga ana ṣarmake puluyavi na kilaparavi nene veraga.

<sup>2</sup> Sur viowa make ga naṣa yar la ne sanene asum̃a amiyum̃aen vinaun ke na, pona naṣa apisawan ke ga, yoko amolmolue e yo metava na wa, vena yar punu ga akilia.

<sup>3</sup> Visena ya naṣa yar pisa ke ga e yemalolo, yoko monar aloge sina ko legiena, a sur la naṣa yar pisa mumun ke ga m̃ana loyuma, yoko monar avion manene si va metava e maran yar make ga, vena yar make ga akilia aloge.”

*Nalogenena kiena Yesu naga monar ve maraun re yaru*

*Matiu 10:28-31*

<sup>4</sup> Ana Yesu pisa m̃ena pa kiena nalogenena lala, pisape “Erau lala, neviša van amiu sanini, nesape ve amaraun re la naþa akilia awem̃ar ga tasnemiū mare, ana siraunia taþatete si akila sur tai va ninumiū.

<sup>5</sup> Ana in na sineun nesape nevis ruru van amiu nesape yoko amaraun yar ai? Yoko monar amaraun nena Ntewa, naþa naga kilia kilam̃ar þesan tasnemiū sumo, a siraunia kilia kuan ninumiū vito e lele na logeen viowa. Lelaga þa, yar ne nanene na monar amaraunia.

<sup>6</sup> Ana visae amaraunia, yoko taþatete si amaraun sur tai, komin Ntewa na sum̃a pisuar ruru amiu m̃aga, sitoñal amiu m̃aga. Asitomli narin ninlaea la naþa la moki kar ga asike ne, sa ga kororaki, a yar la asuñã aþiliwilin ke la lima e ga e narin varu tai, ana Ntewa naga sitoñal make la ga peve taaga silaga, pe sinen þesan la re nena poli.

<sup>7</sup> A vilþarimiu m̃ena lala, moki paþisi, ana naga polo make vilþarimiu la peve taaga na sike ne. A Ntewa na pisu amiu na po paþisi, taulu ninlaea la nene, ana yoko visuar amiu e sur punu ga na kiamiu malena lala.”

*Yar naþa pisawal pisape naga pe kiena ne Yesu Matiu 10:32-33, 12:32, 10:19-20*

<sup>8</sup> Ana Yesu pisape “Yar a naþa pisawal e maran yar lala pisape naga pe kiau tai, yoko inu Narina ne Yeririna inu m̃ena nevisawal e marana ne

navisi lala nae ma e peni nevisave yar nene naga pe kiau.

<sup>9</sup> Ana yar a naña pisawal e maran yar lala pisape pe pe kiau re poli, yoko inu Narina ne Yeririna inu mēna nevisawal e marana yar lala nevisave yaru nene na pe pe kiau re poli.

<sup>10</sup> “Mlamulen viowa amio visen viowa lala, a visena naña kila kare inu Narina ne Yeririna, Ntewa kilia viewo ke yar vanon na wa. A yar naña kila kare sur wa kiena ne Ninuna Wa, pisayu yuñāena kiena ne Ninuna Wa pisape Yermare Lego ga miyuñāenia, yar na sanene Ntewa taḡatete viewo pogos tai.”

<sup>11</sup> “A visae pogos laḡasia, yar la sinela kar amiu, yoko avis van amiu. Yoko akilia aure amiu ava asuñal ase maran yerkawa lala na yuñā na leniena, pona kumali, ana ve asitom manene re avisave yoko akilia avisatamē la ve sanape ne, pona yoko avisa visena ya na van la ne.

<sup>12</sup> E nena e aora ga nene, yoko Ninuna Wa ga iila amiu, vian amiu e visena ya naña akilia avisa.”

*Pakaiwa na yaru na sur moki naña pe sitom ruru re kiena malena poli*

<sup>13</sup> Ana yaru na ḡina nene tai pion ke pa Yesu, pisape “Navianena, wolai suñā kila kare in ke ne, pe mliḡere ruru re lalimana arimamimi pan in poli. Popon ovisa vania monar kila mesmes ga van inu.”

14 Ana Yesu pisatañea, pisape “Peraga yaru, sur nene ve in re na nekila. In na pe nepe yar na liṣereen re yar poli.”

15 Sanene, Yesu pe kila re sa naṣa yar nene pisa poli, ana mla visena tai pan la e lepas na sinesunen manenea. Naga pisape “Monar avisu ruruia, pe pon re avieluen manene yar taṣena la poli, sinemiun manene laa asape awar kiela sur lala. Kieta malena pe su re e sur moki la naṣa towar poli, ana kieta malena na suñal ga sike e sur taṣena.”

16 Ana e nene Yesu sikol kiena visena pa laa sane, naga pisa ṣakaiwa tai pan la, pisape “Yar na sur moki tai, kiena porotano keviu paṣisi, a po mña paṣisi, ana kana lokove la ṣar kinanen moki paṣisi.

17 Ana yar naṣa pisu kinanena la nene, sitom ṣele narui, pisape yoko naga kila ve sanape ne, yoko ligan ruru kana kinanena la nene su pe ne, komin kiena yuñā na kinanena lala a kiena yo taṣena la puleule make rui.

18 Ana yar naṣani pisape ‘Yoko nowe plan ga kiau yuñā na kinanena na urmarua la nene, ana nekila si urviu laṣasa, naṣa akerkeviu laa sane, atorokin kinanen make la nene amio kiau sur moki taṣena la naṣa sike ne.

19 Pogos naṣa nekila pae, yoko nevisave in na sane in ke narui, in na nopo laa narui. ! Lelaga ṣa, yoko neloge wo vaṣisi! Kiau sur moki la nene, yoko nakan la mña sanene vano-o, la avisuar ruru inu e kas ve moki. E pogos nene, in na taṣatete si neyuñae narui, yoko in na nakan

ga ya naña in na sineunia, yoko nomun korena ga suria, sane nesu luen ga e malena wo narui.'

<sup>20</sup> "Yar nene sitomiyu ke sanene pano, ana mninue ga, naga ke naña Ntewa kila ruru ke sape vis van narui, visave 'Peraga yaru, ko na ope wowe ga. Yemalo ga nini, nesape nelalua si kioña malena vetan ko. A kioña sur moki la naña om̄areran omiyuwon polo pe kioña sike ne, yoko a ne ve kiena si narui?' "

<sup>21</sup> Ana Yesu pisa pan la, pisape "Yoko ve sa ke nene narui va la naña amiyuwon polo ke kiela sur lala, la ape yar na sur moki e yomarava nini, ana la pe ape yar na sur moki re nenaga e lepas kiena ne Ntewa."

*Yesu pian la sanapen yar naña sitom manene kiena malena*

*Matiu 6:25-34*

<sup>22</sup> Ana Yesu pisa m̄ena pan kiena yeririna lala, pisape "Visae sanene, in na nevisa van amiu, nevisave, pe pon re kiamiu sitomena la ulen manene kiamiu yuññaena na visuar amiuen ga la poli, naña apiuviun ke asape '?Yoko telual kata kinanena pe ne?' pona '?Yoko tetol m̄ata kulmrae na yenen sanape ne?'

<sup>23</sup> Sitomen la nene pe mesmes re poli, komin kiamiu malena naga to laa metavan kinanena, a yepemiu na to laa metavan kulmrae.

<sup>24</sup> Asitomli sako la ne akaka kar ke la ne. La nene pe amapla re lokove po, la pe apanon re añar kinanena pimi po, a pe lelen kala kinanena re tai naña awarpolo se poli. Ana Ntewa pagan la ke ne, a e kiena navisuena, naga pisu amiu ato



manene laa metavan manu la naŕani, ana naga monar visuar amiu manene laa na wa taulu la.

<sup>25</sup> ?Asitom asape yar naŕa naga sitom manene laa kiena malena naga kilia kila kiena malena naŕa plas imi ve piavi li laa sane?

<sup>26</sup> Peraga, pe sa re nene po, komin naŕa kam na taŕatete akila narin sur tai ne sanene, po pon kam na ve asitom manene re sur taŕena lala e kiamiu malena.

<sup>27</sup> “Asitomli meme tanea la ne pitotovi kar ke ga la ne. La na pe amiyuñae re poli, a pe asuluwo re ñala kulmrae la poli. Ana nevisa van amiu, ŕarin suŕe Solomon nanua sumo, naga pe yar na sur moki a naga kiena sur make ga, ana ñana kulsota pe miyowau ruru re poli sane meme la nene.

<sup>28</sup> Meme la nene na legiena taaga ga, yoko peni ga na asikapi la, ana Ntewa sumã miyowauia ruru la paŕisi. ?Ana asitom asape yoko taŕatete Ntewa war kulsota van amiu? Peraga, kam na pe apiawa re nena ñarera e naga poli.

<sup>29</sup> Komin sur ne la na nene, pe pon re sinemiu ulen manene sitomena, naŕa asape ‘?Sanape na yoko tekinana, pona tomun suria, pona telual ñata kulsota?’ Pe pon re asitom manene sur la sanene poli.

<sup>30</sup> Ee lelaga ŕa, yar make ga lala na purvanua kerkeviu na yomarava nini la asumã asitom manene sur la ne sanene silaga, ana amiu na, Arimamiu kilia pa rui sape yoko monar awar sur la nene.

<sup>31</sup> Sur naŕa asitom ŕesan ve keviu e kiamiu malena, naga navesuŕenena kiena ne Ntewa. A

visae akila sanene, yoko naga la m̃ena sur taṓena la nene van amiu.

<sup>32</sup> Lelaga ṓa, kiau narin sipsip lala, Ari-mamiu sinenan manene paṓisi sape taṓan amiu aimi avesuṓen kiena yeririna lala, ana kam na taṓatete sinemiu konan sur tai, yoko suri punu ga woga ga van amiu.”

*Yar naṓa naga pe yar na suri moki*

*Matiu 6:19-21*

<sup>33</sup> Ana Yesu pisapenua “Po pon auliwilin plan kiamiu sur la nene, awar kana varu la va van la naṓa limala korena vena aiila la. Visae akila sanene, sa naṓa aṓar ke kiamiu pupia karo tai naṓa m̃eke ma e peni, naṓa taṓatete viowa pogos tai, a akokonia ke kiamiu sur moki paṓisi pito ke ea, naṓa akilia awasinea, naṓa yar navinauena taṓatete si warlua vetan amiu, naṓa kirara la taṓatete si akila karea.

<sup>34</sup> Popon sane kam na kiamiu sur nowo la ve moki sanene su ma e peni, komin naṓa yoko kiamiu sitomena lala sulue ga e yo nene naṓa kiamiu sur nowo la sike ea.”

*Nalogenā la monar asu ruruian naṓa Suṓe wasuṓe sina*

*Matiu 24:42-51; Mak 13:33-36*

<sup>35-36</sup> Ana Yesu pisa m̃ena pan la, pisape “Monar asu ruru silaga vena kiamiu Suṓe imi m̃alivin amiu. Kam na monar ave sa yar na yuṓaena kiena ne yerkawa tai, naṓa mligan la vena va e talopaena tai. A amiyowau ruruia, a asilan kiela kap̃i lala, asuṓalu ga asuṓa ga, ana pog ya naṓa

kiela yerkawa imi m̃alivin la, sigariga mratava, ana la asu ruru asike rui, akilia avietavan veraga.

<sup>37</sup> Pupia navisa ruruena sike e yar la naṗa amiyum̃ae sanene, pogos naṗa kiela yerkawa pimi m̃alivin la, ana asum̃ate m̃a naga, atavilo ga asum̃a ga. Yokorena kiela yerkawa kekaran la vaṗisi, ana yoko naga va yowau, siraunia imi ana la aiilan ga naṗa vio la vena atotano e kana lelen kinanena, naga piovion kala kinanena tanea nene.

<sup>38</sup> Pe sur koren ga visae yemalo rui, pona pa ko yepelilika la ne, pona lavis lakaporo kokoreko, ana visae yerkawa naṗani imi lual kiena yeririna la atavilon ke sanene wa, ṗisi na naga kila wo manene laa van la sane wa.

<sup>39</sup> “Ana maran taaga sina ga, visae yar tai kilia ruru pogos naṗa yoko yar na vinauena tai imi m̃ana, yoko yar nene taṗatete ligan m̃ana yum̃a ana va koyo tai, ana naga monar su ruru ga sum̃ate m̃aga.

<sup>40</sup> Ana visae sanene, kam m̃ena monar asuru-ruia, asum̃ate naṗa inu Narina ne Yeririna neim nom̃alivi, komin naṗa yoko neim nom̃alivin amiu sina e pogos tai naṗa pe yar tai kilia re poli, pona sitom ke sape yoko nowasuṗe inu ea.”

*Pakaiwa na yar na yum̃aena naṗa kiena yerkawa ṗasuṗe si pimi*

*Matiu 24:45-51*

<sup>41</sup> Ana Pita piun tan Yesu, pisape “? Suṗe, ṗakaiwa naṗa opisa ga na wa, opisa ga pan imimi imimi kiom̃a li nalologena lala, pona pe kien yaru make ga?”

<sup>42</sup> Ana Yesu pe pisatamē ruru re poli, ana pisatamēa e p̄akaiwa tai.

Pakaiwa nena sanini “?Visae yar na yuṁaena tai, naṣa naga pe manmarua ruru ea, a naga p̄uarar ruru yuṁaena nene, naga yuṁae sanape? Visae kiena yerkaŋa ligan yo vena va perina, ana yerkaŋa naṣani ligan kiena yuṁaena lala se e limana. Ana yar nene naga visuar ruru yar na yuṁaena taṣena lala, yoko uarar ruru yuṁaena la nene.

<sup>43</sup> A pogos naṣa yerkaŋa wasuṣe sina, yoko lual sane yar na kiena yuṁaena naṣani, suṁa p̄uarar ruru ke yuṁaena la naṣa na wa. Ana e pogos nene, yar na yuṁaena naṣani kilia loge wo vaṣisi,

<sup>44</sup> komin yoko yerkaŋa naṣani ligan make kiena sur la e limana ne. Ee, a yoko Ntewa ṁena ga kila ve sa ke ga.

<sup>45</sup> “Ana visae yar na yuṁaena naṣani yuṁae viowa ga, ana pogos naṣa kiena yerkaŋa mligan yo pa sike perina, yoko naga sitom visave ‘E, yerkaŋa nene pa sike gare piavi laa narui, pona ve imi re si yo.’ Ana yoko naga suṁalu kila viowa va kiena yar na yuṁaena lala, pona sira na yuṁaena lala, a yoko naga suṁa kinanan kilavaru kiena ne yerkaŋa naṣani, a va mun luen ga wii e legiena punu ga.

<sup>46</sup> Ana yoko yerkaŋa naṣani wasuṣe sina e legiena tai naṣa yar na yuṁaena nene ilan ga, e pogos tai naṣa yar nene pe sitom re pisape yoko imi e poli. Ana yoko yerkaŋa naṣani la pupia nakoena tai van yar nene, naṣa yoko kila naga

va sike e yo kiena ne þarmãrera lala.

<sup>47</sup> “Yar na yuãaena naþa kilia ruru ya naþa kiena yerka wa sinenan pisape monar kila, ana siraunia naga pe kila re poli, yoko awe kare naga vaþisi.

<sup>48</sup> A yar na yuãaena naþa kila piowa sane popon awe kare naga, ana komin naga mninuga, yoko taþatete awe manene naga.

“Yar naþa Ntewa mla keviu pania, Ntewa sinenan pisape visu yaru nene yuãae ve keviu mña amio. A yar naþa visae yar la amligan sur la moki se limana, yoko aviun ke sina sur ve moki vania va laa sane na wa.”

*Yesu pe purþes nen yar na kaween yaru*

*Matiu 10:34-36*

<sup>49</sup> Ana Yesu pisape “In na nepimin nena nesape neligan kapi e yomarava nini, a popon manene visae kapi nene vivaga rui, ana pere wa.

<sup>50</sup> Ana pupia yuãaena tai sike vamon inu wa, vena in na monar neva nowarpoyo ea, a nanagane in na nakawean in manene ke vanon rui. Popon sur nene imi vilaga, vena nekilia nekila makea.

<sup>51</sup> ?Kam na asitom ke asape in na nepimin nekila sa naþa pupia suãare imi sike e yomarava? Peraga, in na pe nepimin re neligan suãare e poli, ana in na nepimin nekila þelaga na viaþaena imi ve keviu.

<sup>52</sup> Siar nanagane, pona e uña tai, yar la lima asike ea, ana yoko la ve telu aviaþa vetan la ve lua, pona la lua aviaþa vetan la ve telu.

53 Yoko yar la asuñña aviaviaña, naña yoko ñee lala akawe arimala lala, arimala lala akawe narila ñee lala, a anela lala akawe narila sira ñee lala, a sira ñee lala akawe anela lala, a yoko anen simem lala yoko akawe sira la naña atalopa amio narila na yermene lala, a yoko sira la nañani akawe anela simem la nene.”

*Monar avisu kilale kile na pogos kiena ne Yesu  
Matiu 16:2-3*

54 Ana Yesu pis sina ga pa ñina lala, pisape “Pogos naña ita tevisu pupia malo ñeke e yo naña lagi molue ke kom ea, tekilia tesape ñisi na yua wowo, a ve ve piavi re yoko yua nene imi.

55 A pogos naña visae teloge kieta lagi ura yui, nanene na tekilia tesape yepisusun vañisi ne, a yokorena monar ve sa ga nene narui.

56 ?Nanene narui, nane asuñña apisu kilale ke kile lala na sinapane a na yomarava nini narui, avisave yoko pogos ve sanape pona ve sanape, ana sanapen naña pe apisu kilale re kiau kile la poli, na pupia pogos nanagane naña nesike nemio amiu ea? ?Pona kam na yepemiu mavin ga visu kilaleen yo? Aulai, kam na apilaven manene laa kiamiu visen koren la nene pañisi wa.

57 “Popon kam akilali naña akilia towe laa narui sane mrapa ya naña mesmesun alilulia.

58 Visae pogos tai oveveyun sur tai omio yar tai, ana naga sinenan pisape were ko ova osuññalu ose marana ne yar naliñereena, popon okilayonli naña vena ovis ruru omio naga sumo wa, pogos naña pe atol re kumali poli wa. Visae peraga, pona naga ligan ko e limana ne yerkaawa na

liṽereen yar yo, ana yerkawa naṽani pona naga ligan ko mēna ova e limana ne yar na taren yaru lala, a yaru na taren yar lala pona aligan ko e yuṽa nakoena yo.

<sup>59</sup> Lelaga, nevisa van ko sanini, nesape visae sanene, yoko taṽatete si omolue e yuṽa nakoena, vano-o oul plan make kiomā nakoena sumo wa, ṽisi na okilia omolue sina.”

“Ana visena nini pe lelaga e kiamiu malena na yomarava nini, a pe lelaga mēna e lepas na pun amiu amio Ntewa.”

## 13

### *Visae ve ovilopu ko re yoko omare*

<sup>1</sup> Ana yeririna laṽas naṽa asike e pogos nene, la asunyu pa Yesu e lepas kiena ne le Kalele laṽasia, naṽa yerkawa nae Rom naṽa Paelat kila ṽelaga piowa tai pan la. Apisape “La nene, asike e Yuṽa Wa mēna ne Ntewa, ana pogos nena naṽa amlotun ke Ntewa akila kuṽaṽaena pania, Paelat la apim amial momāar la. A la aṽalelar kuruta kan la nene amio kuruta na kuṽaṽaena nene naṽa la asumā akila ke ne.”

Ana pogos naṽa apisa sur nene pa Yesu, la asitom pa rui asape sur viowa nene naṽa pimi mālavin la nene, pona nakoena kiena ne Ntewa tai nene yo komin kiela sur viowa laṽas naṽa akila.

<sup>2</sup> Ana Yesu pisataṽe la, pisape “?Kam na apisu le Kalele la naṽa kiela marena piowa sanene, asitom sanape? ?Pona kam na asitom ke asape

la nene na ape yar viowa la lala, taulu le Kalele taņena lala, pona kiela nakoarena ga?

<sup>3</sup> In na sineun nesape nevisa van amiu nevisave peraga, pe sa re nene poli. Ana kam na monar avisuar ruruia, komin visae ve avilopu amiu re, yoko kam mēna amare e ŗelaga tai ve sa ke nene.

<sup>4</sup> A kam na asitomyuli mēna yuņa na kirakiravaena naņa mēke e pulkumali naņa Siloam. Naga mon manene metava paņisi, ana poglis nanua mloru ne, ana kowar yar lala, la lualima taaga pa orelu [18] amare. ?Sanapen la nene? ? Pona kam na asitom ke asape la mēna apiowa laa taulu le Yerusalem taņena lala, pona nanene na sane kiela nakoarena ga ne?

<sup>5</sup> Ana peraga, naga mēna pe sa re nene poli. Ana in na nevisa si van amiu, kam na monar avisuar ruru amiu, komin visae ve avilopu amiu re, yoko kam mēna amare ke ga e ŗelaga tai ve sa nene.”

*Pakaiwa na purpiliva naņa pe ŗar re mras poli*

<sup>6</sup> Ana Yesu pisa sina ŗakaiwa tai, naņa pisa sanini, pisape “Yar tai, kana purpiliva tai kapuru sike e kana lokove. Ana pogos tai yar naņani pimin purlaki nena, sinenan pisape visulia ŗar mņa mrasa pona peraga. Ana pimi pisulia, māl purlaki naņa pe ŗar re nena mras poli.

<sup>7</sup> Ana pis pa yar naņa pisuar ke kana lokove, pisape ‘Nanagane tōl kas telu narui naņa nepimin nakale mras nen purpiliva nini, ana peraga. Sineu maren rui, naga mono korenan ke ga yo wo nene, yoko otelua ga vano.’



<sup>8</sup> “Ana yar nene sinen miye purpiliva nañani, pisa pa kiena yerkawa, pisape ‘Visae sanene, yoko teliganli mon ña tol si kas ve taaga. Yoko nekilayonli naña nekila ruru sumo, yoko nekilvivi purp̄esa, a yoko nokoven sin puluk lañas va ea vena kila kapur wo.

<sup>9</sup> Ana visae kapur wo, war towe ña mras lañas e kas na sirau, yoko kilia suña ga sanene, ana visae peraga, naga narui yoko otelua ga na wa.’ ”

Ana ãakaiwa nene pisayu ke sape narin pulmas teke ga wa naña yaru la akilia avilon la, visae peraga, yoko Ntewa la nakoena van la.

*Yesu kila ruru sira marua tai e Legiena Wa*

<sup>10</sup> Ana e Legiena Wa tai, Yesu suña pian ke yeririna lala loyuma e kiela yuma na leniena.

<sup>11</sup> Ana e yo nene, sira marua tai suña ea, naña ninuna na maiena viowa sike ea. Ana ninuna nene kila naga pa tol kas lualima taaga pa orelu [18] rui, kila ñasina ne sira nene pulu nena pañisi, naga suñalu mesmes ãele sina.

<sup>12</sup> Ana pogos naña Yesu pisuia, pio pimi, pisa pania, pisape “Sira marua, nevisa sanini, nevisave ko, inanena naña piar ko ke ne, ligan ko ga nanagane.”

<sup>13</sup> A Yesu mligan limana tea amio visena nene, ana ñasina pimi po ruru veraga e nena e pog nañani, ana sira nañani mloge po pañisi, mieluar Ntewa.

<sup>14</sup> Ana nasumonen na yuma na leniena nañani sinen kar Yesu vanon naña kila ruru sira naña e Legiena Wa. Ana pis pa yeririna lala, pisape “Sa naña tekilia rui, tekilia teyuma e legiena ve orai,

a legiena ve taaga ve teyuñae re. Visae sinemiun naña akila plan maiena vetan amiu, popon aimi e legiena orai la nene, ana Legiena Wa na sa nini pe pe kana pogos re nene poli.”

<sup>15</sup> Ana Suñe pisatamñea, pisape “?Sanape? ? Pona akepu ke kiamiu puluk la e Legiena Wa yo, pona pe akila re poli? ?Pona apagan ke kiamiu sur mal lala, pona amla wii pan la e Legiena Wa yo, pona pe akila re poli? ?Ana vanon ya ne kam na pe akekaran re naña nekila suri wo e sira marua nene? !Kam na ape yar navilavenen ga vis korenena nene!

<sup>16</sup> Sira marua nini, naga vineta tai naña ita punu ga tomolue e lus kiena ne Epraam, ana Yermare Lego piar manene panon inanena nene mñene kas lualima taaga pa orelu rui. Ana in na nepisu sane Legiena Wa naga torokin ga naña tourelua naga e yo viowa naña naga sike ea.”

<sup>17</sup> A pogos naña Yesu pisa visena nene, kila kiena nasinekar la nañani amloge amawa pañisi e marana ne yeririna lala. Ana yar tañena lala, la amloge akekara pañisi e yumñaena namñareraena wo la naña Yesu kila pan la.

*Pakaiwa na kurus nen mrapa*

*Matiu 13:31-32; Mak 4:30-32*

<sup>18</sup> Ana Yesu pisa ke sina ga, pisape “?Yoko nevisa visena ya ne van amiu vena kila na akilia sane nasuñenena kiena ne Ntewa naga sanape? Yoko nevisave nasuñenena nene naga sane sur ya?

<sup>19</sup> Yoko nekilali naña nekila merarava van amiu e ãakaiwa nini, naña pisape: Nasuñenena

nene, naga sane kurus nen mrapa naña mloru pito pelan te laki tai. Kurus nene na ve tokak pañisi, ana pogos naña kapuru, pimi pe purlaki tai naña keviu manene laa, ana manu la akila mñala ponovi lala e kana korowas lala.”

*Pakaiwa na is*  
*Matiu 13:33*

<sup>20</sup> Ana Yesu pisa sina ðakaiwa tañena pan la, pisape “?Pona nevisave nasuñenena kiena ne Ntewa sa si ya narui?

<sup>21</sup> Nasuñenena nene, naga sane sira tai ðalelar is amio yavi na kilaparavi pa e pupia pialora tai, ana narin is nañani kila kilaparavi la punu nene mlapa.”

*Mrapa lua ga*  
*Matiu 7:13-14,21-23*

<sup>22</sup> Ana Yesu mla si kiena mrapa, sinenan pisape va ma Yerusalem. Ana pogos naña pa sane, pa kome pulkumali lala, sumña pian ke yeririna lala.

<sup>23</sup> Ana yar tai piun tania, pisape “?Suñe, la naña yoko atol malena la moki, pona pe la moki manene re poli?”

<sup>24</sup> Ana Yesu pisatañe la, pisape “Monar akilay-onli naña ava loyuma e pulutava tañena nene, naña ve tokak la ga. Nepisa ke lelaga na pan amiu ne, nesape yoko yar la ve moki naña sinelan asape ava loyuma, ana yoko tañatete akila.

<sup>25</sup> Nanene komin naña siraunia, yoko yerkawa na yuma, naga visu sane toroki rui, ana yoko naga sumñalu, kotava ruru sina. E pogos nene, yoko kam ve moki naña aim awon amiu ase

mratava nene, asigar ga avio, avisave ‘Suṕe-o, awis ovietavan imimi!’ Ana yoko yerkawa naṕani visataṁe ga sanini visave ‘Peraga o, nemninue amiu nena ga! Kam na yer pe la nene?’

<sup>26</sup> Ana yoko akilali naṕa avisa van e pogos nene, avisave ‘?Ana sanape, ko na pe ositoṁal re si naṕa osape ita ke narui nanua tesuṁa tekinan ke lele taaga ne? Imimi ke narui naṕa opam opian imimi ke e yometava la nene e kiamimi pulkumali lala?’

<sup>27</sup> Ana yoko naga visa van la, visave ‘In na nepisa pan amiu yam tai rui, nesape nemninue amiu nena ga, nesape kam na yer pe la nene. Nekilia nesape kam la nene kam na yar na kilaen ga ṕelaga viowa lala. !Pogaga, kam na aure matan inu nagane!’

<sup>28</sup> E pogos nene, yoko kam na aloge viowa vaṕisi, yoko atag vano-o ṕisa, asuṁa akar maluemi. Nanene komin naṕa yoko kam na avisu yeririna wo lala kiena ne Ntewa, naṕa sane Epraam, Aisak, Sekop, a navisawalen taṕena ṁena ga lala, la asu ruru ga asike loyuṁa e kiena nasuṕenena ana kam na akoven amiu asuṁalu asuṁa ga vanua sanene.

<sup>29</sup> “E pogos nene, yoko yeririna taṕena la ve moki naṕa amolue e mrapun yomarava varoka, aimi atotano vena akinana e pupia ṕaṕagena loyuṁa e navesuṕenena kiena ne Ntewa, ana kam na taṕatete ava loyuṁa.”

<sup>30</sup> Ana Yesu pisa make kiena visena e pogos

nene, pisape “Ana yar la naþa asirau, þisi na la asumo, a la naþa asumo, þisi na la asirau.”

*Parin Suþe Erot sape weñar Yesu*

*Matiu 23:37-39*

<sup>31</sup> Ana e pogos nene naþa Yesu pa ke ma Yerusalem wa, Varasi laþas apim puna, apisawal pania, apisape “Pona ko pe okilia re poli yo, naþa Parin Suþe Erot, naga pisaar rui pisape yoko weñar ko. Popon oure ova gar Yutea sumo wa, komin naga pisuar ke lepas nini.”

<sup>32</sup> Ana Yesu pisatañe la, pisape “In na pe nesitom re kawe nene nesape naga pe yar tai naþa kilia kila sur tai van inu poli. Yoko ava avisawal e marana, avisave in na nekila ke ne kiau yuñæna sumo wa. Avisava vania avisave in na nomñene plan ke yermare lala, a nekila ruru ke namaiena lala, a yoko neyumæ ve sanene þane, amio peni, amio mñena vewo, vano-o nevisu sane nekila make nenaga.

<sup>33</sup> Ana nekilia nevisa van amiu, sane ve asitom manene in re, komin naþa e ke e legiena la nene narui, in na nomolue nepa ke sanene narui. Monar neva netol ke ne yo ma Yerusalem wa, komin naþa nepisu sane siar nanua sumo yar la añe moñar kiena navisawalena lala e ke e yo nena nene narui.”

*Yesu sinen miye Yerusalem*

<sup>34</sup> Ana e pogos nene, Yesu sitom manene Yerusalem pano-o taginia, pisape “Yerusalem o! Komin ya ne omñe moñar ke navisawalena lala, a okove moñar ke yar la naþa Ntewa mligan la pimi pan ko? Yam mok liu naþa sineun nesape

neligan lumãau yervivi kioũa yeririna lala, sa naũa lakaporo mligan narina lala apim atapolou vatanon kupena, ana kioũa yeririna lala pe akekaran re poli.

<sup>35</sup> Ana opisu ke ne, Ntewa pilon ke mñasina pan ko narui, ana naga pitetalia inu nepim ães e nini, ana nevisa van ko, nesape yoko kioũa yeririna lala taãatete si alual inu, vano-o tol pogos naũa avisu kilale inu, avisayu inu, avisave

‘!Ntewa na mava, ovisa ruru naga naũa pimi e kioũa kia!’ ”

## 14

### *Yesu kila ruru namaiena tai*

<sup>1</sup> Ana e Legiena Wa tai, nasumonena tai kiena ne Varasi lala ãere Yesu pa kinan mñana. Ana yar taãena mñana la ãasia asike e pogos nene, naũa pe sinelan re Yesu poli, la asumũa apisusu naga visae kila sur tai naũa ve memes re, la akilia akila sur tai vania.

<sup>2</sup> Ana yar namaiena tai sike loyuũa amio la e pogos nene, naũa yar nena yepena la sirorop paãisi. Ana Yesu pisu yar nene,

<sup>3</sup> ana pis pa navianena navisaluaena lala, piun tan la pisape “?Sanape e lepas na kieta navisaluaena? ?Pisape tekilia tekila ruru maiena e Legiena Wa, pona pisaluãar pisape ve tekila ruru re?”

<sup>4</sup> Ana pogos naũa Yesu piun naviunena nene, apisu sane taãatete avisatamnea, atopur nenaga. Ana Yesu ãere yar naũani pimi lavis puna, kila ruru sina, ana pisape kilia wasuãe si va ga uũa.

<sup>5</sup> Ana naga pis pa la naña asike ne, pisape “Kam na asitomyulia. Visae kam yar tai nene, e Legiena Wa tai, narina tai pona kiena sur mali tai va loru vito e p̃iliṗili na wii tai, ana yoko okila ve sanape? ?Yoko ovitaṗilin ne, naña ova ga ourelua si ne, pona ovisave: Ke, piowa narui e, nagane na Legiena Wa nini narui, navisaluaena pisape ve neyuṁṁae re e Legiena Wa, ana pona naruu pona kiau sur mali nene mon ṁṁa e p̃iliṗili wa, neva ga nourelua peni? Peraga, pona yoko ovitaṗilin ga ourelua yo.”

<sup>6</sup> Ana la amninue kare narui aṁṁa yoko avisa-taṁṁe si naga e lepas nene ve sanape, la asupur ga asike na.

*Pe pon re yar ga visirlua sina naga poli*

<sup>7</sup> Ana pogos naña apim asun ke naña atotano e kinanena nene, Yesu pisu kilale naña la taṗena laṗas naña ṗar na ṗaṗagena pio la apimi, sinelan manene alual yo tai naña po, la apa atowo lelen yerkaṁwa la metava. Ana Yesu pisu kiela ṗelaga navilaveena la nene, ana pisa pan la pisape

<sup>8</sup> “Visae pogos tai avio kon ova e kinanena natalopaena tai, pona sur tai sane ṗaṗagena, ana pe pon re ovitaṗilin naña ova oto nena tano e lelen yerkaṁwa la poli. Pona yo nene akila ruru monṁṁate ke pupia yerkaṁwa tai yo, ana pe okilia re poli,

<sup>9</sup> ana yoko ṗar na ṗaṗagena imi visa van ko, visave ‘Ake wolai, pe sineyeena paṗisi, ana yoko otom ke ne tano wa, komin naña oteke e lelen kiau yerkaṁwa naṁṁa.’ Ana yoko omawa ologe

viowa vaḡisi, ana yoko monar oto si tano, okilali naḡa olual narin pulmas tai tano vena okilia olawan maramña ea.

<sup>10</sup> “Ana ḡelaga wo na sanini, visae avio ko ova e kinanena tai, pogos naḡa om̃alivi ea, yoko ova oto ga tano omio yar kar ga lala. Ana visae ḡar na ḡaḡagena vim visu ko, visave ‘E, yerkawa, nepisuar ruru lelemña teke meta ma e ne rui. Yoko ita lua tevavini, neligan ruru ko otea.’ Ana e pogos nene, okilia ologe wo vaḡisi, naḡa ḡar na ḡaḡagena pisirlua ko sanene e maran yeririna taḡena la naḡa akinan ke lele taaga.

<sup>11</sup> Naga sanene narui, sane yar naḡa naga ga pisirlua naga, yoko aligan naga mon tano, ana yaru naḡa mligan naga mon tano, yoko avisirlua naga.”

*Popon ovio m̃ena yar naḡa limana korena ga imi e kioḡa ḡaḡagena*

<sup>12</sup> Ana e pogos nene, Yesu pisa m̃ena visena tai pa yar naḡa pio naga pimi kinan m̃ana, pisa pania, pisape “Nagane, tepisu pogos naḡa visae yar la akila kinanena tai, la sinelan ga avio kiela erau wo lala, pona kiela wolai lala, pona kiela namratava taḡena lala, amio m̃ena pupia yerkawa la naḡa asike lavisin la. Akila ke sanene, komin akilia ke asape visae siraunia, visae la m̃ena akila kinanena pogos tai, yoko monar akila maran sina van la.

<sup>13</sup> Ana ḡelaga wo na kilaen e ḡaḡagena naga pe sa re nene poli. Popon manene ovio yar taḡena lala, sane la naḡa limala korena ga, a



la naŕa tasnela la pioyowa ga, pona laulu lala, pona kilamara ŕala lala, yar la ne sanene, la aim akinana amio ko.

<sup>14</sup> Yar sur la ne sanene la taŕatete akilamaran si van ko pogos tai, ana pogos naŕa Ntewa pisu naŕa okekaran opure la nene apim akinana moŕa, yoko naga kekara vaŕisi. Yoko naga visa ruru ko, a yoko owar kioŕa nalaena wo vanonia, nanene e pogos naŕa naga kila kiena yeririna memes lala amal si vetan marena.”

*Pakaiwa na visawoena*  
*Matiu 22:10*

<sup>15</sup> Ana yar tai toŕa e kinanena nene, naga mloge ŕa naŕa Yesu pisayu ke pisape yoko Ntewa visir plan kiena yar memes lala e legiena maro, ana naga pisape “!Lelaga naŕane, yoko wo manene laa van ita e pogos nene, naŕa ita tesikol ita e pupia ŕaŕagena nene loyuma e nasuŕenena kiena ne Ntewa!”

<sup>16</sup> Yar nene pona naga sitom ke sape naga po narui, ana yar la na sanene la sinelan re vaen loyuma poli, ana Yesu pisa ŕakaiwa tai e lepas nene, naŕa sanini “Yerkawa tai, naga sinenan pisape kila pupia kinanena tai, ana pio yar la moki naŕa aimi.

<sup>17</sup> Ana pogos naŕa kila ruru make sur punu ga ŕisi, naga pitetalia kiena yar tai vena vanon were la naŕa apio la ŕisi rui aimi.

<sup>18</sup> Ana pogos naŕa kana yar nena pimi ŕalivin la, la make ga nene maran taaga asuma akila ke sina ga visena na visawoen suria. Tai pisa sanini, pisape ‘Pogaga, ana in na nopul ga kiau narin porotano tai na wa, ana nepavin ke nesape

nevisulia aña porotano nena sanape wa. Yoko ovisa va yerkawa ovisave pe nasineyeena pañisi ana tařatete neimās nanagane.'

19 A tařena, pisa sanini pisape 'Pogaga, ana in na nopul ga kiau puluk lařas na wa, vena ureen kiau kat lala, ana nesape neva nevisu la lia aña añarera ruru mġaga. Yoko ovisa va yerkawa ovisave pe nasineyeena pañisi, ana in na tařatete neimās nanagane.'

20 A tařena mġena ga, naga pisape 'Pogaga, ana in na nekila ga řařagena na kiau talopaena nanua ga nagane, ana in na nepisu sane tařatete neimās yo, komin sur moki pañisi.'

21 "Ana yar nařani pimi pisawal visena la nařani pan kiena yerkawa, mloge, sinen kar la. Ana naga pitetalia sina kiena yar nařani, pisape 'Pogaga, oyal kawa, ova e narin mrapa la ne lavis ga nařa, ova olual la nařa pe kiela sur re poli, amio la nařa tasnela la pioyowa ga, amio laulu lala, amio kilamara kata lala, ana owere la nene aimi e kieta řařagena.'

22 Ana naga pa kila, ana siraunia řasuře si pimi pun kiena yerkawa, pisape 'Suře, sur nařa opisa řa, nekila rui, a yaru moki apimi, ana yepa keviu mġeke ga wa.'

23 Ana pitetalia ke sina ga, pisape 'Visae sanene, ova sina, ova kare ga yo uņa la e pulkumali, a omġareran kare ga va yar nařa visae olualia, ovisave monar aimi, vena akokonia kiau kove, vena akila řařagena nini imi wo.

24 Tařena la nařa akila ke navisawoen viowa lala, in na nepio ruru la nesape aim e řařagena

nini ða rui, ana nanagane, yoko taþatete nena lala yaru tai kan re narin kinakinas nen kina-nena tai e þaþagena nini þisa, peraga. !Nepisa ruru ga ne!’ ”

*Yesu naga monar to sumo e malena kiena ne kiena nalogena lala*

*Matiu 10:37-38*

<sup>25</sup> Ana Yesu mla sina kiena mrapa, pa ke meta ma Yerusalem na wa, a pupia þina moki la ataveveia. Amiyal ña pano-o, pilopu naga kira pimi pula, pisa pan la pisape

<sup>26</sup> “Yar naþa sitom sape taveve inu, naga monar ligan inu neto nena sumo e kiena malena, in na neto manene laa metavan arimana, pona anena, pona wona, pona narina, pona wenla, pona vinena. Yar naþa pe pisu kilale re kiena malena sane naga pe pe sur re tai poli, naga pe torokin re nena naþa imi sane kiau nalogena poli.

<sup>27</sup> Ana yar naþa sinenan sape imi ve kiau nalogena, naga monar kila sanini. Monar kus kiena lak torovia, taveve inu lue ga, sa naþa kilia tañan naga loge viowa vanon inu.

<sup>28</sup> Po pon asitom ruru ke ne sur nene sumo wa, þisi na avitaþilin visena, avisave sinemiun ataveve inu.

“Nanene naga sa ga naþa yaru tai, visae sitom ke sape kilia kila pupia yuñña tai, naga monar totano, visu ruru ke ne sumo wa, wolo ruru kiena kilavaru nakilaen yuññaena nene, naga monar

visu kilale sane yoko naga torokin kilia kila make pupia yum̃aena nene, pona pe torokin re poli.

<sup>29</sup> Visae peraga, yoko naga siaria, yum̃aen ruru p̃eren yum̃a nena, va laa sane, yoko ilan ga naṣa l̃imana ve plas ruru nena ga ana yoko yum̃aena nene loru m̃eke na. Ana pogos naṣa yar taṣena la aimi avisu yum̃a naṣa komṣas m̃eke na amio kana lepas ne lala, a pe m̃aero pa re e poli wa, yoko avitalia kare yar nene narui, yoko avisave

<sup>30</sup> ‘Ke, yar nene, kiena sitomena po paṣisi. Sinenan sape yum̃aen m̃ana yum̃a, ana pe maplar ruru re kiena yum̃aena po, ana taṣatete nena kila makea.’

<sup>31</sup> “A yar naṣa sinenan sape visaar naṣa yoko imi kila yum̃aena amio inu, naga monar kila sane p̃arin suṣe tai, naṣa yerkawa taṣena sum̃alunia, p̃ere kiena pupia p̃egas nen nakilaen mara tai aim akila mara vania. Li namara kiena ne p̃arin suṣe nene pe la moki re poli sane yerkawa nene, ana p̃arin suṣe nene monar visu ruru sumo, monar sitom ruruia, sane naga kilia taulu pupia p̃egas naṣa pimi ke ne, pona taṣatete tauluia.

<sup>32</sup> Visae visu sane taṣatete kilia kila, naga monar ligan visena vano va yerkawa, pogos naṣa sike perina wa. Naga monar viun tania, visave yoko ul ya naṣa yerkawa nene pisa, vena lalua asu sina e sum̃are. Visae ve sanene, naga monar vatanon yerkawa, tam̃an make nena naga vania.

<sup>33</sup> Ana kam naṣa sinemiun asape aim ataveve inu, monar avisu kilale sane kam m̃ena monar akila ve sanene van inu. Yar naṣa pe tam̃an re kiena malena poli, amio make kiena sur van inu,

naga tařatete kilia imi sane kiau nalogena.”

*Pakaiwa na sive nařa apeven e kinanena*

*Matiu 5:13; Mak 9:50*

<sup>34</sup> Ana Yesu pisa sina řakaiwa tařena pan la, pisape “Sive naga pe sur tai nařa po pařisi, ana visae pogos tai sive nene ve melkalka ruru re sina, tařatete kila kiena yuńaena naapo, a tařatete si sur tai kilia kila imi melkalka ruru sina.

<sup>35</sup> A sive na sanene, tařatete si kilia kila yuńaena wo tařena tai van ko mońa uńa, pona van mńena komńa lokove. Sur nene naga pe na kovenen ga va e kororak narui.

“Naga ke nene narui naga pe kiau totou na kiau nalogena nařa kilalu kiena namńareraena nakilaen kiau yuńaena. Ana yar nařa kiligana teke ea, popon naga loge kilale kiau visena nene.”

## 15

*Yesu kila erau amio yar viowa lala*

<sup>1</sup> Ana e pogos la ne sanene, apisu sane yar lařas nařa yar la pe asitom la re poli, sane yar na takis lala, amio yar tařena la nařa Varasi la asape la apiowa ga, la mńena apim ke lavisin Yesu vena ayagogonia.

<sup>2</sup> Ana pogos nařa Varasi lala amio navianen navisaluaena lala apisu nařa Yesu sinenan pisape sun amio la nene, apisu sane piowa ga, ana asumńa apisa ke apisape “Lelaga kemua nařane, yar nene naga sitom ga li namlamulen viowa la

ne sanene, a silaga sinenan m̃ena sape va kinan lele taaga amio la. ?Pona naga pisu sane la ga kiela p̃elaga po yo, a ita na kieta piowa ga?”

<sup>3</sup> Ana la kiela sitomena sane kila Yesu sun pan la e p̃akaiwa la nãa pisayu sanape nãa naga pimi e yomarava nini vanon yar nãa kilalu mrapa.

*Pakaiwa na sipsip nãa kovio*

*Matu 18:12-14*

<sup>4</sup> Pakaiwa p̃esa kiena ne Yesu e lepas nene naga sanini, nãa pisa pan la, pisape “Yar tai, naga pe yar na vaganen sipsip, ana kiena sipsip lala tol ponotia taaga [100]. Kiena sipsip la moki sanene narui, ana visae pogos tai tai va kovio, yoko naga sitom korenan ga, pona naga sitom vãisi? Yoko naga monar ligan kiena sipsip tãena lala asum̃a ga sanene wa, ana naga vanon nãa kovio, kale m̃a vano-o lualia.

<sup>5</sup> A pogos nãa lualia, kekaran vãisi, yoko kuslua sipsip nãani va e purkaunena, kus wasũe imi.

<sup>6</sup> Ana siraunia, pogos nãa p̃asũe si pitomi tano um̃a, yoko vio namratava la puna pona kiena erau tãena lala vena aimi. Ana naga sunyu van la, visave ‘Aulai, sur tai nini nãa ita tekilia teloge won vãisi. Kiau sipsip tai nãa pa kovio na kovio lue, ana yoko nepanonia, nepa nakale m̃a pano-o, nom̃alia. !Pogos nãa nom̃alia, nekekara na nekekara!’ ”

<sup>7</sup> Ana Yesu pisa meraravan pa Varasi lala, pisape “Ana yoko ve sa ke m̃ena nene ma e peni. Yar mok liu nãa asike e yomarava nini nãa

sane amiu, la asitom ke asape la na apogaga narui, ana asape ma e peni amloge ke pon amiu la ne sanene yo? Ana pogos naþa visae yar namlamulen viowa ve taaga ga, naga vilopu kiena malena, yoko pupia kekaren vaþisi vania ma e peni, naþa va ve keviu re laa sane na wa. Suri ne nanene kila narui inu na nekekararan sunen nemio yar la naþa kam na pe akekararan la re poli.”

*Pakaiwa na kururu varu naþa kovio*

<sup>8</sup> Ana Yesu pisa si þakaiwa tai e lepas nene, pisape “Sira tai, naga kiena kururu varu lualima, naþa mlawan ruru teke e mana loyuma. Ana visae pogos tai, naga wasuþe imi mal tai naþa mloru rui, teke ko yo, yoko naga kila ve sanape narui? Yoko war kapi vivaga, war plan make kiena suri lala, yevan ruru mana loyuma vano vano lualia.

<sup>9</sup> Ana pogos na lualia, yoko vio namratava la puna, pona kiena erau taþena lala, vena aimi. Ana yoko naga sunyu van la, visave ‘Aulai, sur tai nini naþa tekilia teloge won vaþisi. Kiau pupia kilavaru tai nekilaluia pa kovio nenaga, ana siraunia, nakale ma pano-o, nomalia. Pogos naþa nomalia, nekekararan pano-o þisa!’ ”

<sup>10</sup> Ana Yesu pisa meraravan pa Varasi lala, pisape “Ana yoko ve sa mena nene ma e peni. Visae yar na mlamulen viowa ga tai, naga vilon kiena malena, yoko navisi kiena ne Ntewa lala avisu naþa pupia kekarena paþisi ma e peni.”

*Pakaiwa na yaru mee naþa pa kovio*

11 Ana ðakaiwa maro kiena ne Yesu e lepas nene sanini, naþa pisape “Yaru tai, narina na yermene lua, naþa lalua amiyumãe ke amio naga e kiela porotano.

12 Ana pogos tai, prasmaro na lalua nene sumãlu, pisawal pa arimala, pisape ‘Ata, in na sineun nesape nowar kiau kilavaru komþasa naþa na lalumõña nagane ga ne.’

“Ana sur nene pe mesmesun re nena naþa naga viun sanene poli, komin arimana mali sike ga wa, ana arimana pe pis re poli, mliþere make kiena suria, tamãan komþas pa prasmaro nene, a komþas pa mearu.

13 A yokorena yar m̃ee naþani sumã ðiliwilin plan make sur la naþa arimana þar pania, ana siraunia pe piavi re poli, aña ga naga kon make kiena sur lala, þar kiena kilavaru pion pano. Ana naga pa sike e purvanua taþena tai koperin paþisi, ana e yo naþani, naga pa make nenaga e þelaga viowa lala, kan kilavaru naþane pano-o, kila kare make punu nenaga.

14 “Ana naga kilia ruru sane limana plas ruru ga na wa, a e legiena nene, pupia viso pimi tol purvanua naþa naga sike ea, mligan yar m̃ee naþani sike e yo tai naþa m̃arera paþisi.

15 Ana pa kale yumãena tai naþa pona naga kilia yumãen vena tamalia kiena malena, ana pa miyumãe kiena ne yerkawa tai e yo nene, pagan kiena nompui lala. Yar m̃ee naþani, naga pe mesmesun re kila yumãena nene poli, komin naga palia nompui sane ita le Yu la, ana yumãena taaga ga nene naþa naga kilia m̃alia.



16 “Ana miyuñae ña sanene pano-o, ana pe amla re kinanena pan poli, a pe ñal re mrapa na lualen kinanen poli, kila naga visokar luen ga. Naga visokar ña sanene pano-o sinenan sape suan limana vito e karo na kinakinas nen kinanena ka nompui la naña komþas pililua rui sike ea, amio purkavila na kona la naña kiena yerkawa ponpolo suña ga vena kiena nompui la akania.

17 Ana pogos naña naga sinenan ke sape kila sanene, naga ga pisu kilale si naga narui, pisu kilale naña kiena þarmarera ga kila kare manene si naga. Ana sitomñal si arimana amio ñana uña, pisape ‘Lelaga kemua nañane, in na nepe wowe paþisi. Kiau þarmarera ga nane kila nesike viso karmarin ke e yo nini. Ositomyu la naña sane ape yar na yuñae kiena ne ata. Naga þar ke kinanena moki pan la e legiena punu ga, naña yoko akan make þele ga.

18 Sanene, popon nowasuþeli in ga narui, neyuñae re ve sa la nene. Yoko neva nevisu ata, nevisa sanini vania nevisave: O Ata, in na nekila pupia mlamulen piowa pa Ntewa, a pan ko ñena ga.

19 Nanagane, pe popon re si naña ovisu inu sane nepe naruña tai poli, ana nesape neviun tan ko vena sineña ye inu, otamñan inu neyuñae re ga sane lala yar tai naña miyuñae kiomña ke ne.

20 “Ana naga kila ruru kiena sitomena sanene, ana suñalu, pimi lelei ña pimi þasuþe si pu arimana.

“Naga pe kilia re poli, ana arimana sitomñal

luen ga naga silaga, suña kirakira ke mrapa sape pona naga imi. Ana pogos naña sike perinan uña wa, ana arimana pisu kilalea, sinen miye pañisi, ana kiriri pa pitawea. Ana pogos naña pimi puna narina nañani, kutararia e limana luwoka yepen mavin liganen sina.

<sup>21</sup> Ana yar m̄ee nene pisa pa arimana narui, pisape 'O Ata, in na nekila pupia mlamulena piowa pañisi pa Ntewa, a pan ko m̄ena ga. Nanagane, pe mesmesun re si ovisu inu sane narum̄a tai poli.'

<sup>22</sup> "Ana arimana pialuñaria, pio kiena yaru na yum̄aena lala, pisape 'E, ava vilaga, ava awar kulsota tai naña po, amio kana kulus nen lana, a kana rig nena, sur la ne sanene, awar imi ayen ea.

<sup>23</sup> A narin puluk naña apagan mlapa po ne, ava awem̄aria, tekila kinanena tai takania vena tekekara temio prasmaro nini.

<sup>24</sup> Komin naruu nini naga mare rui, ana nagane mali sina, naga kovio, nanagane tom̄al sina.' Ana pe yam piavi re poli, la asum̄a akila ke pañagena na yar m̄ee nene narui.

<sup>25</sup> "Ana e pogos nene, narina na m̄earu naga mialoro pa miyum̄ae ke kana lokove rui, ana siraunia pitomi si uña. Ana pogos naña pitomi ke lavisin uña, mloge yauena a mloge m̄ena m̄aagena na wolena kapur pa m̄eke na.

<sup>26</sup> Ana naga pisu yar na yum̄aena la tai, piun tania, pisape '?Ei, ya ne akila ke garo uña sanene?'

<sup>27</sup> Ana yaru naña pisa pania pisape '!E, womla nañani, naga pañuñe si rui, mal ga! Ana arimom̄a

sinenan sape kila kana kinanena tai. Arñemñar narin puluk na ãa rui!

<sup>28</sup> Ana pogos naãa mñearu mloge, sinena mimi paãisi, pe pa re loyuãa amio la poli.

“Ana arimana pimi pis amio, vena were va loyuãa, ana naga yepen mavin ga vaena.

<sup>29</sup> Pisa ga pa arimana pisape ‘?Ata, kas via rui naãa nesuãa nemiyuãae ke nemio ko e nini? In na nemlogear ruru ko e suri punu ga, ana pe okila re sur tai sanene pan inu poli. In na pe nomãal re naãa omñemñar narin nane tai pan inu pogos tai poli, vena nekila kinanena tai nemio kiau erau lala.

<sup>30</sup> Ana pogos naãa omãal narumuãa taãena nene ãasuãe sina, ana osuãalu omñemñar kieta narin puluk naãa tesuãa tepagan ruruia. ?Ana yar nene kila ya ne po pan ko? Naga ãar plan pupia kioãa kilavaru komãasia, pa kan kilavaru nene na namñeneen ga sira, pano-o kila makea. ?Pona ãelaga ne nanene na ko sinoãania ana okila kana kinanena nena?’

<sup>31</sup> “Ana arimana sinena miye mñena kiena mñearu naãani, ana pisa pania pisape ‘Ei, naruu, in na pe nesitom re sanene poli. Ko okila inu nekekara manene laa rui, naãa osuãa omio inu silaga, a kiau sur la punu naãa sike ne, in na netamãan punu pan ko rui.

<sup>32</sup> Lelaga naãa kiau prasmaro nene kilalu kiena mrapa na malena, ana pogos naãa pilopuia ãasuãe si pimi pun inu, sineu miyea, a in na nepisu sane popon kemua tekekarania, a tekila kinanena tai temio. Womla nene naga mare

rui, ana naga mali sina, naga kovio, ana toñal sina!’ ”

Ana Yesu pisa pan le Varasi lala, pisape “Pogaga, ñakaiwa nini ñisi e nene narui. A sa naña pisa ne, popon yar naña kilalu mrapa, naga monar vilopu sina, sa naña prasmaro nene. Ana monar avisuar ruru amiũ mña ga ve akila re ve sa mearu nene, naña kiena sitomena mñarera pañisi, naga pieluen wenla naña pilopu kiena malena.”

## 16

### *Pakaiwa na ñelaga na yumñaen amio kilavaru*

<sup>1</sup> Siraunia, Yesu pis pa kiena nalogeno lala, pisa ñakaiwa tai pan la, ana pisayu yar na yumñaena tai. Yaru nene, naga pisu sane yoko kiena yerkawa kovenlua, ana sumalu miyumñaen sur tai naña yoko siraunia kiena malena sumña woga ga. Pakaiwa nena sanini, sane: “Yerkawa tai, naga mligan lua kiena yar tai ve na visuaren kiena kilavaru. Ana pogos tai, visena pimi tolia sape kiena yar nene sumña kan ke ga kiena kilavaru, a kila kare ke kiena sur lala.

<sup>2</sup> Ana naga pio yar nene pimi puna, pis pania, pisape ‘Ei, yar la apisawal ko pan inu rui. In na nepisu sane popon nekoenlua ko si vetan yumñaena nene, yoko oñis nenaga. Ana sumon naña yoko ovano, sineun nesape oligan ruru sur lala wa vena nekilia nevisu lapui la naña yar la akila pan inu.’

<sup>3</sup> “Ana yar na yumñaena nañani mloge piowa, pisape ‘Lelaga o, piowa narui, yerkawa nene lalua yumñaena wo nene vetan inu, nemninue

sane yoko aña nekinana ve sanape narui. In na netotano e yuñæna nini nakonua rui, ana in na pe puriuu pe m̃areran re si yuñænen lokove poli, a pe sineun re m̃ena neva nesuñæ neviuviun kinanena vetan yar la poli.

<sup>4</sup> Pogaga, kiau mrapa ve sa nini. Yoko nete plan si lapui kienæ ne yaru lala vito laa tano, ana yoko la akekaran inu vano vano-o yoko la monar avisuar inu e pogos naña yerkawa kovenlua inu vetan yuñæna nene.'

<sup>5</sup> "Ana naga pa pio la naña kiela lapui sike e yerkawa, la peve taaga apim puna. Ana tai pimi puna narui, piun tania, pisape '?Ana ko okila lapui e sur ya, a tol kilavaru via?'

<sup>6</sup> Pisatañæa, pisape 'Pias nen wel na kanena tol ponotia taaga [100].' Ana yar naña pisa pania pisape 'Pogaga, yoko italua tetelua si vito laa tano. Nane kioñæ lapui ne nanini, ototano, oyumu plan ke ne vilaga wa, osiri lualima yam lima ga [50].'

<sup>7</sup> "Ana naga pano, yar tañæna pimi, piun tania, pisape '?A ko, kioñæ lapui na ya?' Ana naga pisatañæa, pisape 'Karō na wit manu taaga [1000].' Ana naga pisa pania, pisape 'Pogaga, yoko italua tetelua si vito laa tano. Nane kioñæ lapui ne nanini, ototano, oyumu plan ke ne vilaga wa, osiri ga ponotia ve orelu [800].' Ana naga kila m̃a sanene pano-o kila makea.

<sup>8</sup> "Ana siraunia, yerkawa nañani pisu kilale sur nene, ana naga pisa ke pa kienæ yar nañane naña naga kan kienæ kilavaru sumo, pisape 'Lelaga ne, opinaun ruru inu nenaga, ana nepisu sane

kioṃa manmaruaena po, ko ṣaruṃa po paṣisi naṣane.' ”

Ana Yesu pisape “Kam na apisu ke ne, yaru na yomarava nini lala, pogos naṣa amiyuṃae amio kilavaru, ana akila masisuania ṣisa, akilia ṣelaga na kilaen erau wo amio yaru lala, vena yaru la nene akila wo van la sirau. Ana nepisu naṣa naruu na yomerarava lala, yam mokliu naṣa pe amanmarua ruru re poli naṣa ayuṃae amio kilavaru naṣa Ntewa mla pan la.”

<sup>9</sup> Nepisa ruru pan amiu, nesape “Kilavaru naga pe na yomarava ga nini, ana visae kilia iila ko vena ove erau ruru omio Ntewa, popon oyuṃae ea. Visae oyuṃae ruru wo amio kilavaru kome mrapa naapo, siraunia yoko Ntewa kekaran vena were ko ova e naṣa pe kilavaru re e poli, nane ma e moṃa uṃa ma metava.

<sup>10</sup> “Yar naṣa ṣar yepemāen narin yuṃaena tai, tekilia towasinea sane yoko naga war ṃena yepemāen pupia yuṃaena woga. Ana yar naṣa miyuṃaen narin suri tai pe mesmes re poli, yoko naga yuṃae viowa laa na wa e pupia suria.

<sup>11</sup> Visae kam na ve awar re yepemāen yuṃaena na kilavaru e yomarava nini, yoko ane ligan sina sur nowo lala kiena ne Ntewa e limamiu vena ave kiamiu?

<sup>12</sup> A visae kam na taṣatete ayuṃae ruru amio sur la naṣa Ntewa taṃan pan amiu naṣa ve plas ga e yomarava nini, a ne yoko taṃan si nalaena nowo naṣa asike ma metava e peni ave kiamiu lue?”

*Yar tařatete yuńaen yuńaena kiena ne suře ve lua veraga*

<sup>13</sup> A Yesu pisa mńena ga, pisape “Naga sina nini, visae yar na yuńaena tai, naga tařatete yuńaen pran yuńaena kiena ne suře ve lua veraga. Visae sanene, yoko naga kekaran tai, ana yepen mavin tai, pona logear tai, ana ligan tai. Tařatete akila nařa ave yar na yuńaena kiena ne Ntewa, a ave yar na kilavaru mńena veraga.”

*Varasi lala la pe akekaran re visen kiena ne Yesu nene poli*

<sup>14</sup> Ana e poglis nene, Varasi mńena lala asike ga wa, asumńa amiyagogon ke visena la nene. Ana lala, la ape yar la nařa asitom manene kilavaru silaga, ana apitalia kare ga mrapa wo na yuńaen amio kilavaru nařa Yesu pisayu ke pa kiena nalogena lala.

<sup>15</sup> Ana Yesu pis pan la, pisape “Kam na sine-miun asape akila sa nařa yar la avisu amiu sane yar mesmes lala, ana Ntewa naga pisu ke ya nařa sike e losinemiu. Sur mok liu nařa yar la amieluaria, asape po, ana e visuena kiena ne Ntewa, pisu sane sur viowa ga lala.”

*Nasuřenena kiena ne Ntewa pimi narui*

*Matiu 11:12-13, 5:18; Mak 10:11-12*

<sup>16</sup> Visena tařena nařa Yesu pisa sanini, pisape “Nanua sumo, Tus Marua momńa ga, nařa tus lala kiena ne Mosis amio tus la nařa kiena ne navisaluaena lala asike ea, pimi mńa pano-o tol pogos kiena ne Yoane Nakeena. Yoane

miyuñae pano-o p̃isi, a nanagane Lologena Wo na suḡenena kiena ne Ntewa pimi, ana asuñã amlologon kare ga, a yar la naḡa sinelan asape ava loyuñã ea asuñã aḡar ke yon paḡisi vena atolia.

<sup>17</sup> Ana nanene pe kila re sane Navisaluaena kiena ne Ntewa naḡa sike e Tus Marua naga piowa poli. Pona ma e peni amio yomarava nini ava akovio yo, ana taḡatete narin mras nen visena na Navisaluaena naḡani kilia kovio pogos tai.”

*Pe pon re teligan lua wota la poli*

*Matiu 5:31-32, 19:9; Mak 10:11-12*

<sup>18</sup> Visena taḡena si tai naḡa Yesu pisa, sanini, pisape “Visae yar tai ligan lua wona, ana va were si sira taḡena, Ntewa pisu yar nene kila ke kolau amio sira taḡena ne. Maran taaga m̃ena ga visae yar tai talopa amio sira tai naḡa wona na sumo ligan lua rui, yar m̃ena nene kila ke kolau.”

*Pakaiwa na yar na sur moki amio Lasaros*

<sup>19</sup> Yesu pisa m̃ena ḡakaiwa nene, naḡa pisa sanini, pisape “Yar tai, naga limana pulen sur wo la moki paḡisi, naga suñã miyowau ruru lue ga silaga, a legiena punu ga amiyuñãen kana pupia kinanena wo lala.

<sup>20</sup> Yar taḡena m̃ena tai toñã ga, naḡa silaga aḡere naga pimi amligan teke vanua e kove na pupia yuñã m̃ana yar na suri moki naḡani. Yar nene, naga pe yar tai naḡa pe kiena suri re poli, naga pe yaru na loginen ga kinanena, tas nen wetelu pulen ga magka, kiena kia Lasaros.



<sup>21</sup> Amligan naga teke e yo nene pona visae yoko kilia tol re kororos nen kinanen lañas naña yerkawa nene kanligan yo, ana peraga. Naga mlogin korenan ke ga sanene, ana lokul la apim asuñã amunvan ke kiena magka lala.

<sup>22</sup> “Pano-o yar nañani mare, ana navisi lala apim akuslua pa amligan mñeke e yepas nen Epraam, ma e peni. A pe piavi re poli, yerkawa mēna mare, asinia.

<sup>23</sup> Ana akoven naga pa e kapi, naña mloge piowa na mloge piowa pañisi, ana siraunia, kira pa metava, kira pa perina pañisi, pisu Epraam sike na, a pisu naña Lasaros sike amio, lalua asuñã akinana ke na.

<sup>24</sup> Ana pio laa, pisape ‘Oe, Ata Epraam, awis sinemña ye inu, oligan Lasaros vitom suan luas nen mrasilmana vito e narin wii tai, vena ligan te purmeneu. Nanagane kapi kekan inu nemloge piowa pano-o ñisa.’

<sup>25</sup> “Ana Epraam pisatamēa, pisape ‘Naruu, nagane ositomñal si malena wo naña ose sumo. E pogos nene, ko otol make kioñã suri la naña ko sinoñania po pan ko pañisi, ana Lasaros na ositom korenan ga vanon piowa ga. E kiena malena nanua, suri punu ga piowa ga, ana nanagane, naga mloge si po e nini narui, a ko omloge ke piowa manene laa pañisi e namña.

<sup>26</sup> Ana suri ga tai, tañatete imñasu iila ko, komin Ntewa mligan pupia pulus tai mñeke likan ita lua, vena kila sane yar tañatete molue e yo nini vena imñasu puñã, a tañatete molue e na osike e ne vena imi e yo nini.’

27 “Ana yar nene piun ke si na ga, pisape ‘Ata, visae sanene, neviun m̃areran tan ko vena ovitetalia Lasaros wasuḗe si vito tano garo ũna m̃ana kau ata,

28 komin naḗa wolai lima asike ga wa. Popon Lasaros vito visawal van la, visae peraga, sa ḗisi la m̃ena aimlae e yo naloge viowaena nini.’

29 Ana Epraam pisataḗea, pisape ‘?Ana komin ya ne monar Lasaros vitove? La aḗar ke Tus Wa rui, naḗa nasiriena wa kiena Mosis amio navisawalena la sike e rui. Popon la auloia, yoko alual suri punu sike ea.’

30 Ana naga m̃areran m̃aga, pisape ‘?Ata Epraam, pona taḗatete akila yo? Ana visae yar tai wasuḗe si imi e marena, visawal make sur la nene van la, yoko monar avilon la ga narui.’

31 Ana Epraam pisataḗea, pisape ‘Visae la nene yepel mavin logeen ya naḗa Tus Wa pisa, pe sur re si tai naḗa kilia kila na alelaga poli. Pona yar tai wasuḗe si imi e marena, visa sur punu van la, pona ya sina, ana yoko la yepel mavin ga lelagaena.’ ”

## 17

*Pelaga na kilaen nakilaliena van yar taḗena  
Matu 18:6-7,21-22; Mak 9:42*

1 Ana Yesu pisa pan kiena nalogenena lala, pisape “Yoko nakilaliena lala akilia aim lue silaga ne, ana yar naḗa kila sur laḗasa naḗa were nakilaliena imi lavisi, yoko viowa van vaḗisi.

2 Visae aḗatear kilavaru tai m̃ene kolmekina a akoan talilu vito e lowe memaena, nanene na

nakoena tai naña melala ga ne. Ana yar naña kila naruu tai ligan inu, ve viawa re si m̃arera e inu, loru e mlamulena viowa, yoko yar nene naga war nakoena tai naña m̃arera manene laa sane taulu naga nene.

<sup>3</sup> Sanene, kam na monar avisu ruru kiamiu malena la silaga, vena ve okila re nakilaliena viowa lala aim aňalivin kioňa erau.”

### *Pelaga naña oviewo womla*

A Yesu pisape “Visae ovisu naña womla mloru ke pito tano e mlamulen piowa tai, monar ovis omio vena okila ruruia, a visae naga vilonia, monar oviewoia.

<sup>4</sup> Visae naga kila viowa van ko yam ve olua e legiena ve taaga, a pogos punu ga, naga kila viowa, a siraunia naga pisa ga pan ko na wa pisape ‘Ake wolai, nekila kare ko pañisi. Awis, oviewo inu,’ yoko okilakania? Pisi na monar oviewo naga e pogos make la olua nene.”

### *Nam̃areraena na viawaena*

<sup>5</sup> Ana nalologena la apiun tan Yesu, apisape “Suñe, sinemimin mesape okila kiamimi naviawaena imi m̃arera la sane wa.”

<sup>6</sup> Ana naga pisatamea pisape “Visae aviawa ve tokak ga e inu, sane kurus nen purpa, ana visae kiamiu naviawaena nene ve lelaga ruru naapo, ana ãisi na akilia avisa va purlu na m̃eke gare avisave ‘Omolue e yo nene, omio ãeligas nem̃a lala, ova okapur ke gare likan lowe memaena ne, ana yoko naga logear amiu woga.’ ”

*Yar na kilaen yuũaen kien yerkawa naga monar kekaran ga kila*

<sup>7</sup> A Yesu pisape “Visae kam yar tai ve yerkawa, a kiena yar tai suũa kila yuũaena la pania. Pona pa miyuũae lokove yo, pona pisuar kiena sur mali lala, pona ya sina, ana visae yepekilavi, pogos naũa ũasuũa e yuũaena pitomi, yoko yerkawa visa ya ne vania? Taũatete visa vania visave ‘Ko, oimi oto omio inu, italua tekinana,’ komin naga pe kiena yar na yuũaena ga.

<sup>8</sup> Yoko yerkawa monar visa ga vania, visave ‘Pogaga, yoko ova oviran kapi sumo wa. Visae kinanena manoa, ova oyowau ruru ke ne wa, ũaisi na owar kau imi nakania, nomunia, ũaisi, okilia ola kũa.’

<sup>9</sup> A pogos naũa yar nayuũaena kila sur punu ga naũa yerkawa pisa pania, yoko yerkawa taũatete visa pupia potena vania, vanon naga kiena yuũaena ga.

<sup>10</sup> Ana kam mũena ga monar ave sanene. Visae akila ruru make yuũaena naũa Ntewa pisa pan amiu, vano-o ũaisi, yoko avisa ga sanene, avisave ‘Ee, nanene na pe sur re tai nene poli. Tekila ga ya naũa torokin tekila sa ke ga yar na yuũaena kiena ne Ntewa lala.’ ”

*Yesu kila ruru yar na leperosi la lualima, ana taaga ga pisa potena*

<sup>11</sup> Ana e pogos nene, Yesu la asumũa amial ke apa ma Yerusalem na wa, ana kiela mrapa pa likan lepas lua nene, Samaria amio Kalele.

<sup>12</sup> Ana amial mũa pano-o, lavis ga amũalivi e pulkumali tai, apitawe ũaegas nen yar tai na

leperosi lala, la lualima, naña la asumã e yepas nen mrapa.

<sup>13</sup> Ana pogos naña apisu Yesu, apion manene pania, asape “Yesu, Suñe, awis sinemã ye imimi.”

<sup>14</sup> Ana pogos naña Yesu mloge, pisa pan la, sape “Ava akom ãesan pun yaru wa lala vena la avisu ruru nena tasnemi lala vena avisave kam na yepemi mian rui.”

Ana la apano, a pogos naña la asumã amial apano, amilan ga naña yepela la pimi mian ke narui.

<sup>15</sup> A lala tai, pogos naña pisu naga po sanene narui, naga pilonia ãasuñe si pimi, miyeluar Ntewa pañisi,

<sup>16</sup> pimi mloru e lana Yesu, pisa potena pania. Yar nene, naga pe pe yere Yu re naapo poli, ana naga pe Yu la kompas tai nae Samaria. Ana tañena lala, la ape yere Yu nena naapo, ana la pe añasuñe re si apim poli.

<sup>17</sup> Ana Yesu pisa sanini, sape “La naña yepela mian rui, la lualima, ana awa la ovari?”

<sup>18</sup> Naña ãasuñe pimi, naga yar nae ga lele tañena, ana komin ya ne naga taaga ãasuñe pimi mieluar Ntewa, lañas pe apim re poli?”

<sup>19</sup> Ana Yesu pisa pania, pisape “Erau, osuñalu oyali ova umã. Kiomã naviawaena tamalia ko rui.”

*Nasuñenena kiena ne Ntewa imi ve sanape?*

*Matiu 24:23-28,37-41*

<sup>20</sup> Ana siraunia, Varasi la apim apiun tan Yesu, asape “?Nasuñenena kiena ne Ntewa naña opisayu ke silaga, yoko mevisu pogwai?”

Ana Yesu pisatañea pisape “Nasuñenena kiena ne Ntewa pe pimi re sane sur tai naña yar kilia visu e kilamarana poli.

<sup>21</sup> Naga pe sur re tai naña yoko avisave ‘Ke, na naña narui, nane pimi ke naña,’ pona avisave ‘Nane, sike gare rui.’ Kam na pe apisu kilale re poli, ana nasuñenena kiena ne Ntewa sike pa likan amiu rui.”

<sup>22</sup> Ana Yesu pisa pan kiena nalogena lala, sunyu pan la sape yoko ve sanape e legiena maro la ne pimi ke ne. Naga pisape “Siraunia, yoko kam na sinemiun manene vañisi navisuen pog naña yoko inu Narina ne Yeririna neim noñalivin yomarava, ana nanene na pe pon re kam na avisu poli.

<sup>23</sup> Yoko yar la avisasa sanini avisave ‘!Naga nane gare!,’ pona ‘!Naga nane garo ne!,’ ana kam na ve ava re amio la, komin pe inu re nene po laa wa.

<sup>24</sup> Ana pogos naña inu Narina ne Yeririna nowasuñea ve lelaga e kana legiena nena, yoko yar make ga avisu kilalea, yoko neimi sane yekarpla tai naña kila sinapane vivaga e lepas tai va tol lepas komñasa.

<sup>25</sup> Ana sur nene na pe kana pogos re poli wa, komin sumon nene, yoko inu Narina ne Yeririna, yar nanagane lala akila viowa van inu e sur viowa la ve moki, yoko monar akovenlua inu.

<sup>26</sup> “Vano-o tol pogos naña inu Narina ne Yeririna nowasuñea, yoko yar la ve akila ruru la re na wa, maran ve taaga ga sa ke pogos kiena ne yermarua Noa nanua sumo.

<sup>27</sup> E pogos nene, yar la asuũa akinana, amun suri lala, asuũa akila ke talopaena sanene, pimi tol pogos naũa Noa pa loyuũa e kiena pupia waa naũa naga miyuũaenia. Ana pupia womie pitomi kus plan make kiela malena la punu ga.

<sup>28</sup> A e pogos kiena ne Lot sa mũa nenaga nene. Yar la asuũa akinana, amun suri lala, asuũa apa ke e lele na wilwilena po amiyuũaen ke kilavaru, asuũa amiyuũaen ke lokove, amiyuũaen ke yuũa, la akila ke ga sanene pa ke na, pe asitoũaal re sur tai poli.

<sup>29</sup> Ana e nena e legiena naũa Lot molue petan kiela yo, kapi amio pan na kapiapo mloloru pitomi ma e sinapane, kekan la akokovio make nenaga.

<sup>30</sup> Ana nevisa van amiu, e pogos naũa yoko inu Narina Yeririna neimi, yar la taũatete asitoũaal sur tai, asitoũaal la ga, ana yoko ailan pupia sur kerkeviu la ne sanene imi mũalivin la.

<sup>31</sup> “E pogos nene, visae yar tai suũa yuũae ke meta e mũana wos nen yuũa, ana visu sur nene imi, ana vito tano pe pon re kilali sape va war suri laũa e mũana loyuũa poli, naga monar va ga narui. Yaru naũa miyuũae ke lokove, naga mũena taũatete si vito uũa, yoko monar va ga narui.

<sup>32</sup> Kam na ve sinemiu ũesan re wona Lot, naũa kiraũaatau, ana pimi pe kilavaru.

<sup>33</sup> Yar naũa kilali sape visuar ruru ga kiena malena, yoko kovio, ana yar naũa taũan kiena malena kovio, yoko naga ga tamalia sina naga.

<sup>34</sup> Nevisa van amiu nevisave e pogos nene, pona kolemalo naþa yar mēke amio wona yo e m̃ala tog, ana yoko aim awerelua ve taaga ga, aligan tai mēke na.

<sup>35</sup> Ana pona yoko sira la ve lua asike avili ke kala kinanena lele taaga yo, ana ve taaga vano tai sike na.

<sup>36</sup> Ana pona yar lalua ayum̃aevain ke lokove tai yo, yoko tai ure matania, ve taaga sum̃al wowe ga sike na.”

<sup>37</sup> Ana nalogena la apiun tania, asape “?Ana Suþe, suri la nene yoko m̃alivi e nape?”

Ana naga pisatañe la, sape “E pogos nene, yoko ve sa naþa visae sur mare tai mēke koyo tai. E yo nene narui yoko manu la naþa akakan ke sur mare, yoko aiminia, monar la ve moki ase yo nene. E nape naþa mlamulena viowa sike ea, yo ke ga nanene narui yoko naliþereena se ea.”

## 18

*Pakaiwa na sira naþa tagi m̃a pa kiena suþe na pulkumali pano-o, suþe miyagogonia*

<sup>1</sup> Ana Yesu pisa sina þakaiwa taþena tai pan la, vena iilaar la ve asitom þele re si kiela leniena lala, vena asum̃al m̃arera asulue ga ea, alen m̃a vano-o atol kana navisatañeena.

<sup>2</sup> Kiena þakaiwa nena pa sanini, sape: “Pulkumali tai, naþa kana suþe nena naga pe yar m̃arera tai, naga pe yar tai naþa pe patanon re Ntewa poli, pe maraun re nenaga, a naga sitom þele m̃ena yar la.



<sup>3</sup> Ana letano m̃ena tai sike e yo nene, naṣa yar tai sum̃a kila kare ke kiena sur la silaga. Ana letano naṣani pa sum̃a tagi ke pan kiena suṣe, naga sum̃a pisawal ke yar naṣani, sape 'Awis, monar okila sur tai va yar nene, naga kila kare in paṣisi wa.'

<sup>4</sup> Ana suṣe naṣani pe sinen miye re sira nene poli, a pe yowenan visen va yar naṣani, ana kila luen ga sanene pa ke na, sira m̃ena naṣani pa tagi luen ga pan silaga.

"Ana siraunia naga pisape 'In na nepe yar tai naṣa pe nesitom re nesape nekila ya naṣa Ntewa pona yar taṣena pisa pan inu sape popon nekila.

<sup>5</sup> Ana sira pimi tagin ke pan inu, ana in na pe sineun re nesape nekila ya naṣa pisa ke poli. Ana naga pimi piun luen ga sanene, naga kila kare inu paṣisi wa, ana pona nekila ga ya naṣa naga piun ke yo. Visae peraga, yoko neloge kiena tagena vano-o sineu marena.' "

<sup>6</sup> Ana Suṣe Yesu pis pa la naṣa amiyagogon ke ṣakaiwa nene, pisape "?Kam na ayagogon ruru visena naṣa suṣe yowena nene pisa ne? Komin sira nene tagi yam moki pania, ana yoko monar sitomli sur na sira nene piun ke ne.

<sup>7</sup> ?Ana sanapen Ntewa nae ma e peni? ?Pogos naṣa mloge kiena yeririna la naṣa mligan plan la, atagi ke pania lemalo a legiena, naga kilia su kaṣar sanene ve kila re sur tai van la?

<sup>8</sup> Peraga, ana nevisa van amiu sanini, visae loge naṣa alen m̃arera vania silaga, yoko naga sum̃alu vilaga e pogos make ga kilia iila amiu. ? Ana nesape neviun m̃ena van amiu, sane visae

pogos naña inu Narina ne Yeririna nowasuþe si neim e yomarava nini, yoko nelual naña yar la asumãlu m̃arera asike e inu sanene, pona peraga?”

*Pakaiwa kiena yar naña þarwar e kiena þelaga naña mesmesu*

<sup>9</sup> Ana pogos naña Yesu sike amio yeririna lala, naga pisu kilale naña laþasa aþarwar la paþisi, asitom ke asape la kiela malena mesmes ruru po narui, a la apisu yar taþena la apiowa ga, apisu sane la apiowa manene laa pe sa re la poli. Ana pisayu yar la sanini, pisa þakaiwa tai, sape

<sup>10</sup> “Yar lalua apa ma e Yumã Wa m̃ana Ntewa e pogos na leniena. Lala yar tai, naga pe yere Varasi, a taþena, naga kila yumãena tai naña yaru la pe sinelan re naga vanon poli, naga pe yar na takis.

<sup>11</sup> Ana pogos naña yere Varasi naga sumãlu mlen, pisa sanini, sape ‘Ake Ntewa nepisa pupia potena pan ko paþisi, naña kiau malena naga po laa sane taulu kiena ne yar taþena lala. Nemieluar ko, naña in na pe sa re yar navinauen la poli, pona yar na kilakeuiaen yar lala, a yar na kilaen kolau lala, pona yar na takis lala sane yar na sumãlu sike ne.

<sup>12</sup> Peraga, in na nesumã nekila ke po silaga, komin naña in na nomonsilun kilaen leniena van ko e legiena lua e wik taaga, a e sur make ga naña nemla e lumãau, visae netol ve lualima, monar nela ve taaga van ko silaga. Sur ne la na nene narui naña in na nesumã nekila, ana kila inu nopo paþisi e maramã.’

13 “Ana yar na takis, naga suña mloge ke piowa vanon kiena mlamulena viowa naña kila, ana mninu sane Ntewa pisu kiena malena pe po re nena poli. Ana naga yepen mavin va maneneen lavisi, suñalu ga suña perina, a naga yepen mavin kiraen va metava ma e peni, a naga ãarin tau ga toña ga, mlipalipa ke yerena, tagi, pisape ‘!Ake Ntewa, ove lemam van inu, sinema ye inu, yar na kilaen mlamulena piowa!’

14 Ana kam na asitomyulia leniena kiena lalua nene, ana yoko Ntewa kekaran kiena ai? Lelaga, yar naña pisu kilale kiena mlamulena viowa, a mloge piowagania, Ntewa ãar plan kiena mlamulena viowa. Ana yar tañena nañani, naga ãasuñe si pa uña naña kiena malena maran taaga ga sa ke naña pimi. Yar naña suña pisirlua naga, yoko Ntewa ligan naga ñeke tano, ana yar naña mligan naga sike tano, yoko Ntewa visirlua naga.”

*Yesu pisa ruru sisi kokan lala*

*Matiu 19:13-15; Mak 10:13-16*

15 Ana e poglis nene, auia lañas añar narila sisi tomtom lala apim puna Yesu, sinelan asape kus la, visa ruru la. Ana pogos naña nalogena la apisuia, apisalupar la, asape avava sina.

16 Ana Yesu pio sira la nañani, sape aim ñaga, ana pisa pan nalogena lala sanini, sape “Kam na ve avisalupar re sisi la namña, atañan la aim pun inu, komin naña sisi la namña, yeririna la naña asa ke ga la nene, la ke ga nene narui

naña asuũa apa loyuũa e nasuũaenena kiena ne Ntewa.

<sup>17</sup> In na nepisa ke lelaga na pan amiu ne, visae yar naña sinenan nasuũaenena kiena ne Ntewa, naga monar kila naga imi ve sa sisi la nini, visae peraga, naga tařatete va loyuũa.”

*Yerkawa kiena ne le Yu lala tai sinenan sape tol malena*

*Matu 19:16-30; Mak 10:17-31*

<sup>18</sup> Ana siraunia, suũa tai pimi piun tan Yesu, sape “Navianena wo, awis, popon ovisawal van inu sane in na monar nekila ya naña visae nekila yoko nekilia netol malena naña ve uro re.”

<sup>19</sup> Ana Yesu pisataũaea, sape “!Ei! Ko na okilia ya ne, osape in na nopo? Pe yaru tai po ruru re naapo poli, ana Ntewa ga naga taaga.

<sup>20</sup> Ana ko opiun osape sanape naña yar tai sane ko naga kilia imi wo e marana Ntewa woga. Pona okilia ruru kiena Navisaluaena yo rui, naña pisape ko ve okila re lau, ve oweñar re yaru, a ve ovinau re, ve ovisokan re, ovatanon arimũa amio anũa.”

<sup>21</sup> Ana yar nañani pisataũaea, pisape “Lelaga, in na nekilia kemua Navisaluaena la ne opisa ke ne, a nekilia nevisa van ko sanini, in na nopuar ruru la siar e pogos naña nepe yar viu ke ga wa. Pimi tol nanagane, pe nekilalu re tai poli.”

<sup>22</sup> Ana pogos naña Yesu mloge piša sanene, pisape “Pogaga, ana e lepas naña puũa, sur tai sike ga wa. Monar ova owilwilin plan make kioũa sur moki la nene, ana owar kana kilavaru, ova okiakian kare ga va yar la naña limala plasa. Visae okila sanene, yoko kioũa sur wo la ve moki

ma e peni. Ko, ova okila, ãisi na oim otaveve inu.”

<sup>23</sup> Ana pogos naãa yar nene mloge visena nene, sinen piowa paãisi, kiena sitomena pimi urmi na urmi, komin naga pe yar na sur moki, limana pule paãisi.

*Yaru naãa kiena sur moki, naga ãarera li ãaga vena vaen loyuãa e nasuãenena kiena ne Ntewa*

<sup>24</sup> Ana Yesu pisu manene yerkawa nene pano-o ãisa, siraunia pisape “Visae yar tai naãa kiena sur moki, naga sinenan sape va loyuãa e Nasuãenena kiena ne Ntewa, sur nene naga ãarera towe ãa naãa.

<sup>25</sup> Ee, nevisa van amiu, visae kamel tai va warpo yo kome pulus nen nitil, nanene na ãarera paãisi, ana visae yar tai naãa kiena sur moki sinenan sape va loyuãa e Nasuãenena kiena ne Ntewa naga ãarera laa na wa.”

<sup>26</sup> Ana la naãa amloge visena nene amilan pano-o paãisi, asape “!Aulai! Visae sanene, ane yoko tol malena?”

<sup>27</sup> Ana Yesu pisataãea, pisape “Lelaga, yar taãatete kila naga tol malena, ana ya naãa yar taãatete kila, Ntewa naga kilia kila woga.”

<sup>28</sup> Ana Pita piunia, pisape “?A yoko ve sanapen imimi? Memligan ãamimi uãa la rui, ana metaveve ko ke narui.”

<sup>29</sup> Ana Yesu pisa pa kiena nalogena lala, sape “Kam na ve asitom manene re e lepas nene. Yar a naãa visae ligam ãana uãa, pona wona, pona wenla, pona arimana amio anena, pona narina

lala, a visae ligan sur la nene vanon yuññaena na Nasuñpenena kiena ne Ntewa,

<sup>30</sup> yoko naga tol maran si kiena sur la nene va ve moki manene laa va laa sane na wa. Naga nene e pogos nanagane, a sirau ñña ga e pogos na pimi ke ne, yoko naga tol malena naña ve uro re.”

*Yesu pisawal kiena marena yam telun nene  
Matiu 20:17-19; Mak 10:32-34*

<sup>31</sup> Ana poglis naña amiyaloro ke apano, Yesu pio kiena lualima taaga pa lua apim puna, pisa pan la pisape “Ayagogo rurua. Nanagane tepa ke ma Yerusalem narui, a pogos naña tetolia, sur make la naña navisawalena lala asiriyu nanua sumo rui e lepas nen Narina ne Yeririna, yoko avisuia aimi aññalivi ve sa nena naña apisa.

<sup>32</sup> Yoko avisu naña aligan naga va e limana ne le Rom lala, naña yoko akirakirai viowa vania, akila karea e ñelaga viowa lala, avilasiria,

<sup>33</sup> alilia, akila ñña sanene vano-o awemaria. Ana yoko kana legiena ve telu, naga sumalu mal sina.”

<sup>34</sup> Ana pe sur korena ga naña Yesu pisawal meraravan make sur punu pan la sanene, ana la pe amloge kilia ruru re nenaga. Naga sa naña visena la nene na atapolou ga e la, ana kila sane tañatete atol kana kinasa.

*Yesu kila ruru kilamara ñala tai  
Matiu 20:29-34; Mak 10:46-52*

<sup>35</sup> Ana Yesu la amiyaloro apa ñaga, apim lavisin pulkumali naña Seriko, ana kilamara ñala tai teke tano e is nen mrapa, toña mlogin

ke kana kinanena tan yeririna la naña apa akomkom ke e nene.

<sup>36</sup> Ana kilamara ðala nañani mloge naña Yesu la apim ke na amio ðina la naña asumã amialoro ke amio, ana naga piunia pisape “La nene na li pe la nene, akope ke ne?”

<sup>37</sup> Ana apisatañe sanini, asape “!Ke, nanene na Yesu nae Nasaret nañane, nane pimi ke ne imi kom pun ita ne!”

<sup>38</sup> Ana yar naña pio manenea, a tagi pa Yesu pisape “!Yesu, ko lus kiena ne Tepet, sineun naña sineña ye inu!”

<sup>39</sup> Ana la naña asumon ke Yesu, amloge pio sanene, ana apisalupãria, apisape “Ova ruru ko ga.”

Ana yar naña yepen ma ga, pio ke sina ga, pa laa meta sane wa, pisape “!Yesu, ko na lus kiena Tepet, nemie awis pan ko, sinemã ye inu!”

<sup>40</sup> Ana Yesu mial pano, pimi sumãl su puna e yo nene, pisape atar yar nene imi lavisinia. Ana atar pimi, Yesu piun tania, pisape

<sup>41</sup> “?Ana ko sinomãn osape nekila ya ne van ko?”

Ana naga piunia pisape “Suþe, awis, sineun nesape kilamarau imi wo, nekilia nevisu suria.”

<sup>42</sup> Ana Yesu pisape “Pogaga, nanagane nela kioñã nakiravaena van ko sa naña opiunia. Kioñã naviawaena kila ko opim opo sina.”

<sup>43</sup> Ana e nena e poglis nene, yar nañani, kilamarana pimi po, ana mial ke amio Yesu, sumã miyeluar ke Ntewa. A yeririna mñena la naña apisu sur nene, apisu po paþisi, asumã amieluar ke kia kiena ne Ntewa vanonia.

# 19

## *Yesu pitawe Sakias*

<sup>1</sup> Ana Yesu la apim loyuma Seriko, amialin ke naña ava awar ro ga ea.

<sup>2</sup> Ana e nañani yar tai sike ea kiena kia Sakias. Naga pe yerkawa kiena ne yar na warpoloen takis e pupia lepas nene, ana vanon naña naga miyuma piowa, kila kare ke yaru lala e kiela kilavaru na takis nena, kila naga liman pule pañisi, naga pe yar na sur moki.

<sup>3</sup> Ana Sakias mēna pimi e poglis nene, sinenan sape visu Yesu naga pe yar na sanape, ana yeririna la mokliu naña asike lavisin Yesu, asuwo ga yo, sa naña yo kuskus ga rui, ana naga pe pisu ruru re poli, komin naga pe yar plas ga tai.

<sup>4</sup> Ana Sakias pisu sane piowa narui, kiriri sumon Yesu lala, pa tol puryove tai ñiyu pa e korowas tai, sumate ke naña visae Yesu la ayal aimi, ana naga kilia visu ruruia.

<sup>5</sup> Ana pogos naña Yesu pimi tol puryove nañani, Sakias milan ga naña Yesu kira pa pisuia, pis pania, pisape “Sakias, otapulu vilaga. In na nemninuluñar e inu sane ñane neva nesu re nemio ko sumo wa gar moma.”

<sup>6</sup> Sakias mloge narui, sumalu pula nena pitomi tano, ana ñere Yesu pa mana, amio pupia kekarena pañisi.

<sup>7</sup> Ana pogos naña yeririna la apisu sur nene, la moki naña pe akekan re poli, apismumu, apisape “Yar naña Sakias naga pe yar sur naña miyuma piowa ga, naga kila kareli yar lala wa,



ana vanon ya ne Yesu sinenan sape amio ava asu m̃ana?”

<sup>8</sup> Ana pogos naṓa asike loyuṃa rui, Sakias mloge sane naga monar vilopuia, a monar keṓu kiena malena, ana suṃalu pisawal e marana ne Suṓe, pisape “Suṓe, nanagane in na netam̃an kiau sur la komṓas va yar la naṓa limala korena, pe kiela sur re poli. A suri ya naṓa nepisa kotalia yar la ea, nepinaun la, yoko nowar maran si van la tol yam ve vari.”

<sup>9</sup> Ana Yesu mloge pon manene visena naṓa Sakias pisa, ana pisa pania pisape “Nepisu sane ṓane na, natamaliaena kiena ne Ntewa pimi nena tol mratava nini. Yar nene naga kilalu mrapa na kiena malena, ana naga m̃ena pe lus kiena ne Epraam kemua lelaga, naga pe yere Yu kemua tai,

<sup>10</sup> ana inu Narina ne Yeririna nepim e yomar-ava nini vena nakale la naṓa amiyepe petan mrapa sane yaru nene, vena netamalia la.”

*Pakaiwa na yar telu naṓa apisuar kilavaru kiena ne kiela yerka*

*Matu 25:14-30*

<sup>11</sup> Ana yeririna la asuṃa amiyagogon ke visena kiena Yesu la nene, ana pis m̃a pan la pano-o, pisa ṓakaiwa tai pan la. Naga pisu sane popon vian la e ṓakaiwa nena, komin naga kilia ke sape sane yeririna lala asitom ke asape pogos naṓa ava atol yo Yerusalem, yoko naga kila nasuṓenena kiena ne Ntewa imi warpo ke yo van la veraga. A nanagane apim ke lavisin Yerusalem

ruí, a Yesu sape vianin la sane naga monar ligan la sumo wa, yoko imi si pula.

<sup>12</sup> Naga pisa pan la sanini, sape “Yerkawa tai, naga pa perina e naña pupia ãarin suñe sike ea, vena avisirlua naga imi ve ãarin suñe na kiena lepasa, yoko naga kilia wasuñe sina visuar kiena yo.

<sup>13</sup> Ana sumon naña pe pa re poli wa, naga pio kiena yar lala, la lualima, a la punu ga mla kilavaru peve taaga pan la, sape monar ayuñae amio kilavaru nañani vano-o tol pogos naña naga wasuñe sina.

<sup>14</sup> Ana yeririna la nae lepas nene ape nasinekar kiena ne yerkawa nene, ana pogos naña naga pur matan la pa narui, la apisayuia asape la pe sinelan re si naga imi ve kiela ãarin suñe poli. Ana amligan visena pa pa ãarin suñe keviu na purvanua nañani, asape ‘Pe sinemimin re yar nene imi ve kiamimi ãarin suñe poli. A pe sinemimin re nena naña oligan kia keviu nene e naga poli.’

<sup>15</sup> Ana ãarin suñe keviu nañani kila ga, ana yerkawa nene pimi ve suñen ke sina ga kiena lepasa. Ana pimi pio viraviran kiena yar la naña naga ãar ãesan kilavaru nene pan la, sinenan sape visu sane amiyuñae ea, ana ataulu si kiena kilavaru via.

<sup>16</sup> “Ana yar naña pimi suñal ãesan se marana, pisape ‘Suñe kiuñã kilavaru taaga naña omla pan inu, nemiyuñae ñã amio pano-o netaulu si lualima to metavana.’

<sup>17</sup> “Ana yerkawa nene pisu kiena yar na yuñãena nene miyuñae po, ana pisa pania

sape 'Po na po paḗisi, ko omiyum̃ae po manene laa wa. Ana komin naḗa osum̃alu m̃arera ose narin yum̃aena naḗa nemligan e lumom̃a, ana nagane nela yum̃aena keviu tai van ko, neligan ko ovisuar kiau pupia pulkumali ve lualima.'

18 "Ana siraunia, yar nalua pimi, pisape 'Suḗe, kilavaru taaga naḗa omla pan inu, nemiyum̃ae m̃a ea pano-o taulu si lima to metavana.'

19 "Ana yerkawa naḗani pisa pania, sape 'Po wa, ko m̃ena omiyum̃ae po paḗisi, yoko neligan ko ovisuar kiau pupia pulkumali ve lima.'

20 "Yoko kiena yar taḗena pimi, pisape 'Suḗe, kiom̃a kilavaru naḗa omla pan inu, nepiwo ruru e kinakina kulmrae tai, nemligan ruru tom̃a ga, nane nesape nela si wasuḗe imi van ko narui.

21 In na nesum̃a nepisu ko ke sane ko yar tai naḗa okilia owar plan kiom̃a sur naḗa yar taḗena ḗarar sike na, a okilia okinana e lokove naḗa pe ko re omapila poli. Kiom̃a ḗelaga m̃arera towe laa sanene, kila nemaraun ko, ana pe nekila re surian kiom̃a kilavaru nene po, nepuarar ruru ga tom̃a ga.'

22 "Ana yerkawa naḗani sinen karia, pisape 'Yaru, opisa kare in laa ne wa, naḗa osape in na yar m̃arera tai ne sanene. Ana pogaga, kiom̃a visena nene naga ga kar ko ke sina ga.

23 ?Visae in na yar sur na sanene, komin ya ne opuar kiau kilavaru sanene? Po paḗisi naḗa visae oligan ga e pag, vena pogos naḗa nowasuḗea, nekilia nowar plan sina amio narina naḗa naga tauluia.'

24 “Ana yerkawa nañani pisa pa yar tañena la naña asumñal asike lavisinia, sape ‘Awar plan kilavaru nene e limana, awar va yar naña taulu lualima.’

25 “Ana apis pa yerkawa nañani, asape ‘!Ana suñe, naga ñar mokliu wa, kiena lualima rui!’

26 “Ana yerkawa pisa pan la pisape ‘Lelaga, ana sanene narui. Naga naña kiena sur mok rui, yoko naga war si va laa sane na wa, ana naga naña pe kiena sur re poli, yoko naga kilalu kiena narin sur ve tokak ga naña naga mla ke rui.

27 Ana e lepas na kiau nasinekar la nene, naña la yepela mavin naña in na neve suñen la, sineun nesape ava aurela aim e nini, awe moñar la amarmare e marau.’ ”

Ana ñakaiwa kiena ne Yesu nane ñisi e nene.

*Yesu pimi tol yo naña Yerusalem*

*Matiu 21:1-11; Mak 11:1-11; Yoane 12:12-19*

28 Ana Yesu pisa pa visena la nene, suñalu, sumon la, ñere la apa ma Yerusalem.

29 Ana la apim lavisin narin pulkumali lua nene sumo, naña Petpas amio Petani, e lepas nen Kunus Na Purolip lala. Ana Yesu pisa pa kiena nalogena lua, pisape

30 “Kam lua ayalor ava ke ne e narin pulkumali na gare sumo wa. Pogos naña ava loyurña, yoko alual togki tai, añatear teke ea. Togki nañani pe teras ga, pe yar tai to li re e mñasina poli wa, ana kamlua aluñarlua, aure imi e nini.

31 Visae aviun tan amiu amlua, avisave ‘E, amluñarlua ke pe na ya?,’ yoko avisatañea

avisave ‘Suḗe sinenan sur mal nini kila kiena yuḗaena tai.’ ”

<sup>32</sup> Yesu pisa sanene pan lalua, ana mligan la apano, ana apano apisu sanena naḗa pisa pan la.

<sup>33</sup> Ana apano asuḗa amluḗarlua ke kilka petan sur mal naḗani, ana pogos naḗa akila ke sanene, kana ḗar ne la apiunia asape “?E, asuḗa amluḗarlua ke kilika petan pe na ya?”

<sup>34</sup> Ana apisataḗnea asape “Peraga, Suḗe sinenan sape sur mal nini kila ke ne kiena yuḗaena tai sumo wa.”

<sup>35</sup> Ana ataḗan narui, aḗure togki naḗani pimi pa Yesu, ana aḗatetae ḗala kulkota lala meta e ḗasina, amligan Yesu totano ea.

<sup>36</sup> Ana Yesu kus togki nene, mial pano, ana pogos naḗa mial ke pa sanene, yeririna lala amien plan ḗala kulkota lala aḗatetae sululu mrapa, vena togki kiena ne Yesu yalor ga metava ea.

<sup>37</sup> Ana amial ḗa e Kunus Na Purolip la pano-o, apim atol yo e naḗa mrapa na viḗoen garo Yerusalem. Ana pogos naḗa pupia ḗina moki lala na nalogena lala apisu naḗa Yesu pimi ke lavisin Yerusalem, asitoḗal pupia yuḗaena lala a kile lala naḗa apisu naga kila, a apisu sane kiela pupia ḗarin suḗe viu tai ne pimi ke ne, ana akekara paḗisi, asuḗa amieluar Ntewa keviu vanonia.

<sup>38</sup> Asuḗa apiovionia, asape “!Ntewa na mava, ovisa ruru ḗarin suḗe nene naḗa pimi ke e kioma kia! !Pupia kekarena ma e peni, kam nae

ma metava avisirlua kia kiena ne Ntewa, kiena naurarena po na po!”

<sup>39</sup> Ana e poglis nene, Varasi laþas asike mēna likan þina la nene, ana pe akėkaran re naþa apisirlua ke kia kiena Yesu sanene poli, ana apisa pania asape “!Navianena, ovisaluþar kioṃa nalogenana lala ve akiikiin ko re si sanene!”

<sup>40</sup> Ana Yesu pisataṃe la, sape “E, peraga narui! Visae ve akiikii re sa nene, pona yoko kilavaru ga la ne sike ne monar akiikii yo.”

### *Yesu tagin pulkumali wa naþa Yerusalem*

<sup>41</sup> Ana Yesu pimi lavisin pupia pulkumali nene Yerusalem, kira pito pisuia, sinen miyea, siar naþa wamarana mlaunia.

<sup>42</sup> Kila sanene narui, pisaar nena pania, pisape “Visae ovisu kilale ga ya naþa molue puṃa nagane! Ntewa suṃa kila ke kioṃa mrapa wo tai vena olual suṃare ea ana opisu kilale þele ga.

<sup>43</sup> Ana monar nevisa van ko sanini, yoko pogos tai imi van ko naþa kioṃa nasinekar lala, la ve moki vaþisi naþa aimin ko. Yoko asuvivi ko, asuwo ruru ko nenaga, a yoko awar porotano imi ayuwonpolo e yepas nen kioṃa pupia kove ana akila mrapa na vitomāsen loyuma, vena awe ko.

<sup>44</sup> Yoko awe moṃar naruma lala, a akilawowa make moṃa yuma lala, awar plan make nena kala kilatapili lala. Nakoena na sanene yoko imi van ko komin naþa ko yepmavin visu kilaleen naþa nagane naga pe kioṃa pogos naþa Ntewa pimi ṃalivi vena tamalia ko.”

<sup>45</sup> Ana Yesu mial pa loyumuña e pulkumali, pa e Yumuña Wa mña Ntewa, ana pisu la naña akila ke yumuñaena na tauluen kururu kilavaru ea. Ana naga mñene plan la, sape

<sup>46</sup> “Ntewa pisa e kiena Visena Wa, pisape ‘Mau yumuña wa naga pe yumuña na leniena, ana kam na apilon yumuña nene narui pimi sane puluve tai mña yar na vinauena lala.’”

<sup>47</sup> Ana e poglis nene e legiena punu ga Yesu pa ke loyumuña e Yumuña Wa, ana pian ke yeririna lala, a yerkawa kiena ne yar wa lala amio navianena navisaluaena lala amio mña yerkawa kiena ne yeririna lala, pe akekaran re nenaga. Asuña akalewele ke mrapa vena akilia akila sur tai vena kila narui monar aweñar Yesu.

<sup>48</sup> Ana peraga, apisu sane tařatete alual mrapa, komin yeririna la naña amiyagogon ke kiena navianena lala, akekaran manene laa kiena visena lala, la sinelan ga naga silaga.

## 20

*Nasumonena nae Israel lala sinelan asape avisaluřar Yesu*

*Matiu 21:23-27; Mak 11:27-33*

<sup>1</sup> Ana e si e legiena tařena, Yesu řasuře si pa e Yumuña Wa mña Ntewa gar Yerusalem, suña pian ke yeririna lala a mlologon ke mña nalologena wo pan la. Ana nasumonena kiena yar wa lala amio navianena navisaluaena lala amio mña nasumonen tařena lala apim puna, apiun tania, asape

2 “?Ovisali van imimi, sane okila ke sanene e nini e kia kiena ai? ?Ane pisa pan ko pisape okila sa nene?”

3 Ana Yesu pisatañe la, sape “Pogaga, ana yoko in ñena neviun naviunena tai van amiu sumo wa. Kiau naviunena sanini, sane

4 ‘?Nakeena naña Yoane kila nanua ga ne pa yar lala, naga pe sur tai naña Ntewa pisa pan pisape kila, pona Yoane ga sitom sape kila? Amiu avisalia.’ ”

5 Ana naviunena kiena ne Yesu nene kila narui apis manene ke sina ga pan la, apisa ke asape “?Yoko tevisa ve sanape na vania? !Tevisuar ruruia! Visae tevisave nakeena nene, Ntewa naga pisa pa Yoane, yoko yar nene viun sina tan ita ne visave ana komin ya ne yepeta mavin lelagaena e Yoane?

6 Ana visae tevisave Yoane ga sitom sape kila, sa ñisi yaru la sinela kar ita ana akove ita, komin naña amlelaga ñarera rui sane Yoane naga pe navisawalena kiena ne Ntewa kemua lelaga.”

7 Ana sitomena nene kila narui apisatañe Yesu asape amninue kare ga narui.

8 Ana Yesu pisa pan la, sape “Sanene, in ñena ga tañatete nevisa van amiu ane pisa pan inu sape nekila yuñena nene.”

*Pakaiwa na yeririna viowa lala navisuaren lokilkerep*

*Matiu 21:33-46; Mak 12:1-12*

9 Ana Yesu pisa ñakaiwa tai pan yeririna la naña asike e poglis nene, pisape “Yerkawa tai, amio kiena lokilkerep tai. Naga sinenan sape yaloro re va e purvanua tañena tai, naña ñeke



laa perina, ana naga mligan kiena lokilkerep nene pa yeririna taņena laņasa naņa yoko aim ayumãae ea, ana aul vania.

<sup>10</sup> Ana yerkawa naņani pa suņa gare pano-o, pisu kilale sane nanagane pogos naņa mrakerep marua narui. Ana mligan kiena yar tai ļasuļe si pa pun la naņa asike e kiena lokilkerep naņani, vena war kilavaru na mrakerep komļasa naņa monar aul vania. Yar nene pano, ana pogos naņa mľalivin la, la pe sinelan re aul poli, ana aļe kare naga, amligan si naga ļasuļea liman korena ga.

<sup>11</sup> Ana yerkawa naņani mligan si kiena yar taņena pano, ana aļe mēna naga, akila piowa pania paļisi, ana aļenelua ļasuļe koren ga pa sina.

<sup>12</sup> Ana yam telu narui, yerkawa naņani mligan kiena yar taņena, ana naga mēna ga, aļea kulu ga kuruta rui, akoven lua e lokilkerep nene pano.

<sup>13</sup> “Ana yerkawa na lokilkerep pisu ļelaga viowa la ne sanene, mninue kare narui, pisape ‘!Awe! ?Popon nekila ya narui? Pona nanagane monar neligan ga naruu wawa nini narui. Naruu taaga ga nini, nesitom naga paļisi, ana visae naga vano monar avisu kilalea, avatanonia.’

<sup>14</sup> Ana mligan naga pano, a pogos naņa yar la nene apisuia, asitom piowa pania. Apisayu sina pan la, asape ‘Nanene na narin yerkawa nene yo. Yar ne na nene narui, naņa visae yerkawa nene kovio, naga ke narui naņa yoko kus porotano nene sane kiena lalimana. Popon towenāria, vena ita ga touarar tano nene ve kieta.’

<sup>15</sup> Ana asuņal narui atararia, akovenlua naga pa vanua e lokilkerep naņane, ana aļemāria.”

Ana Yesu sape “Suniena nene pimi maro e nini na ãa rui, ana popon asitomlia. Pogos naãa yerkawa mloge sur nene, yoko naga imi kila ve sanapen la nene?”

<sup>16</sup> Nevisa van amiu sanini, yeririna viowa la nene, yoko naga imi we moñar la, yoko amarmare e nakoan m̃arera tai, ana yoko ligand lokilkerep naãani e limana yar laãas naãa apowo.”

Ana poglis naãa amloge Yesu pisa sanene, amloge kilale naãa visena nene sane pisawan ga sur tai, pisayu sape le Yu lala pe sinelan re naga naãa pe narina ne Ntewa poli, ana yoko Ntewa were yar la naãa pe ape le Yu re poli akus lelela. Ana sur nene pe sinelan re aloge po, apis m̃arera, asape “Sur naãa opisa ke ne, Ntewa monar ve ligand re sur nene imi m̃alivi sanene.”

<sup>17</sup> Ana Yesu kira pisa manene la, piun pisape “Pe sinemiun re poli, ana vanon ya ne asiri visen wa naãa pisa sanini, pisape  
*‘Kilavaru nini, yar na yuñãenen yuñã lala asape piowa ga, ana akoven lua pa rui, ana nanagane kilavaru nene pimi pe kilavaru wo tai naãa pe na mrapun yuñã, vena uarar yuñã m̃arera.’* *Yauena 118:22*

<sup>18</sup> “Yeririna make ga naãa visae avane kilavaru nene, yoko aloru akove kilavaru nena, siwowa kare yepela lala. A visae vano vano-o tol pogos naãa kilavaru nene loru, ana yar a naãa kilavaru monoaria, yoko kilamumu kare naga vano-o kovio nenaga.”

<sup>19</sup> Ana navianen navisaluaena lala amio yerkawa kiena ne yar wa lala, apisu kilale

þakaiwa kiena Yesu nene panon la nena ga, ana sinela kar manene laa narui, asumãlu asape auarar nena naga e pogos nene. Sinelan manene laa asape akila sur tai vania, ana akila þele ga, komin apisu yeririna la akekaran laa naga.

<sup>20</sup> Kila sanene narui ana silaga asumã apisuaria, a laþasa apa vinau ga apa lavisinia, akila kokanin ga sa naþa alelaga e naga, ana sur naþa la akila ke ne, asumã aþar make nena kiena visena lala. Kiela sitomena sane sinelan asape alual visena laþas naþa naga pisa, ana akilia avisawal va yerkawae nae Rom nene Paelat, vena naga kilia la nakoaena tai vania sa naþa la sinelania.

*Sur kiena ne Ntewa, sur kiena ne Sisa  
Matiu 22:15-22; Mak 12:13-17*

<sup>21</sup> Pis na pog tai la naþa apinaun vena aim lavisin Yesu, apiun naviunena tai tania, sa naþa akila kotalia ga naga. Asape "Navianena, mepisu kilale sane kionã visena lala a kionã vianena lala ape lelaga a po paþisi. A mepisu kilale sa naþa kionã nalipereen yar lala pe peve taþena re poli, naþa opisu la maran taaga ga, ko opisawal mesmesun ke mrapa kiena ne Ntewa pan yeririna make ga.

<sup>22</sup> Ana sinemimin mesape meviun tan ko sanini, sane '?Kieta navisaluaena pisa sanape? ?Sape mesmesun ita le Yu lala toul takis va þarin suþe nae Rom, naþa Sisa, pona pisape pe mesmes re poli?' "

<sup>23</sup> Ana Yesu pisu kilale sane asape akila kotalia ga naga, ana pisa pan la pisape

24 “Ala narin kilavaru tai imi van inu. ?Avisuli sane marana ne ane teke ea? ?A kia naña asiri teke ea, kia kiena ai?”

Apisape “Marana Sisa, a kiena kia mēna ga.”

25 Ana naga pisa pan la sape “Pogaga, sur naña pe kiena ne Sisa, ala va Sisa. A sur naña pe kiena ne Ntewa, ala va Ntewa.”

26 La nene sinelan manene asape atol ruru Yesu e maran yeririna lala e kiena visena tai, ana pogos naña amloge kana navisatamēena nena, amilan pañisi, apisu sane naga kilañar ruru kiela kap narui, ana apa ruru la ga asikena, pe apisa re si sur tai po.

*Yar la naña amarmare rui, yoko amamal sina  
Matiu 22:23-33; Mak 12:18-27*

27 Ana siraun naga nene, le Satusi lañasa, apim puna Yesu, naña sinelan asape aviun tania e lepas na sur tai naña la amlelaga mārera ea, naña asape yar la naña amarmare rui, tañatete amamal sina e legiena maro.

28 Ana apiun tania, asape “Navianena, sine-mimin mesape meviun tan ko sanini. Sanapen visena tai naña yermarua Mosis siriya pan ita na nanua sumo. Naga pisape visae yar tai, wenla mare tan wona, naña lalua pe narila re tai poli wa, yokorena wenla nene monar were letano nene ve wona, vena kila sane sira nene kilia war sisi, vena uarar kia kiena ne wenla naña mare mal toña ga.

<sup>29</sup> Pogaga, ana e pogos tai, welelai la olua. Kiela m̄earu p̄ere wona tai, ana naga mare tan wona naṣani lalua pe narila re tai poli wa.

<sup>30</sup> Ana wenla na surana naga towe p̄ere sira naṣani, ana yoko naga m̄ena mare tania,

<sup>31</sup> ana wenla m̄ena na telu, kila sa ke ga, akila m̄a sanene pano-o tol wenla maro na olua, la make ga maran taaga ga, naṣa pe aṣar re nena narila tai poli.

<sup>32</sup> A siraun wona la punu ga nene, sira m̄ena naṣani marṣanu.

<sup>33</sup> Ana ovisali sur nene: ?E legiena maro, pogos naṣa apisa ke asape yoko yeririna la amamal sina, yoko sira nene ve wona ai, komin naṣa talopa make amio welelai la olua nene?"

<sup>34</sup> Ana Yesu pisataṁe la sape "E ga e yomarava nini, yeririna lala asuṁa atatalopa,

<sup>35</sup> ana la naṣa Ntewa pisape visae akilia amal si vetan marena vena ava loyuṁa e kiena yo, ve akila re sina. E pogos nene, taṣatete si atalopa narui,

<sup>36</sup> a yoko ve amarmare re sina komin naṣa aim sa ga navisi la narui. Yoko Ntewa kila amal sina e marena ana avim ave narina ruru nena lala.

<sup>37</sup> A e lepas namalen si nene, Mosis m̄ena pisayu nanua sumo rui e suniena na purlaki naṣa kap pivaga ke ea. E nene tepisu naṣa Mosis pion pa Ntewa na mava sape naga pe Ntewa kiena ne Epraam a Ntewa kiena ne Aisak a Ntewa kiena ne Sekop.

<sup>38</sup> Ana pogos naṣa Mosis siri visena nene, la telu nene amarmare e yomarava nini nakonua rui, sane amare e yomarava nini, ana amal asike

ma puna Ntewa na wa. Ntewa naga pe pe Ntewa kiena ne yeririna re ga la ne amarmare po, ana naga sinenan sape yeririna la naña asike amio, yeririna la naña amali. E navisuena kiena ne Ntewa, yeririna la naña amarmare e yomarava nini rui, la amal ga asike ga wa.”

<sup>39</sup> Ana navianen navisaluaena lala asumã amiyagogon navisatam̃eena kiena ne Yesu naña pa le Satusi lala, ana apisu sane manmarua ruru po pañisi, asape “Navianena, kioñã navisatam̃eena po na po pañisi.”

<sup>40</sup> Apis sa nene vanon visena kiena Yesu nene kila sane le Satusi lala amaraun naña aviunli si sur la tania.

*Yesu Navisaarena naga pe Ntewa kiena ne yermarua Parin Suñe Tepet*

*Matu 22:41-46; Mak 12:35-37*

<sup>41</sup> Ana Yesu pis pan la pa laa sane, piun sur tai tan la, sape “Komin ya ne la apian amiun ke asape Navisaarena naga monar m̃aliv e lus kiena ne yermarua Parin Suñe Tepet, naña naga pe ãarin suñe ãesania?”

<sup>42</sup> Nepiun nene, komin nanua sumo, Tepet siri e kiena tus na Yauena lala, sape

*‘Ntewa na mava pisa pa kiau Suñe, sape*

*“Ototano e lum̃au lepas na ãamarua,*

<sup>43</sup> *otom̃ate m̃ã vano-o, yoko neligan kioñã nasinekar lala aim ve takue tai na kilavannen lam̃ã.”* *Yauena 110:1*

<sup>44</sup> “Nanene na tepisu sane Tepet pio ke pa Navisaarena sape naga pe kiena Suñe rui. ? Ana komin naña Tepet pisa sanene, sanape naña

asumña apisa ke Navisaarena nene asape yoko molue kome Tepet, naga pe lus nena ga tai?"

Ana yam si tai amilan visena kiena ne Yesu.

*Yesu pis m̃arera pa nasumonen na lotena lala  
Matiu 23:1-36; Mak 12:38-40; Luk 11:37-54*

<sup>45</sup> Ana p̃ina la asike amiyagogon ke ga wa, naga pisawal visena tai, naṗa pe kiena ne kiena nalogena ga lala.

<sup>46</sup> Naga sape "Kam na avisuar ruru yar navianen navisaluaena la nene. Asumña aplave manene la e m̃ala kulsota viavi la nene, a visave ayaloro e yepesinasa e maran yar lala sinelan asape yar la avatanonla, a avio ruru la asave, '! Kee, pokolulagi, ko na ope Navianen tai naṗa po paṗisi!' A e pogos na p̃aṗagena a loyumña e yumña na leniena m̃ena lala, sinelan asape atoga e lelen yerkawa lala. ?Kam na apisu kilale narui ne?"

<sup>47</sup> A la akila kiela leniena la piayavi paṗisi wa, ana apisokan ke ga ne, komin e ke e pog nene, asumña akila kotalia ke ga letano lala, akila kare la. Ana vanon kiela p̃elaga la ne sanene, yoko kiela nakoena naga m̃arera manene laa sane."

## 21

*Letano tai mla narin kilavaru lua pan Ntewa  
Mak 12:41-44*

<sup>1</sup> Ana pogos naṗa Yesu la asike e yumña m̃ana Ntewa, apisu naṗa yar laṗasa apimin naṗa akuan kiela nalaena lala e karo na Yumña Wa. Ana Yesu teke pisu ke ne, pisu naṗa yar na sur moki la apim akuan kiela nalaena wo lala,

<sup>2</sup> a siraunia, naga pisu m̃ena letano tai, naṣa pe kiena sur re poli, p̃imi kuan kiena narin kururu varu lua ga.

<sup>3</sup> Ana naga pisayu sira naṣani pan la, sape “Apisu ke letano nene, naṣa kuan narin kururu varu lua ga ne? Nevisa sur na lelaga van amiu, sane naga kuan taulu make yar la naṣa kiela sur moki.

<sup>4</sup> Yar la nene, kiela kilavaru keviu paṣisi, ana akuan ga narin kinakinas komṣasa, ana letano nene, narin kilavaru naṣa mlararia vena ve kiena malena, taṃan make nena pan Ntewa.”

*Yesu pisawal naṣa yoko awe plan yuṃa wa m̃ana Ntewa*

<sup>5</sup> Ana siraun naga nene, yar laṣas apisayu ke Yum̃a Wa, asape apisu po paṣisi, amio kana kilatapili nowo lala, a kana sur tanea la naṣa aṣaria pe na vayaia punuen kana kove nena. Ana Yesu mloge m̃a naṣa asunyu ke sanene narui, naga sape

<sup>6</sup> “?Kam na apisu sur la nene asape powo liu? Nevisa van amiu sanini, siraunia, e pogos la tai ne pimi ke ne, yoko taṣatete si kana kilatapili ne tai to ruru si teke e lelana, komin naṣa yoko yar laṣasia aim awe plan tetain kare make yuṃa nene.”

*Yoko pog m̃arera monar imi*

<sup>7</sup> Ana pogos naṣa amloge Yesu pisa sanene, apiun tania, asape “?Ana Navianena, yoko awe plan Yum̃a Wa nene pogwai, a yoko mevisu kile ya naṣa visawal visave lavisi sur la nene imi m̃alm̃aliv narui?”



<sup>8</sup> Ana pisa pan la, pisape “Kam na popon avisuar ruru amiu, vena ve yar tai imi visa kotalia amiu re, komin yoko yar ve moki naŭa ala kiau kia, ana aim avisave ‘!In ne nanini nepe Navisaarena nene!’ pona avisave ‘!Nane, kana pogos ne nanini narui!’ Ana ve ataveve la re.

<sup>9</sup> A visae e pogos nene, aloge m̃aagena na mara lala, a sur viowa la asike ga lavisi, ana ve sinemiŭ kurkur manene re. Sur la nene monar aŃalmaliv sumo, ana naga nene na pe legiena maro re nene po la wa.”

<sup>10</sup> Ana pisa m̃ena pan la, sape “A ŭarin suŭe lala, yoko akila sina mara amio ŭarin suŭe taŭena lala, a purvanua lala asumalun sina purvanua taŭena lala.

<sup>11</sup> Yoko yemninu vaŭisi, a yoko yo kar ga la e yomarava nini pogos na pupia viso vaŭisi a maiena m̃arera lala, a nanene yoko amio m̃ena sur na sine kurkurena a pupia kile lala meta e sinapane.

<sup>12</sup> Ana pogos naŭa sur la nene pere wa, yoko yeririna la akila ke ne viowa van amiu. Yoko auarar amiu m̃arera, ala magka van amiu, ana siraunia aligan amiu e limana ne li na sumonen yuŃa nalenena, pona akoven amiu ava asike e yuŃa naloge viowaena, pona akila amiu asumalu ase marana ne kiela ŭarin suŭe lala pona kiela nasumonena lala. Sur viowa la nene yoko akusia vanon naŭa kam na apuarar ke kiau kia m̃arera.

<sup>13</sup> Pogos nene yoko akila m̃arera van amiu vaŭisi, ana yoko imi sa naŭa kiamiu pulmas na lologonen Lologena Wo van la.

<sup>14</sup> “Ana nagane, pogos naña sur la nene pere ke na wa, ve asitom manene re sane yoko aña avisa ya ne e pogos nene,

<sup>15</sup> komin naña yoko e nena e kana pogos nena, nela visena na manmaruaena van amiu. Ana pog naña avisa visena la nene van kiamiu nasinekar lala, yoko ataulu la, yoko tařatete si avilon kiamiu visena nena.

<sup>16</sup> “Yoko e kana pogos nena, la ga naña kam na apio la ke asape arimamiu pona womla pona řapo pona erau, la ne sanene la ke naña yoko aure plan amiu aligan amiu e limana ne yerkawa lala, ana yoko akilapel amiu sanene vařisi vano-o kam lařasa awe mořar la.

<sup>17</sup> Yoko yar la sinela kar amiu vařisi, yoko lařasa alamaran si visena van amiu, kam la naña kiau kia sike e amiu.

<sup>18</sup> “Ana nevisa van amiu sanini yoko tařatete vilřarimiu tai yoko kovio lue.

<sup>19</sup> Yoko asuñal řarera asuña vano-o ataulu pog řarera nene, a e mrapa nena nanene narui, yoko atol kiamiu malena na lelaga ea.”

### *Pupia mara gar Yerusalem*

<sup>20</sup> A e lepas na pupia pog řarera naña yoko imi, Yesu pisa sina pan la sape “Pogos naña visae avisu řegas nen yeririna na kilaen mara lala asuñal asuwo ke yo yervivi pupia pulkumali naña Yerusalem, nane yoko akilia narui sane pupia kana pog na kilaroroen pimi ke lavis narui.

<sup>21</sup> A pogos naña avisu sur nene, kam naña asike Sutea, popon aureure ana atapolou e kunus

lala, a amiu naña asike loyuña Yerusalem, popon amomolue ana aureure, pona amiu naña asike yom̄arua, ve akilali re si naña ato garo uña.

<sup>22</sup> Nanene vanon poglis nene, naga pe pupia legiena na kila maranen sinemimiena kiena ne Ntewa, sa naña nasiriena lala nanua sumo apisaaria.

<sup>23</sup> E m̄ena e pogos nene, yoko viowa manene laa va sira la naña m̄ep̄ela, amio m̄ena la naña amla ke yu pa narila lala. E pog nene, yoko naloge viowaena ve keviu vañisi e kieta purvanua, a pupia sinemimiena imi va kieta yeririna la nene.

<sup>24</sup> A yoko playu na mara kila la ave moki aloloru, a la ve moki naña sen viar limala, aurela ava ayuñae korena kiena ne p̄egas nen yeririna tañena lala. Ita le Yu lala yoko yar tañena lala avienena kare kieta pulkumali wa naña Yerusalem, la ave suñenia vano-o tol pogos naña Ntewa ga kila sane lala kiela p̄isi narui.”

*Yoko Narina ne Yeririna wasuñe si imi*

<sup>25</sup> A Yesu pisayu legiena maro, sape “E pogos nene yoko avisu kile lala ma e mrae a e kupario a e verue lala. E yomarava nini, yoko p̄egas nen yeririna lala aloge viowa, asitom kare sur la vañisi, a pogos naña avisu sive kululu ve keviu a lapa ke vam metava va ke ura, yoko la aninue kare narui asape m̄a yoko ve sanapen la na wa.

<sup>26</sup> A pogos naña la avisu kilale ya naña pivim ke e yomarava nini, a pupia sur la naña ma e sinapane kulkulul kar ga narui, yoko sinela

kurkur vaṗisi, asuṃña marala malon marauena, a amarmarluiā.

<sup>27</sup> Yoko akila ṃña sanene vano-o, avisu inu Narina ne Yeririna noṃṃalivi e lul amio kiau pupia naṃareraena amio kiau pupia naurarena.

<sup>28</sup> “Ana e kiamiu lepasa, pogos naṗa visae avisu sur la ne sanene asiar aṃṃaliv, ve amarau re. Ve asitom re suria, ana asuṃṃalu awar plan ṗarimiu vena akira va metava, komin naṗa sur la nene kana kinasa sane kiamiu yaru nawere plan amiuena pimi ke, lavis warpoyo narui.”

### *Lepas na purpiliva*

<sup>29</sup> Ana Yesu pisayu ṗakaiwa tai pan la e lepas na pogos ṃarera naṗa pimi ke ga wa, sape “Kam na asitomyuli purpiliva nene pona purlaki taṗena naṗa sanene.

<sup>30</sup> Pogos naṗa avisu sane korowas la imi memaena, a imi malmalumu, a kana stos la siar miyulua, ana kam na akilia sane pogos na yepisusun pimi ke lavis narui.

<sup>31</sup> Sanene pogos naṗa avisu kile la nene aim aṃṃaliv ke sa naṗa nepisa pan amiu ṗa rui, yoko akilia sane nasuṗenena kiena ne Ntewa pimi ke lavisin amiu narui.

<sup>32</sup> Lelaga nevisa van amiu, yoko sur punu ga monar imi ṃaliv ṃña sanene vano-o ṗisi, ana siraunia, teras na yaru la naṗa amal ke e pog nene akovio e yomarava nini.

<sup>33</sup> A yoko sinapane amio yomarava nini la ṃena luwoka akovio, ana kiau visena lala taṗatete akovio pogos tai.”

*Kam na monar akila ruru kiamiu malena lala*

<sup>34</sup> Ana Yesu mla visena nene pan la e pogos nene, pe visena na weþege laena, sape “Ana e kiamiu lepasa, kam na avisuar ruru amiu. Pe pon re kiamiu malena ve taþena si poli, pona amun manene la kuruta na munena, pona sur kar la ne sanene, a ve kiamiu sitomena su manene re mþena ga e sur na yomarava nini la silaga. Visae peraga, yoko asumþa akila mþa sanene vano-o ailan ga pupia legiena nene imi mþalivin amiu veraga sa ga ekarpila.

<sup>35</sup> Lelaga, yeririna make ga e yo punu ga e yomarava nini, pe asitomþal re poli, asu wowe ga pe akilia re poli, ana yoko legiena nene imi tol la sa naþa manu milan ga þeregawa sumþal maneno sike e naga, marþan nenaga.

<sup>36</sup> Ana kam na monar avisuar ruru amiu silaga, monar alen lue ga vena akilia asmþal mþarera vena atamalia amiu e sur la naþa yoko imi mþalmþaliv, vena kila naþa akilia asumþal ase marau Narina Yeririna.”

<sup>37</sup> Ana Yesu sumþa pian la ke sanene e Yuþa Wa ko legiena lala, a kolemalo naga petan pulkumali pava ke e Kunus Na Purolip lala.

<sup>38</sup> A kolulagi kona lala yeririna lala atavilo koskos, aþasuþe la apa si e Yuþa Wa vena aloge kiena visena lala.

## 22

*Nasumonena nae Israel lala asitom ke asape aweþar Yesu na wa*

*Matiu 26:1-5,14-16; Mak 14:1-2,10-11; Yoane*

**11:45-53**

<sup>1</sup> Ana siraunia, pimi ke lavisin pog naþa kas punu ga, la akila kiela pupia þaþagena lua, sane þaþagena na kanen kiligaþe naþa pe is re e poli, amio þaþagena na sitomañen natamaliaena.

<sup>2</sup> A e pogos nene, yerkawa kiena ne yar wa lala amio navianen navisaluaena lala, asitom ke asape aweñar Yesu na wa, ana pe añañal re mrapa na kilaen poli, komin amaraun naþa asape visae akila, pona yeririna la akila sur tai van la yo.

*Sutas sun amio yerkawa lala, pisaar sape þisi na kom varaun Yesu*

<sup>3</sup> Ana e nena e pogos nene, Yermare pimi pa e sinena Sutas nae Kariot, naga nene la lualima taaga pa lua lala ga tai.

<sup>4</sup> Ana pe yam piavi re nenaga, Sutas suñalu, pa ñalivin yerkawa kiena ne yar wa lala amio yerkawa kiena ne kiela lokul lala, pisawal kiena sitomena nena, ana apisayu mrapa ya naþa po, vena yoko kilia vielua Yesu van la.

<sup>5</sup> Ana sitomena kiena ne Sutas nene kila amloge po paþisi, ana la apisu sane popon ala kilavaru tai vania vanonia.

<sup>6</sup> Ana Sutas kekarania, a siar e pogos nene, silaga naga suña kale ke kiena pulmas tai naþa visae ve yeririna re lala, ana naga kilia vielua Yesu van la.

*Yesu pitetalia Pita lalua Yoane vena ava akila ruru kana kinanena maro*

*Matiu 26:17-25; Mak 14:12-21; Yoane 13:21-30*

<sup>7</sup> Ana apim tol legiena na siaren þaþagena na kanen kiligaþe naþa pe is re e poli, naþa e ña

nena e legiena nene monar akila kuṗaṗaena na narin sipsip lala vena sitoṃalen natamaliaena.

8 Ana Yesu pisa pa Pita amio Yoane, sape “Nevitetalia amlua ava gare, vena akila ruru make sur lala na kinanena na ṗaṗagena nene.”

9 Ana lalua apiun tania asape “?Ana ko na sinoṃan ke osape meva mekila ruru e nape ne?”

10 Ana Yesu sape “Kamlua ava atol pupia pulutava nae Yerusalem, ana pogos naṗa avaliga loyuma ea, alual yar tai naṗa kus ke pupia piawi tai imi vitawe amiu. Ana ataveve avano, yoko naga were amiu ava e yuma tai.

11 Ana pogos naṗa ava loyuma, avis va ṗar na yuma naṗani, avisave ‘Kieta Navianena piun sape, ?Awa ṃamimi yuma imimi wolawa lala, vena mekilia mese ea makan kinanena nasitoṃalen natamaliaena nene ea?’

12 Kamlua avisa ve sanene vania, ana yoko naga kipian amiun pupia lele tai metava, naṗa sur make sike pa e rui, ana yoko akila ruru make sur na kanen la e yo nene.”

13 Ana Yesu pisa pa sanene pa nalogena lua nene narui, lalua apano, ana apisu sur la punu ga pimi ṃalivi sa ga naṗa naga pisa ruru ṗesan kemua pan la rui.

Sanene narui, lalua akila ruru kinanena maro kana Yesu.

### *Kinanena maro*

*Matiu 26:47-56; Mak 14:2-26; Yoane 18:3-11*

14 Ana siraunia Yesu la apa meta e yo naṗani, ana pog na kinanena, Yesu totano e lelen kinanena, ana li na lologena lala apim atotano amio.

15 Ana Yesu pisa pan la sape “Na nanua rui, in na nesitom ña kata kinanena nasitomñalen natamaliaena nene. Na nene kau kinanena maro nini, naña ita ga tekinana lele taaga, ana siraunia, nekilia neva ga e kiau pog ñarera na wa.

16 Nevisa van amiu sanini, kilaparavi nini kana kinas pisayu natamaliaena. Ana yoko in na ve nakan re si narui, vano vano-o tol pogos naña kiau natamaliaena imi ñaliv e yomarava nini, e pogos naña nasuñenena kiena ne Ntewa imi.”

17 Ana naga mlarar piala tai, pisa potenan pa Ntewa, ana pisa pan la, sape “Ala nanini, ataron werewere van amiu, amunia.

18 Nanene komin naña siar nanagane, in na yoko ve nomun re si kuruta na munena, vano-o tol pogos naña nasuñenena kiena ne Ntewa imi.”

19 Ana naga mla kala kilaparavi tai, mlenin pisa potena pa Ntewa, kawewowaia pisape “Naga nini tasneu ne, naña netañan pan amiu. Ana yoko kam ñena ga monar akila ve sanene, sa naña kiamiu nasitomñalinena.”

20 Ana siraunia, pogos naña akinana pae, naga kila ke sina sa naña kila e kilaparavi sumo, mla piala na munen tai, pisape “Piala nini naga sane kile na kau kuruta naña yoko lau vanon amiu, vena visirluaen naviranarena viu kiena ne Ntewa amio amiu.

21 Ana sur viowa tai, yar naña yoko vielua inu, naga ita ga tai naña tekinana ke lele taaga nagane.

22 Yoko inu Narina ne Yeririna monar nemare ve sa naña apisaar kemua nanua sumo rui, ana



yar naŕa yoko vielua inu, sineu miye ke nagane, yoko viowa manene vania!”

<sup>23</sup> Ana pogos naŕa amloge, asumã apiuviun tan la asape akilali naŕa alual lala ai naŕa sitom ke sape kila sanene, ana pe aãal re poli.

*?Ane yoko ve kiela nasumonena?*

*Matiu 20:25-28; Mak 10:42-45*

<sup>24</sup> Ana e pogos nene, veveyuen tai molue likan nalologena lala, sape lala ai naŕa yoko la monar avisu naga sane naga to laa metavan la sane, ve kiela nasumonena.

<sup>25</sup> Ana Yesu mloge, pisa pan la, sape “Ita tekilia ŕelaga kiena ne yerkawa na yomarava la nini rui. Parin suŕe lala la ape navisuaren kiela yeririna lala, a nasumonen lala, yar la monar avatanon la, ala kia naŕa tometava van la, avio la avisave ‘yar navisuar itaena.’

<sup>26</sup> Ana kam na kiau nalogena lala, monar ve akilali re sa naŕa aim ave yerkawa na yomarava nini. Kam yar tai naŕa pona apisa ke asape naga pe yerkawa, yoko monar imi ve tokakin amiu, sa naŕa pe pras maro. Kam yar tai naŕa sape naga ve kiamiu nasumonena, monar imi ve sa yar na iila amiuena.

<sup>27</sup> “E pogos na kinanena, yar tai naga tomã ga sane kikiran ga, a yar taŕena naŕa ŕar ke kana kinanena pimi pania. Ana lalua nene apisu sane ane pe yerkawa, naga mon manene laa metava? Lelaga kam akilia mãga, ana in na pe sa re naga po, in na nepitom e yomarava nini sane naga

naña kila yumñaena, miila yar tañena lala a kila po pan la.”

*Yesu pisaar nalaena pan la*

<sup>28</sup> Ana Yesu pisa pan la, sape “Kam nene, nepisu amiu sane kam na sane amiilar inu po e pog m̃arera la naña netolia, pimi tol nanagane.

<sup>29</sup> Ana sa naña arimau mligan inu nepe suñen kiena yo, in m̃ena nevisa van amiu sanini nevisir plan amiu aim ave narin suñe lala e kiau yo la nene.

<sup>30</sup> Sanene, yoko kam ke narui kam naña yoko ato si tano amio inu, tekinana lele taaga loyurña e kiau nasuñenena, a yoko kam m̃ena atotano e lele na totanoena naña mon metava vena visuaren lus lualima taaga pa lua nene nae Israel.”

*Yesu pisawal naña yoko Pita viro naga*

*Matiu 26:31-35; Mak 14:27-31; Yoane 13:36-38*

<sup>31</sup> Ana Yesu pis amio Saemon Pita, sape “Ake Saemon, ovisuar ruru ko. Yermare sinen kar amiu, sinenan sape kila kare amiu vañisi, ana Ntewa tam̃an rui sape yoko naga kilali amiu ve tokak ga, kilia liñere naña po vetan naña piowa.

<sup>32</sup> Ana in na nemlenwo amiu ke rui, in na nom̃areran ko ke e kiau leniena nesape visae ko na ve sanape, ana yoko kioñ̃a naviawaena tañatete loru makea. A siraunia visae ko na oim owo ruru sina, owasuñe ko oimi, yoko ko na oim ove yar tai naña silaga okila womla lala aviawa m̃arera manene laa sane.”

<sup>33</sup> Ana Pita pisatamē Yesu, sape “Suḻe, visae akoven ko ova e yumā nakoarena, yoko in na nemio ko woga ga. Pona akila mā van ko vano-o ova otol marena, ana in mēna nekekan ga naḻa italu.”

<sup>34</sup> Ana Yesu pisa pania, sape “Pita, nevisa sur na lelaga van ko, sane yemalo ga nini, ve lakaporo kokoreko re wa, yoko ovisa kotalia inu yam ve telu, ovisave ko na omninue in nena ga.”

*Pog māraera pimi ḻarpo yo rui*

<sup>35</sup> Ana Yesu piun tan la, sape “Kam na asitoḻal ke nanua ne, pogos naḻa nemligan amiu apa amlologo kar ga e yo la nene. In na nepisa pan amiu nesape ve awar re sur laḻas amio amiu, sane taga na varu, pona karo, pona kulus nen lamiu taḻena, pona sur la ne sanene. ?Ana sanape, kam na apisu limamiu plasan sur laḻas, pona peraga?”

Ana apisatamēa, asape “Suḻe, pe limamimi plasan re sur tai poli.”

<sup>36</sup> Ana Yesu pisa pan la, sape “Lelaga, naga ke narui. Ana nanagane, tesike e pog taḻena nini narui. Nanagane, yar naḻa kiena taga na varu, pona kiena karo toḻa ga, yoko warar vano. Yar naḻa pe kiena playu na mara re poli, popon wilwilin lua māna kulkota ana la kana kilavaru, va ul kiena playu na mara tai.

<sup>37</sup> In na nepisa nene pan amiu, komin nasiriena wa nasumo lala naḻa la apisayu inu, apim aḻalḻaliv ape lelaga narui, pano-o tol visena naḻa Aisea pisa, naḻa sape

*'Akila pania sa ga naga m̃ena pe yar viowa ga tai naña kilakilaro ke navisaluaena.'* " *Ais 53:12*

<sup>38</sup> Ana nalogena lala asum̃a asitom veve ke ga visena kiena Yesu e lepas na playu na mara nene, ana asape "Suņe, opisu ke ne, nanini kieta playu na mara lua nini."

Ana Yesu pisu sane la pe akilia ruru re kiena visena poli, ana sape "E, tepisayu sur nene torok narui."

*Yesu pa mlen ma Ketsemani ma meta e Kunus na Purolip lala*

*Matiu 26:36-46; Mak 14:32-42*

<sup>39</sup> Ana Yesu la amligan yo na ma metava nene, ana sa naña kilakila ke ne, naga mialoro pa tol Kunus Na Purolip lala, naga amio kiena nalogena lala.

<sup>40</sup> Ana pogos naña atol yo naña Yesu pava ke ea, amap ea, ana pisa pan la, sape "Kam na monar alen silaga, vena nakilaliena lala ve akila amiu re aloru."

<sup>41</sup> Naga pisa pa sanene pan la, ana mligan la, pa laa perinan laa sane, ana kinai mlen pa Ntewa.

<sup>42</sup> Naga mlen sanini, sape "Awis Ata, visae okilia okila woga ga, olalua piala na loge viowaena nene vetan inu ve nomun re. Ana ve okila re kiau nasinenanena, okila ga sa naña kiom̃a."

<sup>43</sup> Ana e poglis nene Yesu mloge urmi pan paņisi, ana apisu navisi tai mligan ma e peni pitomi tano, pitomi miila naga vena naga m̃arera sina.

<sup>44</sup> Ana Yesu sum̃a mloge piowa paņisi, sitom ãele narui ana mlen m̃arera laa sane, mlen

mña pano-o kana ninena sigariga sane kuruta kekapili e porotano.

<sup>45</sup> Ana pogos naña mlen pae, suñal sina, ãasuñe si pa puna nalogena lala, ana pisu naña nasineyeena ñe la rui, amiyuñæen ke ga momalena narui.

<sup>46</sup> Ana naga pis malum kilañege la, sape “?E, amomalion ke ya ne? Popon asuñalu, akila ve sa naña nepisa pan amiu rui. Kam na monar alen vena nakilaliena lala ve aim re akila amiu aloru.”

*Sutas la apim atarar Yesu*

*Matiu 26:47-56; Mak 14:43-50; Yoane 18:3-11*

<sup>47</sup> Ana pogos naña Yesu pis ke pan la wa, apisu ga pupia ãegas nen yeririna tai apim akaten la, apisu naña yar tai sumon la apim ke lavis narui, nanene na lala yar ga na sumo tai, naña Sutas. Ana Sutas mial pimi lavisin Yesu, kutararia ana mun pipina.

<sup>48</sup> Ana Yesu pis ãesan pania sape “Sutas, omun pipiu sanene na pogaga, ana komin ya ne osape owilwilin inu Narina ne Yeririna e mrapa na sanene?”

<sup>49</sup> Ana la naña ape kiena ne Yesu naña asuñalu asike lavisinia apisu kilale ya naña Sutas la asape akila, la apiun tan Yesu, asape “?Suñe, sanape, tete la e kieta playu na mara lala?”

<sup>50</sup> Ana Yesu pe pisatañe re poli wa, ana nalogena tai suñalu, ãerelua kiena playu na mara, mligan pan tai tea, naña naga yar kiena ne ãarin yar wa, ana tetereria ga, telua kiligana na ãamarua pano.

<sup>51</sup> Ana Yesu pis pania, sape “!E toko! Ita ve tekila re si sanene van la.” Ana naga tol si lelen kiligana yar nene, kila ruru sina.

<sup>52</sup> Ana kira pisu yerkawa kiena ne yar wa lala amio yerkawa kiena ne lokul lala na yumã m̃ana Ntewa, amio nasumonena tañena kiena ne le Yu lala, naña la m̃ena apiminia, pis pan la, sape “? Sanape na añar kiamiu playu lala a kiamiu plaki la sanene? ?Pona kam na asitom ke asape in na yar tai naña nepinau m̃arera pona nom̃em̃e yaru?

<sup>53</sup> Nanua sumo, e legiena punu ga, in na nesisike nemio amiu e Yumã Wa silaga pano-o, ana komin ya ne kam na pe apim re lavisin in poli vena atarar inu e pogos la nene? Ana nepisu sane kam na ape yar na yemalolo, naña apim amio nam̃areraena na yemalolo tañena lala, a nanagane kiamiu aora nena napo.”

Ana apim atarar Yesu aņere pano.

*Pita piro Yesu*

*Matiu 26:57-58,69-75; Mak 14:53-54,66-72; Yoane 18:12-18,25-27*

<sup>54</sup> Ana atarar Yesu, aņere p̃asuņe amio la apano, apa loyumã e kove kiena ne p̃arin yar wa. Ana Pita m̃ena mial tapolou ga taveve la e pogos nene, pe pa re lavisin la poli.

<sup>55</sup> Ana pogos naña apim loyumã e kove nene, laņasa apa akila kapi pivaga vena ategania, ana Pita m̃ena pa totano amio la.

<sup>56</sup> Ana la asumã narui kapi pivaga tegoli marana Pita, ana sira m̃ee na yumãena tai naña

naga sike amio la, naga pisu kilalea, sape “!E, avisulia! Yaru nene, naga m̃ena lala yar tai naña silaga taveve yar nañani!”

57 Ana Pita pirovia, sape “!Peraga, vineu! Nepisa ruru ke na pan ko ne, in na pe nekilia re yar nene poli.”

58 Ana pe piavi re poli, yar tañena kira pisu Pita, pisu kilalea, sape “E, ko m̃ena tai nene naña.”

Ana Pita pisatam̃ea, sape “Peraga, mara.”

59 Ana asuñña ga aora si taaga ãarovia, tañena pimi pilagan manene ke sina ga pan la, sape “Nevisa ruru van amiu, yar nene naga miaialor kemua amio yere Kalele nene nanua rui. !Apisu ke ne, naga m̃ena pe yere Kalele ruru nena napo!”

60 Ana Pita pisatam̃ea, pisa kotalia la ke sina ga sape “Peraga, nemninue nena sur na opisa ke ne.”

Ana pogos naña Pita pisa ke visena nene wa, lakaporo kokoreko.

61 Ana pogos naña lakaporo kokoreko, Suñe pilon ãarina kira pimi pisu manene Pita. Ana Pita sitom̃al si visena kiena ne Suñe naña pisawal ãesan pania, naña sape “Nevisaar nena van ko, e yemalo na legiena ga nene, pogos naña lakaporo pe kokoreko re poli wa, ana yoko oviro inu yam ve telu narui, ovisave ko na omninue in ga.”

62 Ana Pita mloge piowa pañisi, pa vanua, tagi na tagi.

*Yeririna lala kiena ne ãarin yar wa akila kare Yesu pañisi*

*Matiu 26:67-68; Mak 14:53-65; Yoane 18:19-24*

<sup>63</sup> Ana la naña atarar ke Yesu e pogos nene akila piowa pania, apisa karea, asuia,

<sup>64</sup> akila ña pano-o apiwo marana vena ve kirava re sina, ana pogos naña asumã amlipa ke naga, apiai pania apiun tania asape “Ei, apisa ke asape ko navisawalena tai, a ko ovisawal lia, ane mlipa ko ga na wa.”

<sup>65</sup> Ana akila ña sanene panpano-o, apisa kare naga pañisi.

*Atar Yesu pa e pupia kumali kiena ne yerkawa kiena ne le Yu lala*

<sup>66</sup> Asumã ga sanene pano-o mrae pa metava, ana nasumonena kiena ne le Yu lala, sa naña pupia yerkawa wa lala amio navianen navisaluaena lala, apim lele taaga e kiela pupia kumali. Pogos naña apim pa e lele taaga narui, añere Yesu pa sumãl se marala.

<sup>67</sup> Ana apis pania, apiun asape “Visae ko ope Navisaarena kemua lelaga, naña le Yu lala akiravan ke asape yoko naga monar imi, sinemimin mesape ovisawal ruru van imimi nanagane.”

Ana Yesu pisatamãe la, sape “Nekilia nevisawal van amiu, ana visae nevisa, pona tañatete akekaran naña alelaga e yo.

<sup>68</sup> A sineun nesape in ñena neviun sur lañas tan amiu, ana visae neviunia, yoko kam na tañatete ñena avisatamãe yo.

<sup>69</sup> Ana sur tai naña in na nekekaran nesape nevisawal van amiu, nevisa sanini, nesape ‘Siar



nanagane, yoko ve sa naña Tusi Wa pisa rui, naña sape yoko Narina ne Yeririna va totano ma metava e lepas na ðamarua puna ne Ntewa na pupia namãreraena.' ”

<sup>70</sup> Ana pogos naña amloge visena nene, apiun tania, asape “!Ke, ya ne sa nene! ?Opisa ke osape ko ke naña ope Narina Ntewa narui?”

Ana Yesu pisatamãea sape “Naga ke narui, sane apisa ke ne.”

<sup>71</sup> Ana pogos naña la asumãa apisu naña Yesu pisa ke sape naga pe Narina ne Ntewa, sinela mimi, apisa sanini, asape “Yar nene pisa sanene, tepisu kilale ruru sane pupia veveyuena m̃eke ga e naga rui. Yoko ve takale re si yar tañena la kiena visena imi visawalia, naga kiena visena ga mliþere sina naga rui.”

## 23

*Aþere Yesu pa puna ne Paelat, þarin suþe nae Rom naña pisuar ke Israel*

*Matiu 27:1-2,11-14; Mak 15:1-5; Yoane 18:28-38*

<sup>1</sup> Ana li na kumali kiena ne le Yu lala, amloge pa visena kiena Yesu rui, ana asumãalu akuspran la e pupia þegas tai, aþure Yesu pa sumãl se marana ne Paelat e kiena lele nalipereena.

<sup>2</sup> Ana apis pa Paelat, apisawal sur la mok paþisi pania naña apisayu Yesu. Asape “Yar nene, naga sumãa kila kare ke sitomena kiena ne yeririna lala e kiamimi purvanua, sumãa pialuþar la ke sape ve aul re si takis va kiomãa yerkawa nene, Parin Suþe Sisa nae Rom, a naga ga sumãa pisirlua ke

naga sape kus kia naña Navisaarena, kila sane naga ve kiamimi ãarin suãe keviu. Sur la nene, imimi na mepisu nena e kilamaramimi.”

<sup>3</sup> Paelat miyagogon pae kiela visena, ana piun tan Yesu, sape “Ko towe ovisali kionña. ?Lelaga kemua naña ko ope ãarin suãe kiena ne le Yu lala, pona peraga?”

Ana Yesu pisatamea, sape “Naga ke narui, nane opisa ne.”

<sup>4</sup> Ana Paelat miyagogon visena kiena Yesu, ana pe mäl re naña naga kila sur tai piowa po, ana pisa pa pupia yar wa lala amio kiela yeririna lala, sape “Yar nene, e kiau navisuena, naga mesmesu ga, naga pe kilaro re navisaluaena tai poli.”

<sup>5</sup> Ana la pe sinelan re logen visena kiena ne Paelat nene poli, ana la akila ga sane sur na vitañilena, añareran manene pania, asape “Peraga, yar nene na piowa ga. Naga sumña miyuyur kare sitomena kiena kiamimi yeririna lala, a sumña mlologo ke pan la e yo kar ga la ne e yo punu ga, siar gar Kalele, pimi ãar make yo Yutea, pimi tol pupia pulkumali nene rui.”

<sup>6</sup> Ana pogos naña Paelat mloge asape Yesu siar kiena yumäena gar Kalele, piun sape naga pe yere Kalele naapo pona peraga.

<sup>7</sup> Paelat piun sanene komin naga pe pisuar re lepas nae Kalele po, ana ãarin suãe tañena naña Erot naga pisuar ke yo nene, a pogos naña apisawal pa Paelat asape Yesu naga nae Kalele, naga pisa pan la sape yoko monar aure naga va mälivin nena Ñarin Suãe Erot e kiena lepasa.

Ana e pogos ke nene, ana Erot m̃ena pimi mialiali ke Yerusalem rui, ana aṽere ga Yesu apa apisuia.

<sup>8</sup> Ana pogos naṽa P̃arin Suṽe Erot p̃isu kilale sape Yesu nene, kekarania komin naṽa mloge pa kiena suniena rui, kila sane nakonua rui naga sinenan sape visuia ana peraga, ana naga sitom ke sape nanagane narui, pona visu Yesu kila kile tai van yo.

<sup>9</sup> Ana naga sunli amio Yesu, piun veve sur la mok pania, ana Yesu pe pisataṽe re poli, toṽa ga sane, pe pis re poli.

<sup>10</sup> Ana e pogos nene, pupia yerkawa wa lala amio navianen navisaluaena lala, la m̃ena asuṽal asike ga lavis, apis keviu apisasawal ke sur lala e lepas kiena ne Yesu.

<sup>11</sup> Ana sur la nene akila Erot amio kiena yar na mara lala pe sinelan re si Yesu po, akila piowa pania, apisalele karea ṽisa. Siraunia amiyen kulmrae nowo m̃ana ne ṽarin suṽe ea, vena avitalia, ana akila m̃a sanene pano-o, yoko Erot mligan si ṽasuṽe pa pa Paelat vena visuvevea.

<sup>12</sup> Ana sumon sur la nene, lalua nene Paelat amio Erot lalua ape erau viowa ga, ana siar e poglis naṽa lalua amiyuṽae si lele taagan liṽereen Yesu, ana ṽere si lalua apim ape erau wo sina.

*Yesu suṽal si se marana ne Paelat*

*Matu 27:15-26; Mak 15:6-15; Yoane 18:39-19:16*

<sup>13</sup> Ana aṽasuṽe la si apim e yo kiena Paelat, ana naga pio viraviran pupia yerkawa wa lala amio suṽe lala a yeririna lala sape aim avisuia.

<sup>14</sup> Ana pogos naña apim loyũa, pis pan la, sape “Naña aņere řesan yar nene pimi suũa se marau, kam na apisawal asape naga pilon kare lue ga sitomen kiena ne kiamiu yeririna lala. Ana nepiun sur laņas tania, sa naña kam na amloge, ana in na pe noũa re sane naga kila sur la naña apisa poli, noũa sane naga mesmesu ga.

<sup>15</sup> Ana nemligan pa pa Erot pisuvevea, ana Erot pe mĩa re sur tai e poli, ana mligan sina pimi pan inu. Pogaga, kiau naliņereena naga sanini, sane naga pe kila re nena sur tai naña monar maren poli.

<sup>16</sup> Visae sanene, yoko in na nekila ga sanini vania, nekila ga naña awea, yoko aligan si vano, kilia wasuņe si va e kiena yo.”

<sup>17</sup> Ana komin naña e pogos nene naga pe pogos na kilaen pupia paņagena kiena ne le Yu lala, asitom ke asape sa naña Paelat naga kila ke silaga, yoko naga monar ligam lua si yere Yu tai naña apuarar mēke e kiena yũa na loge viowaena.

<sup>18-19</sup> Ana poglis nene lala yar tai naña Paelat pañarar ke ga wa, naga yar naña Paraņas, naña nanua sumo, naga řere yar taņena laņas akila sur piowa tai gar Yerusalem pa yar na kilaen mara lala nae Rom, aņe momar la, ana Paelat koven pa e kiena yũa na loge viowaena.

Ana pogos naña apisu sane Paelat sinenan sape ligam lua si Yesu molue, apion manene pania, asape “Toko, toko! Imimi na sinemimin ga Paraņas wasuņe si imi van imimi. Yar nene, mesape olalua ga kiena malena.”

20 Ana Paelat yepen mavi, naga sinenan sape Yesu na molue koren ga sa ga ne va si vanua, ana kilali naña pis sina ga pan la.

21 Ana la ato ga metavana, apionia asape “! Osuaria, osuar e laki torovia!”

22 Ana Paelat pis pan la yam telu narui, sape “?Ana komin ya ne, naga kila ya ne piowa? In na nepisuveve make sur la rui, ana pe nomal re sur tai piowa teke e naga po, naña naga kilia marenia. Yoko nekila awe ga naga, yoko aligan si wasuþe va umã.”

23 Ana la apisatamẽ si Paelat, apion manene laa pan sane, amãraran asape Yesu na monar va e lak torovia, ana akila mã sanene pano-o atauluia.

24 Ana yokorena Paelat mla kiena naliþereena, pisawal pisape naga tamãan ya naña la apiunia.

25 Yar naña sike e yuñã naloge viowaena komin þelaga na kilaen mara amio þelaga na weñaren yaru, Paelat tamãan naga molue si pa pan la, sa naña la apiunia. Ana e lepas kiena ne Yesu, naga pisawal sape yoko kiena yar na mara lala akila vania ve sa naña le Yu la sinelania.

### *Aþere Yesu pa e yo naña Kalþari*

*Matiu 27:32-44; Mak 15:21-32; Yoane 19:17-27*

26 Ana la aþere Yesu pavini, amiyal apa e lele na suaren naga e laktorovia. Poglis naña apa ke narui, amãl yar tai pa yomãrua þasuþea, yar nena naga Saemon naña nanua sumo naga nae Saerin, ana amãraran asape naga kus laktorovia kiena ne Yesu, ana amligan e purkaunena, ana taveve Yesu vavini.

<sup>27</sup> Amiyal apa ke sanene, ana poglis nene yeririna tařena mřena la mokliu nařa ataveve ke Yesu, nařa sira la moki, nařa asumřa atagililue amio pupia sineyeena.

<sup>28</sup> Ana Yesu mloge mřa kiela visena na loge viowaena lala, ana kira řatau pisu la, pis pan la, sape "Sira re Yerusalem lala o, ve atagin in re si sanene. Visae sinemiun tagena popon atagin amiu ga, pona narimiu lala.

<sup>29</sup> Nepisa sanene pan amiu, komin nařa pog mřarera tai pimi ke ne nařa yoko yar la ne asuwal pog nena yoko avisa sanini, avisave '!Visae sira la ve kala sisi re ga rui! A wo manene laa sane visae ve awar re sisi la ne amun ke yu ne, komin e pogos nene yoko mřarera manene laa van ita temio narita lala.'

<sup>30</sup> "A yoko pog nene imi viowa manene laa van la vano-o asumřalu atag va tavie lala a kunus la avisave 'Awis, aloru akoar imimi, akove momřar imimi, asinwo imimi.'

<sup>31</sup> Monar avisuar ruruia, komin nanagane na lak memaena ke ga wa ana akila ke mřarera manene pan inu rui, ana siraunia va mřa sanene vano-o visae lak imi mano pae, yoko akilia akila viowa manene laa sane van amiu."

### *Asuar Yesu e laktorovia*

<sup>32</sup> Ana e poglis nene, apuarar ke mřena yar lua nakilaroen navisaluaena, ana ařere lalua nene amio Yesu, vena aweřar la amio naga.

<sup>33</sup> Ana amial mřa apano-o, apa atol kana yo nene, yo tai nařa apio asape "Yo na puriu na

řarin yaru.” Ana la atarar Yesu, asuar naga e laktorovia, apisirlua su lika, ana asuar yar na mlamulena viowa lua nene, apisirlua la tai se řamarua a tai se řañeli.

<sup>34</sup> Sa nene narui, Yesu telan mñeke e lak torovia, ana pis pa Ntewa, pisape “Ata, awis oviewo la nene. La pe apisu kilale re sur na akila ke ne poli.”

Ana siraunia li na mara la asumña ga, akila sur sa nařa amlil mñapila, vena lualen lala ane yoko war kulmrae mñana Yesu tai, a ane war tai.

### *Apitalia kare Yesu řisa*

<sup>35</sup> A yeririna tařena la asumñalu asike laa perina, asumña apisuar ke ga, ana kiela nasumonena lala apis piowa pa Yesu, apisa karea, asape “Akira avisu yar nařa! Asape naga tamalia yar tařena la mok rui, ana nanagane na sanape? Asape naga pe Navisaarena kiena ne Ntewa, pona naga pe yar tanea tai nařa Ntewa mligan pimi. Visae sanene, popon tamalia towe laa naga narui!”

<sup>36</sup> Ana yar na mara mñena lala apisa karea, apim akian kuruta namunena nařa melkalka pania vena munia,

<sup>37</sup> asape “!Visae ko ope řarin suře kiena ne le Yu kemua la lelaga, sa nařa apisa ke ne, popon otamalia ko nanagane!”

<sup>38</sup> A e pogos nene asiri navisakilaleena tai, asuar to meta e laktorovia to metavan řarina ne Yesu, nařa sape “řarin Suře kiena ne le Yu lala.”

### *Lalua na kilaroen navisaluaena apis pa Yesu*

<sup>39</sup> Ana e pogos nene, lalua naþa atelan la asike meta e lak torovia amio Yesu apis pania. Tai pis piowa pania, sa ke taþena lala, sape “?Ko ope Navisaarena naþa, po peraga? !Popon ovitaþilin otamalia ita!”

<sup>40</sup> Ana taþena pis pania pisaluþaria, pisape “Mara, nanagane kieta pogos na marena narui, ana ko na pe opatanon re Ntewa poli wa. Ita telu nini, naliþereena naþa akila pan ita naga taaga ga,

<sup>41</sup> a e lepas na ita lua, mesmesun ga napi-owaena naþa ita lua tekila, ana e lepas na puna, naga pe kila re nena sur tai poli.”

<sup>42</sup> Ana pis pa Yesu, piun tania, sape “Yesu, pogos naþa oim ove þarin suþe owasuþe ko sina, awis, ve sinema þesan in re.”

<sup>43</sup> Ana Yesu pisatamea, sape “Nevisaar van ko, legiena ga na þane, yoko italua tesike e kieta yo wo.”

### *Yesu mare*

*Matiu 27:45-56; Mak 15:33-41; Yoane 19:28-30*

<sup>44</sup> Nanagane pimi tol kolpae narui, a siar e pogos nene mrae tego re si po, kila narui yemalolo kalo make ga yo nene, mon ma sanene pano-o tol mrae telu yepekilavi.

<sup>45</sup> Ana siraunia, kulmrae naþa telan meke loyuma e Yuma Wa mana Ntewa, naþa kilawo yo wa naþa pe yo wa paþisi, naga purpa lepas lua.

<sup>46</sup> Ana e pogos nene, Yesu pio maro sape “Ata, neligan ninuu e lumoma.” Pio sanene narui, ana þere maron kiena yalua marpan top.



<sup>47</sup> Ana pogos naŕa yerkawa kiena ne yar na mara lala pisu sur la nene, naga pisirlua kia kiena ne Ntewa, sape “!Lelaga naŕane, yar nene naga pe yar mesmes ga naŕa!”

<sup>48</sup> A ŕina la naŕa apim lele taaga e yo nene, la mēna apisu make sur la nene naŕa akila pa Yesu, pe nasineyeena pan la paŕisi. Ana siraunia aŕasuŕela sina, amial apano amio pupia naloge viowaena, apa si mēla uña lala.

<sup>49</sup> A ŕegas nen yeririna taŕena mēna lala asike e pogos nene, la asumālu asike laa perina sane, asumā apisu make sur lala. Naga nene erau kiena ne Yesu lala amio sira la naŕa amolue gar Kalele nakonua rui, ataveve mēna Yesu pano-o pimi tol yo nene, ana la mēna apisu marena kiena ne Yesu.

### *Yosop sin Yesu*

*Matiu 27:57-61; Mak 15:42-47; Yoane 19:38-42*

<sup>50</sup> Ana yar tai, naga nae pulkumali kiena ne le Yu la naŕa Arimatea, kiena kia Yosop. Naga pe yerkawa tai na pupia kumali kiena ne le Yu lala gar Yerusalem, pe yar mesmes tai naŕa kiena ŕelaga po paŕisi.

<sup>51</sup> Naga tai naŕa sinenan manene sape popon sa nasuŕenena kiena ne Ntewa imi, ana nanua pogos naŕa apisayu ke asape akila ya ne va Yesu, naga taaga kiena sitomena pe sa re nene poli, naga kilali naŕa pisaluŕar la sape ve akila re viowa vania.

<sup>52</sup> Ana pogos naña mloge asape Yesu mare rui, naga pa suñal se marana ne Paelat, piun tania sape kilia kus tasnena ne Yesu.

<sup>53</sup> Ana Paelat tañan pania, ana pa kuslua tasnena ne Yesu e laktorovia, mliluar e kulmrae, kus pa mligan ruru ñeke loyuma e puluve viu tai naña ate mare ga na wa, pe amliganli re yar tai ñene poli wa.

<sup>54</sup> Ana legiena na marena kiena ne Yesu nene naga e Praere, sa naña pe legiena na kila ruruen sur lala na Legiena Wa. Ana mrae pito ke narui, lavis ke Legiena Wa siar ne, naga nene e ruru nena e pogos naña mrae pito kovio.

<sup>55</sup> Ana sira la naña nanua ataveve Yesu siar gar Kalele pimi tol kiena laktorovia, nanagane pogos naña akus tasnena pimi, ataveve sina. Ataveve pimi tol kana yo na nasiniena, ana apisu naña amligan ñeke e puluve.

<sup>56</sup> Ana apisu pae, añasuñela apa si uña vena akila ruru ponotaninu lala sa naña ñaños amio pomat. Atol yo uña, ana Legiena Wa siaria, kila narui pe pogos re si tai pan la naña ava avai tasnena ne Yesu poli. Ana asuma ga uña sanene, sa naña navisaluaena pisape monar akila e legiena wa.

## 24

*Puluve koren ga ñeke na*

*Matiu 28:1-10; Mak 16:1-8; Yoane 20:1-10*

<sup>1</sup> Legiena Wa ñaro pano, ana kana legiena tañena na peni, naga legiena ñesa na legiena olua. Ana kolulag kona, sira lañas nene añar

ponotaninu sa naña pomat amio mñañes naña akila ruru pa rui, amiyal apa e puluve nañani vena avaia ruru tasnena ne Yesu.

<sup>2</sup> Ana pogos naña apitom atol yo, añal naña pupia kilavaru na kilawoen puluve nene, amelilivin lua rui,

<sup>3</sup> ana apa loyũa, amilan naña tasnena ne Yesu kovio rui.

<sup>4</sup> Ana asumãl ga asike narui asitom wele mña pano-o amilan naña yar lua asumãlu asike amio la. Lalua nene mñala kulmrae la miyuwowo naña miyuwowo ruru nena naapo.

<sup>5</sup> Ana sira la nañani amaraun naña akira avisu lalua nene, ana akinai tanon lalua, ãarila tau pito e porotano. Ana lalua nene apis pan la, asape “E, sira lala, tañatete alual yar na malena e yo na marena.

<sup>6</sup> Naga pe mon re si e nini poli, Ntewa pisirlua rui. Amiu asitomyuli sina ya naña naga pisawal pan amiu, pogos naña naga sike amio amiu nanua gar Kalele, pe apim re e nini poli wa.

<sup>7</sup> Naga pisa sanini sape sa naña naga pe Narin Yeririna, yoko monar atamãan naga va e limana ne li viowa lala, ana yoko asuar naga va e laktorovia, ana siraunia, e kana legiena natelu, yoko sumãlu mal sina. Nane visena ke nanene narui naña naga pisawal ãesan pan amiu.”

<sup>8</sup> Sira la amloge narui, kila la asitomãl si visaarena naña pisa ruru pan la pisape yoko naga kilia mal sina.

<sup>9</sup> Ana asitoñal sina, amligan yo nene añasuñela, apa apisu nalologena la lualima taaga pa taaga amio lala tañena lala. Sur la naña apisu e puluve apisayu meraravan pan la,

<sup>10-11</sup> ana la pe amlelaga re e poli, apisu sane sira la nene asun wowe ga.

Ana sira la naña apisu suri la nene, kiela kia la sanini: Maria nae Maktala, Soana, Maria naña anenane Semes, amio si sira tañena lañasa.

### *Pita kiriri pa pisuveve puluve*

<sup>12</sup> Ana Pita ga naga taaga sinenan sape visuli sur nene pe lelaga pona peraga, ana naga suñalu, kiriri pano, sinenan sape visuveve yo loyuña e puluve. Pimi tol yo nene, pulu pa loyuña, ana pisu ga kulmrae la sike na, tasnena Yesu kovio. Ana pa si vanua, mial si ñasuñe pa uña, suña sitom liluenia sape sur nene na sanape ne, pona kana kinas na ya.

### *Nalogenia lalua amial apa gar Emeas, apitawe Yesu*

<sup>13</sup> Ana siraunia, e ke ga e legiena nene, la ke ga lalua amligan Yerusalem, sinelan asape ava e narin pulkumali tai, kiena kia Emeas. Mraplepa na vaen e yo nene pe piavi manene re poli, sur sane tasme lualima.

<sup>14</sup> Ana pogos naña lalua amial apa ke narui, lalua asuñã asunyu manene laa sur la naña ñaro pa rui.

<sup>15</sup> Asunlilue ñã sanene apano, ana Yesu mial pimi piear la, amialpil amio apano.

<sup>16</sup> Apisu naña mial ke amio la, apisu sane wolawa ga tai, komin naña apisu kilale ñele naga.

17 Ana Yesu piun tan la, pisape “?Kam lua amial ke sanene asunyu liluen ke ya ne?” Ana pogos naña naga piun sanene, aparurula, asumãlu asu, marala piowa ga sike narui.

18 Ana lala tai nene, kiena kia Kleoñas, naga pisatañe Yesu, pisape “Yar la mok liu na yo kar ga la ne, asumã amialiali ke Yerusalem e pogos nene, ana pona ko ga taaga manene ga pe omlogeyu li re pupia sur la ne kakate mare ga yo na wa?”

19 Ana Yesu piun pisape “?Ana ya la ne sane opisa ke ne?”

Apisatañea, asape “Naga nene e lepas kiena ne yar nae Nasaret naña, Yesu. Naga pimi, pe navisawalen tai, kila kile la mok liu na kiena pupia namãreraena, mlologo, a pian ruru yeririna la po pañisi, kila sanene sinelan naga keviu, pano tol mēna Ntewa na Mava pisawal sape kekaran naga pañisi.

20 Ana siraunia, nanua ga yemlagi nakoneva, pupia yar wa lala amio kieta nasumonena lala sinela karia, aņere m̃a naga pa e pupia kumali la pano-o amliņerea, asape naga monar mare, ana apa asuar naga pa e laktorovia, mare rui.

21 Nanua sumo, kiamimi sitomena sike ga e naga, mesape naga ke narui naña yoko tamalia ita le Israel lala, yoko were plan ita vetan namãreraena kiena ne le Rom lala, ana nana-gane, sur la punu ga pa piowa si narui. Naga kovio petan imimi, nagane kana legiena telu narui.

22 “Ana sur si tai naña kila imimi memilan manene pañisi, ana mesitomyu kaņaran ke na

wa. Nagane kolulag pogos naña lakaporo kokoreko yam taaga, kiamimi sira lañas asuñal apa si e puluve naña amligan tasnena ne Yesu menea, apavinin asape avaia ruru wo.

<sup>23</sup> Ana pogos naña apa aporu e yo nene, apisu naña tasnena pe mon re si e lelen poli, ana akirir si añasuñe la apitom pun imimi, apisawalia, a pe naga re ga nene poli, ana pisawal mēna asape apisu navisi lalua, naña apisawal asape Yesu mal si petan marena rui.

<sup>24</sup> Ana imimi lañasa sinelan asape ava avisulia, ana la apito e puluve, apisu sanena naña sira la apisa, pe aña re nena ga.”

<sup>25</sup> Nanene narui visena la naña lalua apisa pa Yesu, e pogos naña asuñal ga asike mrapa. Ana naga mēna pis, pisa pan la, pisape “Aulai, kam punu ga kiligamiu la poñe ga. Navisawalena la apisawal sur la nene nakonua rui, ana sanape naña kam na pe amlelaga re poli wa?

<sup>26</sup> Pona akilia rui naña yoko Ntewa visirlua kiena Navisaarena ve pupia yerkaawa e yomarava nini. Ana kam na pe apisu kilale re nena ga naña Nasiriena Wa lala apisawal rui, asape yoko monar akila Navisaarena loge viowa e sur la ve moki, yoko akila kare naga sumo, ñisi na Ntewa kilia visirlua naga, vena tol kiena pupia naurarena.”

<sup>27</sup> Ana Yesu sunyu ke pan la sanene, pian la pa re laa sane wa. Naga siar e tus lala kiena ne Mosis, pimi tol tus lala kiena ne navisawalena lala, suña pisa meraravan ruru ke pan lalua nene sanape naña visena marua la nene suña kiar ke ga naga, apisayu ke ga naga silaga.

<sup>28</sup> Ana asumã amialor si apano, pe piavi re poli apim lavisin pulkumali naña lalua apanon ke ne. Ana lalua apisu sane Yesu sumã mlilu mrapa pa yalen silaga.

<sup>29</sup> Ana amãreren pania vena sike ne amio la wa. Apis pania, asape “Nagane na mrae pito ke narui, lavis pintamã ne. Oimi osu re omio imimi sumo wa, omẽke ga e nini.” Ana Yesu pa mẽke amio la.

<sup>30</sup> Asumã ga tol pogos na kinanena, ana apim lele taaga e yo na kinanena. Ana pogos na lenwoen kinanena, Yesu ga sumãlu mlarar kala kilaparavi, mlen pa Ntewa pisa potena pania, kawewowaia pion pan la.

<sup>31</sup> Ana pogos naña kila sanene, e nena ga e pogos nene sa naña kilamarala pike, apisu kilalea sane naga naña sike amio la ne Yesu ke narui. Ana apisu manene mã sanene, a yam plas ga kovio nena ga.

<sup>32</sup> Ana lalua asumã apisayuia, asape “Suwala, tepisu kilale re poli e, ana kieta Supe ga naña. Ana lelaga, naga nena ga, komin naña tesun lilue ke temio mrapa naña naga pisayu meraravan ke visena wa pan ita, kiena visena lala sa ga kapi kekan ke sineta.”

<sup>33</sup> Ana pogos naña akilia sane apisu marana ne Yesu rui, pe amomal re si poli, ana asumãl ke ga, amial e pupia lepamiema añasupe apa Yerusalem vena avisawal va laņasa.

Ana amãlavin la lualima taaga pa taaga naña asike e viorena wa, amio laņasa,

<sup>34</sup> ana lalua pe apis re pan la poli wa, ana la apis p̃esan pan lalua, asape “E, pogos naña

kamlua apa ga sane, sur tai pimi m̃alivin imimi e nini. Visena nanua sira la apisa, lelaga kemua naḡa, kieta Suḡe suḡalu molue petan marena rui, Pita ne nanene naga pisu e kilamarana.”

<sup>35</sup> Ana la m̃ena lua naḡani asikol kiela visena, apisayu sanape naḡa Yesu m̃alivin la mrapa, a naḡa la pe apisu kilale re poli, pano-o tol pogos naḡa kawewowa ga kilaparavi pan la.

*Yesu m̃alivin kiena nalogena lala*

*Matiu 28:16-20; Mak 16:14-18; Yoane 20:19-23; Yum̃aena 1:6-8*

<sup>36</sup> Ana pogos naḡa lalua asuḡa asunyu ke sur la nene pan la wa, amilan ga naḡa Yesu suḡal ga sike likan la rui, pisa pan la sape “Suḡare sike amio amiu.”

<sup>37</sup> Yesu pimi pula sanene, kila la aḡape yermare, ana amarau paḡisi.

<sup>38</sup> Ana Yesu pisu kilale naḡa amaraunia, piun tan la sape “!E, vanon ya ne asitom manene laa sanene? Ve sinemiu veve lua re!

<sup>39</sup> Avisuli luḡau amio lau, lelen ya na sike e la? !Apsuia, in ga nini! Aim atolili tasneu la komḡasa, komin sur sane yermare naga pe puryun re poli a pe kilañiu re poli sane tasneu nini.”

<sup>40</sup> Ana suḡa pisa ke sanene pan la, kipian limana amio lana pan la vena akilia avisuia.

<sup>41</sup> Ana e pogos nene, nalogena lala kiela sito-mena miyuḡae manene sanene, naḡa akekara paḡisi naḡa apisu si Yesu, ana asitom ḡele towe ke ga wa. Ana Yesu pis ke sina ga, piun tan la sape “?E, apran kapi rui?”



<sup>42</sup> Ana la amlega ika tai, manoa ga na wa, ana amla kinakinas tai pa Yesu,

<sup>43</sup> ana mlavia, kan ga e marala.

*Yesu pis maro pa kiena nalogena lala*

<sup>44</sup> Ana siraunia, Yesu pis pan la, pisape “Pogos naña nesike nemio amiu nanua sumo ne, in na nepisayu visen la moki na lepas make ga na Siriena Wa pan amiu. In na neñar visena la e tus lala kiena ne Mosis, e tus lala kiena ne Navisawalena lala, a e tus na Yauena Wa lala, ana nesuña nepisa ke nesape visena ne la nanene narui, asuña apisayu in ke ga, a nesape yoko aim ave lelaga e inu ve ve piavi re. In na nepisa sanene pan amiu, ana nagane kam na apisu sur la punu ga nene apim ape lelaga e maramiu p̄isi narui.”

<sup>45</sup> Ana Yesu pian la pa laa sane, kila kiela sitomen la pa keviu li laa sane loyuma e kinas nen Siriena Wa la nene, ana sur la punu ga pimi merarava ruru pan la.

<sup>46</sup> Naga pisa pan la, sape “Nane visen la nene kala kinas ne nanini narui, sane Navisaarena, yoko akila naga loge sinelae vano-o marena, ana e kana legiena natelu, yoko suñalu mal si vetan marena.

<sup>47</sup> A siraunia e ga e kiena kia, yoko kiena yeririna lala asiar gar Yerusalem, a yoko amolue ava e yomarava wetelu, ava alologon va p̄egas nen yeririna make ga, avisawal van la avisave monar avilopu la narui, ana akilia atol naviewoena e kiela mlamulen viowa lala.

<sup>48</sup> “Ana kam la naþa apisu sur la punu ga nene e kilamaramiu, kam ke narui ava avisawal va yar taþena lala avisave suri la nene na lelaga.

<sup>49</sup> Yumãena nene naga pe yumãena m̃arera tai naþa m̃arera paþisi, ana yoko neligan nam̃areraena tai e amiu vena iila amiu atauluia. Nam̃areraena nene, navisaarena kiena ne Ata sike naþa yoko naga ligan molue ma e peni vitom kokonia amiu, ana sineun nesape nevisa van amiu, ve aur matan re pulkumali nini wa, ana monar asumate m̃a e nini, vano-o atolia.”

*Ntewa þerelua si Yesu pa ma e peni*

*Mak 16:19-20; Yumãena 1:9-11*

<sup>50</sup> Ana pogos naþa Yesu sinenan sape ligan la, sumon la apito garo e narin pulkumali naþa Petani. Apitom atol yo nene, asumã sanene, pano-o Yesu þar plan limana metavan la, pisa ruru la.

<sup>51</sup> Sumã pisa ruru la m̃a sanene pano-o, sumã siar mligan la palilue narui, pa si metava pa nena ma e peni.

<sup>52</sup> Ana nalogena lala apisu kiela Suþe kovio sina petan la, ana akinaï tano amlotunia, ana aþasuþe la si apa gar Yerusalem, naþa akekara naþa akekara.

<sup>53</sup> Ana asumã e nene pano-o, ana silaga e pogos na leniena make ga asumã apa amieluar ke Ntewa e m̃ana Yumã Wa.

Nane Lologena Wo kiena ne Yesu Kristo naþa in Luk nesiria, þisi e nene narui.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 28 Dec 2024 from source files dated 31 Aug 2023

ee028e1c-7e53-571d-8041-681daaf580e8